


CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
NOV 4 1938

T 3208 / 323 1. 81 7
0025



浙江通志卷之三十三

哈佛大學漢和圖書館珍藏印

人物三

台州府

吳屈晃

字光公臨海人為尚書僕射吳主權欲廢太子和晃與將軍朱據率將吏泥首自縛詣闕

請吳主登白雀觀見甚惡之勅晃等無事忿忿晃與據固諫不止吳主大怒牽入杖一百晃又入諫曰太子神明顯聞四海今三方鼎峙不宜搖動以生眾心叩頭流血詞氣不撓吳主不納斥還田里

虞翔

臨海人為鄱陽太守會稽典錄稱其與御史中丞任奕各馳文檄曄若春榮

唐郭昭文

黃巖人文宗開成四年以賢良徵為殿中侍御史抗章切諫藩鎮之禍為時忌以計

撓之而歸

項斯 字子遷臨海人會昌進士官終丹徒尉張謂唐詩主客圖有清奇雅正升堂項斯之語楊敬之有詩云平生不解藏人善到處逢人說項斯

孫郃 仙居人乾寧間進士少遊方干先生門名籍甚為人周慎謙雅自牧累官秘書郎泊如也干鈞於鑑湖郃與計偕既貴還鮮衣烏詣鈞所謁干踞石勿移睫郃慄不敢請久之魚餌隨失掉湖濱遽命之捕郃卸衣烏往得之挽手歸與酌草舍中盡歡而別

五代鄭睿 寧海人吳越錢王辟為都官員外郎偕尚書葉預輩四人勸錢王納土使浙東得免**兵革膚有力焉**

張文仗 字德昭性仁厚仙居縣人天成元年和凝知貢舉擢進士第四人授准東安撫司奏議有聲移刺山西太原稱循卓吏第一無何免歸誅茅孟川之濱居焉周顯德間除授臨淮總管屢

詔堅不就暨宋藝祖履極下詔徵之急固辭曰泉石膏肓不能復預人間事壽八十三卒按五代時錢氏據吳越文仗果台人何自仕中國意文仗為張氏祖時尚未遷於仙耶

宋羅適 寧海人少從鄉先進朱絳學後與徐中行陳桐城移泗水改著作郎知濟陰縣徙江都政化大行民知其長者不忍欺每郊行名耆老問以疾苦及所願欲為罷行之遷推官兩浙蘓秀水災朝議賑卹以適為提點刑獄後移京西北路熙豐間恩不下逮諫官御史不敢語適獨慷慨建白務恤民隱嘗有書與蘇文忠公論水利凡興復者五十有五既去民思之置生祠焉

周弁 字君儀寧海縣人父良史沒于日本母施年十八遺腹生弁孀居紡織以教育之登嘉祐進士知清陽縣弁平生好讀書至老手不釋卷家貧未嘗語生事子炳焯同登元祐進士炳仕至金

紫光祿大夫煒亦至銀青光祿大夫贈并少師施氏魏國夫人

陳公輔

字國佐臨海人政和三年釋褐第一教授

戒諸生毋往弔劬聞不悅諷權要移越州累遷秘書郎靖康初二府皆宣和舊人公輔言蔡京王黼

用事二十餘年臺諫皆緣以進願擇人臣中朴茂純直不附權倖慷慨論事者列之臺諫時吳敏李

綱不協又請諭以聖訓俾務一心以安國家徽宗渡江未還人情疑懼力陳父子之義宜遣大臣迎

奉欽宗嘉之擢為右司諫論蔡京父子懷奸誤國朝廷公卿百執事半出其門上悟謫京又表朱勔

罪惡乞勿許其子姓隨上皇入京又言方復祖宗法度馮澥不宜更論熙寧元豐之政語觸時宰斥

監合州酒稅紹興六年名為吏部員外郎疏言今日之禍實由公卿大夫無氣節忠義皆王安石學

術壞之使學者不治春秋稱揚雄而善馮道卿大夫師安石之言宜其無氣節忠義也復授左司諫

帝喜其深得諫臣體賜三品服令尚書省寫圖進覽公輔感知遇益罄忠鯁又嘗請官陳東以作士

氣徽宗計至請宮中行三年之喪遷尚書禮部侍郎會趙鼎言進退人才乃其職分疏稍侵公輔因

力請祠尋知處州轉徽猷閣待制卒年六十六贈大中大夫有文集二十卷奏議十二卷行于世

陳守忠

臨海人獻肅公良翰父也仕為和州通判其配洪不育為置一妾進御之夕襲衰于

丙叩之故潤州通判女父喪尚未除遂處以別室後飭裝奩遣之

王淦

字淵道臨海人秦國公之望孫也紹興五年以恩補官魏了翁薦知衡陽縣衡陽賦浩訟

繁淦經畫有方每催科逐鄉置籍躬自點勘期限不迫人戶樂輸推誠聽讞吏姦靡容平反死獄十

餘人李保一之難鼓義兵賊輒奔遁歲饑殫心賑恤民賴以全嘗有非理相犯者其人後遭患忘其

舊惡而惻然援拔之

蔣煜 仙居人有文學宣和寇亂與煜遇欲妻以女
頸就刃詈聲不絕煜性滑稽其
臨事有立如此見舊一統志

鮑祖文 黃巖人字獻夫紹興二十七年特科進士
歷永嘉尉東陽丞韓元吉鄭伯熊薦之知
瑞安以忤權貴罷通判興化軍陳叅政駉又薦之
祖武字承夫志尚亦高與兄相為師友里中稱二
鮑云

杜濬 字淵卿黃巖人丞相範之子好仁重義與人
交無町畦視勢利泊然以司直陞對直言時
事出知汀州罷諸邑月解糧數十萬
代輸版戶積逋人以為不愧家風云

吳芾 仙居人少以氣節自負登紹興進士與秦檜
有舊芾在秘書退然如未謀面檜嘗諷之曰
高自標致豈長者乎對曰依阿為容非所能也後
復抗疏歷詆其奸兩淮戰失利人情惴惴爭言退

避之計芾奮然曰今日事進為上策退為無策又
言金陵自古帝王都請駐蹕以繫天下心惜不能
用竟以方正不諧歸休自號湖山居士歷官侍御

史戶吏禮三部侍郎終龍圖閣直學士卒追謚康
肅朱文公熹為撰墓
碑見宋史一統志

陳駉 字叔進臨海人紹興二十四年試春官第一
累官太子諭德太子尹臨安駉謂儲宮下親
細務不得專志于學非所以毓德也太子矍然亟

辭崔淵以外戚張說進除授秘書郎駉封還詞頭
未幾出知贛州召還遷秘書監淳熙五年同修國
史上欲求晉宋以下興亡理亂之大端約為一書

謂駉與周必大可任言者忌而攻之授提舉太平
興國宮起知袁州光宗受禪名試吏部侍郎紹熙
元年同知貢舉兼侍讀應詔陳時政三十條皆切
于時病三年權禮部尚書同知樞密院事四年叅
知政事光宗以疾不朝重華宮會慶節稱壽又不
果往駉三入奏廷臣上疏者以百計上感悟以冬

至日朝重華五年正月朔旦稱壽于慈福宮孝宗崩光宗以疾未臨喪駮請正儲位以安人心寧宗即位知樞密院事兼參知政事韓侂胄竊國柄吏部侍郎彭龜年論侂胄不報于是龜年侂胄俱請祠駮曰以閣門去經筵何以示天下龜年竟外補駮以資政殿大學士典郡辭詔提舉洞霄宮慶元二年知婺州告老授觀文殿學士卒年七十六贈少傅諡文簡

賈偉

天台人紹興二十七年進士歷秘書郎終知漢州嘗貽書丞相趙雄極論武興守吳挺之

橫他日陛對又乞裁抑郭隸郭果兵權孝宗嘉納之後反為所擠以歿其子涉方弱冠上書闕下直其

陳良翰

字邦彥臨海人早孤事母孝為文恢博有氣以紹興五年進士知瑞安縣時俗梗吏

嚴翰獨撫以寬催租不下文符但揭示民競樂輸聽訟咸得其情遷監察御史孝宗初金約修好良

翰言議和納降皆非是必定計自治而和與不和任之乃可張浚軍淮泗以規進取而議者爭獻防江策良翰極論捨淮防江非計上然之除右正言既而宰相湯思退主和議遣盧仲賢李栻往翰言仲賢輕儇無耻栻自北來難信仲賢至栻輒許金人以疆土歲幣而還上大怒欲誅之宰相叩頭請免復遣王之望龍大淵往良翰言金要我罷四郡屯兵而以其地歸之而彼不折一兵坐收四千里要害之地決不可許若歲幣則俟陵寢歸日然後與之庶猶有名今議未決而之望遂行恐其辱國不止于仲賢也因疏論思退奸邪誤國宜早罷黜張浚精忠老謀不宜以小人言搖之尹穡附思退明日亦請對遂罷良翰言職兩淮既撤備金人大入孝宗始深悔太學生數百人伏闕乞召用良翰胡銓王十朋而斬思退等思退由是始敗進給事中改禮部侍郎不拜未幾以疾告老除敷文閣直學士提舉太平宮卒年六十五諡獻肅所著有勁正集十六卷

謝深甫

字子肅臨海人少穎悟篤志力學夜不寢父終母守志督子成立中乾道二年進士

知青田縣御史葛郊等薦之孝宗名見除籍田令提舉江東常平講行荒政多所全活歷起居郎兼

權給事中知閣門事韓侂胄破格而除刺史封還內降知臨安府帝稱其政得寬猛之中遷工部侍

郎兼吏部侍郎及詳定勅令深甫上疏勸光宗朝重華宮言太上愛陛下猶陛下愛嘉王帝感悟寧

宗卽位除煥章閣侍制知建康府內批改御史中丞兼侍讀時禮官議祧禧祖侍讀朱元晦以為不

可深甫言朱熹攷訂有據宜從熹議歷知樞密院事拜右丞相封申國公後改魯國公累疏乞避位

帝曰卿能為朕守法度惜名器不可言去御筆書說命中篇及金帛賜之余熹上書乞斬朱熹絕偽

學且指蔡元定為偽黨深甫擲其書語同列曰朱元晦蔡季通不過自相與講明其學耳果何罪乎

金使入見不如式帝退朝深甫端立不動命使者俟于殿隅帝再御殿乃復引見迄如舊儀拜少保

乞骸骨授醴泉觀察使明年進少傅致仕有星殞于第遂薨

周洎

字子及臨海人乾道丙戌進士淳熙戊戌中博學宏詞差江東憲司幹官除太學正初王

抃起吏胥預密議嗜利者因緣請托希薦進聲勢傾朝廷人莫敢詰洎見上論其奸且曰陛下欲開

言路進人才修政事今小人在側回護蔽隔陛下盛德豈以斯人負謗上大悟曰朕始于卿聞此時

賀會慶節故事邊使在不下除日忽中批王抃在外宮觀羣臣驚愕洎指攻抃累數千言旁及宮掖

宰執侍從臺諫聞者皆震恐失色大臣貴近惡侵已太甚側目視之洎不自安求外補俄以憂去除

國子監主簿洎建言近日中黑氣陽明如昏當春祁寒霧雪彌月天象示戒宜修德警備因列八事

累數千言纖悉指畫如日見無遺上駭異事事折難且曰朕密設備禦卿豈知之洎對曰設之秘密

臣不敢知備之有無衆所共見也今陛下謂已有備小臣以為未有二者之間願陛下留意上嘆曰

朕比見卿更過曩日明日諭樞密使周洎知邊事甚詳今士大夫不如也尋試館職既擇日得暴疾卒而

王卿月 字清叔臨海人乾道五年進士歷秘書院郎權中書舍人直學士院時秦檜主和議

胡銓忤檜貶官卿月草制云吾寧身蹈東海獨仲連不肯帝秦至今名重泰山微相如何以強趙時論多之後假吏部尚書為金國生辰使未行除太府卿以疾卒

丁可 字無可天台人隆興元年進士終監行在惠民北局嘗上書訟趙鼎岳飛之忠忤湯思退

告歸工詩尤妙于長短句云

徐大受 天台人淳熙十一年特科官終監行在草料場未第時開館授徒朱文公提刑過其

地正與其徒論說顏子不違仁章朱連舉數疑應答皆不失旨朱大嘆賞遂與定交趙汝愚拜相與

韓侂胄同出內批公賀啓有云以周公之德自應相成王為師然老子之賢詎可與韓非同傳汝愚讀之遂立辭新命劉知過以詩名見之曰自此當臥君百尺樓上矣事詳文公所遺帖

蔡鎬 字正之太平人中淳熙武舉授鹽城尉擢武學諭遷博士孝宗嘗謂周光大曰蔡鎬可喜

對朕語皆着實緩急用之亦不孤負人時有建議築瓦梁堰浸地三州可為邊防者鎬力陳其不便日滁河兩旁桑稻滿野民率成家計長子孫矣而又可魚鼈之乎上悟乃罷其役會外艱服除召為賀金國旦使命下而卒先是朱文公行部至黃巖議修建諸閘薦鎬沉審果決可以集事已而文公去勾龍昌泰繼之鎬為之經營其功居多

王齊輿 字之孟寧海人與弟恕章俱登進士齊輿自幼敏悟日誦萬言為文操筆立就初官

崑山尉改秩知於潛再知崇安居官勤敏寒暑不移斷獄得情邑無冤民鑿渠星黃波溉田萬餘頃

百姓德之擢知郢州丁父贍憂起官上殿論安邊
 擇將足國裕民之道高宗大喜顧左右曰王齊輿
 南人似北議論可采既而臨安彌旬雨雪小民乏
 食相枕藉死齊輿轉對備言之上驚曰無人語及
 此卽命所司開倉賑給淳熙己酉出鎮武昌踰年
 移東川瀘南江東召除倉部郎中以直煥章閣致
 仕於縣東營雲壑園與親故爲真幸之會麤衣糲
 飯常如諸生宦遊所至有聲風流蘊藉與公卿酬
 唱語多奇崛
 年八十卒

黃宜

字達之天台人淳熙二年進士歷官至敷文
 閣侍制提舉上清太平宮卒贈金紫光祿大
 夫太子少師宜簡重端慤學務實踐喜推士類在
 朝多建明力排和議不爲權勢所屈時朱文公爲
 常平使行部至台囑其賑恤躬行阡陌計口給餼
 全活甚衆從兄早世事叔母如母撫其子如子死
 之日家無餘貲常推明濂洛之學訓迪後進
 喪祭用古禮鄉人化之子鍾通判溫州軍

徐廷筠

字季節臨海人童時輒有志行事父兄孝
 友備至居喪哀毀時秦檜當國科場尚諛
 佞試題問中興歌頌廷筠嘆曰今日豈歌頌時耶
 疏其未足爲中興者五見者尤之先生曰吾欲不
 妄語而敢欺君乎黃岩尉鄭伯熊代去請益先生
 曰富貴易得名節難存願安時處順主張世道能
 受其言迄爲名臣有詔舉人嘗五上春官者與岳
 祠廷筠適應格所親咸勸之廷筠辭曰吾嘗草封
 事謂岳廟冗祿無用旣心非之可躬蹈耶乃深衣
 幅巾放跡歸里一日巾車歷訪舊遊徜徉幾月歸
 感微疾端坐而逝年八十有五淳熙間晦菴朱子
 以常平使者行部特拜墓下大書以表之曰有宋
 高士二徐
 先生之墓

楊朴

字文之黃巖人淳熙八年特科在太學以春
 秋與王十朋齊名時號王楊紹興中申嚴挾
 書之禁朴爲公試榜首高宗
 書其姓名于御屏終承奉郎

商飛卿

字翬仲臨海人淳熙初由太學生登進士任無為軍教授累遷工部郎官時韓侂胄

柄國氣焰薰灼飛卿既至未嘗一造請踰月即丐去提舉福建路常平茶鹽事後擢監察御史以言

事忤侂胄罷為奉常請員外以秘閣修撰為荆湖南路轉運判官又改司農卿總領江東淮西軍馬

錢糧故有師漕治所合絨騎二帥畱鑰內侍號六司宴飲饋遺費動萬計飛卿以身率儉節縮浮苛

糧餉時以裕聞開禧中擢戶部侍郎侂胄將舉師嘗問餉計豐約飛卿以實告比調遣浩繁不克支

屬有旨裨飛卿軍前傳宣撫勞值金兵至以憂憤卒

張次賢

字思齋紹興癸丑進士授衢州別駕歷監察御史右正言兼侍講多所啓沃嘗撫古

今治亂之由為書二十卷名御監錄以進上每讀未嘗不稱善又陳恢復三策動中機宜尋遷左司

諫直言無避史彌遠怙權抗章數其罪凡九上彌遠銜之次賢不為動嘉定中擢殿中侍御史卒諡

文肅

王澡

字申甫寧海人慶元進士官山陰令一夕夢龍繞於堂柱次早乃稚子繞焉因詰之稚子

曰某太祖子德芳之後父避金難遷于越同寡母依舅氏以逋糧有譴拘至澡奇之撫之如已子值

史彌遠與楊太后廢濟王竑因鄭清之訪太祖之後遂擁立焉即理宗也時澡歸老于家理宗訪諸

廷臣誤以物故對理宗嗟悼親書德菴二字及遣祭至而澡果卒矣

錢象祖

字同伯臨海人以禮端禮恩補太府丞開禧間叅知政事兼同知樞密院事以諫用

兵之失忤韓侂胄意謫知信州大新學校一持上習為之不變已而金人大至寧宗悔不用象祖之

言致開邊釁遂以象祖知紹興府再除叅知政事進右丞相兼樞密院使復進左丞相終少保成國

公贈少師

王居安

太平人淳熙十四年進士省試第二人甲科第三人嘗為江東提刑司幹官轉國子

博士首言人主當以知人安民為要人未易知必擇宰輔侍從之賢使引其類民未易安必求愷悌循良之吏以布其澤歷知興化軍名丞秘書轉對論疆場事稱旨擢右司諫極論韓侂胄竊柄誤國之罪請肆市朝時呂祖儉以直言遠竄上疏鳴其冤會趙彥逾與樓燭林大中並名居安力言彥逾奸邪而與燭大中同升是邪正并用也疏已具有微聞者除日夜下遷起居郎崇政殿說書於是居諫垣纔有八日耳既供職即直言奏曰陛下特遷臣柱下史豈非欲使臣不得言也一史得直前奏事祖宗法也遂極論之帝為改容中丞雷孝友論其越職詔奪一官太學諸生舉旛乞畱踰年復官知隆興府盜起郴黑風峒江右寇亦起居安受命往討次第討平刻石記功徙鎮襄陽嘉定中與魏了翁同名遷工部侍郎中朝皆動色相賀尋以寶謨閣侍制知温州終龍圖閣直學士卒贈少保史

稱居安宅心空明待物不貳掃除羣邪

以匡王國其志壯哉有方巖集行于世

郭磊卿

仙居人嘉定七年進士歷太學博士樞密院編修兵部郎官尋拜左正言兼侍講纂

修國史終朝散大夫寶章閣侍制初理宗微時與鄞人余天錫善既即位遽擢執政磊卿上言鴟鴞入林鳳凰遠去陛下欲興至治早夜計收復顧使狎邪柄國是却行求前也不報磊卿論益峻竟罷天錫或勸其宜稍柔曰上不才使厠朝班知而勿言不重負上耶彌遠子嵩之繼相滋不法具疏俟名對奏之為嵩耳目所得亟除以起居郎磊卿憤不獲言徑出國門求去遂悒悒而卒上念之特諡正肅磊卿與杜公範徐元傑劉漢弼等稱端平六君子天下想望丰采相繼以歿天下悲之見

宋史

葉夢鼎

東倉人以太學上舍嘉禧元年兩優釋褐第一授信州軍事推官攝教事講荒政歷

遷著作佐郎在兵部轉對言外有窺邊之大敵內有伺隙之巨奸奇袤蠱媚于宮闈熏腐馮依于城社語甚切直權知袁州轉運司奏罷和糴米三萬斛丁本生母憂免喪拜司封員外郎轉對言陛下惑左右之讒說例視言者為好名言稍犯人主者不顯罷則陰黜以國子司業名陞對言國論主平江西義倉不可待申省而後發等事歷祭酒兼權禮部侍郎陞同修撰兼侍講丁母憂服除差知贛州丁大全柄國欲挽夢鼎登朝辭之因改知建寧隆興名為太子詹事遷吏部侍郎兵部尚書改吏部拜端明殿學士同檢書樞密院事編修武經要略兼太子賓客歷封寧海伯臨海郡侯進封公丞相賈似道欲造關子行公田法夢鼎以為厲民而止進同知樞密院事權參知政事理宗崩議太子即位太后垂簾聽政曰母后垂簾豈是美事乃止進參知政事加食邑復授資政殿學士知慶元沿海制置使建濟民倉以備饑歲造驛舍以待賓旅再召為參政進右丞相兼樞密使夢鼎歷任內外

所至咸有讜言實政後扼于似道不得行其意故轉運使王价遺澤事似道為恩不已出罷省部吏數人榜其姓名于朝夢鼎怒曰我斷不為陳自強復求去似道之母讓似道曰葉丞相安于家食汝強與以相印今仍牽制至此似道悔謝冊楊貴妃宰相無拜禮吏贊拜夢鼎以笏揮之趨出明日乞還田里詔勉留之時有詔免諸州守臣上殿奏事夢鼎言祖宗朝牧守赴官必令奏事蓋欲察其人品及諭以律紀愛民今咫尺天顏而不得見甚非立法之本意尋進少師引杜衍致仕單車宵遯乃授觀文殿學士判福州進封信國公不拜復名為少傅右丞相扶病至嶺縣迄還山疏奏扁舟徑歸使者以禍福告之曰死生事小廉恥事大萬毋可回之理似道怒乃令致仕後二年卒年八十有文集行世

祀鄉賢

陳宗

字正夫堅之子太平人寶祐四年侍御史丁大全既逐丞相董槐益恣橫用事時宗為太

學生與黃鏞陳宜中林則祖曾唯劉黻上書共攻之大全怒嗾御史吳衍劾之削其籍編管遠州時號六君子後宗起廢官至治中竟以不善取容罷去

舒岳祥

寧海人寶祐進士終承直郎初授奉化尉葉夢鼎薦起之憂去故人陳蒙總餉金陵

辟入幕府與商軍國之政蒙以讒去沿江制閩爭辟之皆不就尋有欲畱岳祥于都訂論溫公通鑑事成薦之經筵岳祥將從之與門人劉莊孫載書冊以往時賈似道當國以岳祥尚氣簡直將盤折抑挫而後用之徑棄去不顧踰年賈敗始知岳祥審去就之義弟斗祥賦性文雅好學尚禮淳祐進士官至長洲令

賈涉

天台人性好古慷慨有大志以父任高郵尉授淮東提點刑獄兼楚州節制本路京東忠義人

兵金人不敢窺淮東者六七年涉傳檄中原以地來歸及反戈效者朝廷裂地封爵無所吝乃厲諸將圖未下州郡擢太府少卿制置副使兼京東河北節制辭疾既還乃以所獲京河版籍及金銀牌銅印之屬上于朝卒淮人思之有泣下者贈龍圖閣學士光祿大夫女理宗貴妃子似道涉死二十四年而似道柄國

王賁

天台人介而有守鄉俗化之王實翁創上蔡書院金華王魯齋為堂長賁具古冠服來謁

及魯齋歸乃請賁代領其事書撰心說圖以自警及卒無以殮門人爭經理其喪至葬道有多岐一大而遠一小而近門人請其婦婦曰先夫平日不會由徑不可違其志聞者歎曰有是婦哉君之賢益彰矣邑祀鄉賢祠

董楷

字正翁臨海人御史亨復之子戶部侍郎樸之弟也登文天祥榜進士初為績溪簿直寃

獄賑饑僅修城捍水擢守洪州有惠政終吏部郎楷從潛室陳器之得朱子再傳之學所著有克齋

集陳朱易
行于世

王珏 字叔保號達觀父榮為獄吏以活人為務太

潛漬血杖中行杖即見不致重傷嘗置幣于臥處

每活一人投一錢滿則更置之苦無嗣一夕夢人

遺雙玉已而生珏遂以為名登咸淳戊辰進士授

國子博士德祐丙子權知本州事伯顏兵下與兵

部侍郎仙居陳仁玉集義民增陴浚隍堅壁以守

力不能支乃與郡章屬楊芳春大書忠烈二字于

門投左池以死元兵入欲殘其首從子賓泣曰叔

父死國忍復殘之耶乃衣珏冠袍據公座俟取其

首以去

張和孫 號哲齋臨海人文丞相自通州泛海過其

海艘移檄召募將取明州不果後張弘範入寇見

壁間檄捕得之哲齋曰吾生為宋民死為宋鬼遂

遇害

杜文甫 號南峯臨海人師事王叔寶登咸淳辛未

進士歷瑞安軍推官德佑初除國子博士

迄元代宋翰林學士趙與票薦于朝守令為勸駕

文甫自謂宋臣辭疾御史程文海奉旨召終不起

邵困 字叔魯臨海人咸淳元年進士歷本州教授

郡無與元敵台守楊必大率先稱降困與權知州

事王珏不奉旨伯顏以偏師徇之城陷火侵學宮

困端坐死

王甸 字伯俊居安從子太平人景定中為桂陽通

判時邕宜告警衡永既不支桂陽無城守州

守棄官走匿山中軍民警擾甸微知守匿所夜半

疋馬追及之力挽守出視事眾志乃定已復設立

木城修備戎器泣諭眾曰若寇難叵測吾決當

與爾共斃寇聞有備遂遁道人謂其有居安之風

高申甫 仙居人由武科除景陵令多
惠政元兵至率民力戰死之

鄭雄飛 仙居人幼以他事繫獄御史異之命題堦
下小松有云如今暫好低頭看他日參天

仰面難御史遽脫之端平二年成進士累官秘書
少監戶部左侍郎會朝廷議加派雄飛曰窮簷之

困極矣又重以無藝之征速亡道也上聽之乃止
景定中太學生金渭等請與縣尉吳諒同祀稱六

賢堂

鄭憲 仙居人雄飛姪景定三年進士歷官太學博
士德祐間元兵壓境奉母逃元兵追殺其母

號泣曰吾義當死國苟且竊旦夕生者母在則
然耳今若此負土葬其母畢遂雉經于墓右

顧玉文 仙居人咸淳十年武甲第一元兵至台父
被執玉文身以捍之頸被數刃與父俱仆

移時乃甦退居事
母孝養彌篤焉

元陳孚 字剛中臨海人自幼清峻穎悟為詩文援筆
即成至元中以布衣上大統賦署上蔡書

院山長考滿謁選世祖命梁曾使安南朝臣薦剛
中博學有氣節調翰林國史院編修官擢禮部郎

中為會副至安南世子陳日燿以憂制不出郊遣
陪臣來迎又不由陽明中門入曾與孚回館致書

詰日燿以不庭之罪且責日燿當出郊迎詔及講
新朝尚右之禮往復三書布天子威德直辭壯氣

皆孚筆也其所贈孚悉却之使還除翰林待制兼
國史院編修官帝方欲寘之要地而廷臣頗嫉忌

之遂除建德路總管府治中再遷衢州所至多著
善政秩滿請為鄉郡授奉直大夫台州路總管府

治中卒諡文惠有天游觀光玉
堂交州桐江柯山等稿行世

陳廷言 字君從寧海人舉鄉試授上蔡書院山長
舉進士除慶元路教授累官國子司業及

提舉福建學校事士多造就預修三史除集賢侍
講以疾還道錢塘時方谷珍據有三郡遂止寓宗

陽宮號蓮屋道人著書自晦尋以漁陽營田復召入議因上書極論時政之弊臺省奏其越職出知順昌謝病歸寧海時兩浙郡縣多失守廷言內撫遺黎外固防守以義結民兵捍禦有方修舉廢墜境內以安

林夢正

太平人博學能文與虞伯生揭曼碩為友以遺逸舉為溧陽教授未幾蘄黃寇起夢

正攝州事州陷遇害垂死罵不絕口今溧陽祀之

許廣大

天台人性至孝年十七父卒未葬值鄰火號慟抱棺欲與俱焚天為反風登元統進士授慶元路昌國判官其地接海人乏禮讓公興學校作岱山書院一時向風慕學者甚眾陞武義尹值水患漂民居躬率吏民築堤以捍之號許公堤廉能著聞調知鄞縣鋤豪猾平差役丈程限有訴訟必親辨析吏莫能售其奸夏旱步禱于甘龍潭泣拜良久龍于中流出爪挈巖石上雷雨大至

既足匍匐入城祀鄉賢祠

明葉兌

寧海人少敏贍不樂仕進元亂海內割裂兌精于天象歎曰元運當革濟者其江左乎時方國珍據浙東兌度其無能為深自晦匿間行金陵謁明祖於戎馬間獻武事一綱三日策太祖奇其言屏人命坐賜飲食欲畱用之兌力辭賜金帛遣還金華宋太史濂時以文學輔東宮見其書稱贊不已會謁告歸與兌同舟得所為文十餘篇細閱之謂兌曰先生居鄉郡文字贍蔚不在諸君後而獨見遺耶遂與定交浙東入版圖徵辟歲至皆不就年八十卒

張純誠

寧海人登元鄉書至正己亥謁見明太祖

陳取天下大計授和州同知庚子從擊偽漢陞廣德知州時江北甫定寇盜屢發純誠至民始定業吳元年轉江南提刑按察司知事行部至婺源見黃山之民病于茶稅卒奏免之洪武二年陞監察御史與修律令官制持義勁正中外肅然

乞歸省詔令集鄉郡之舊為方民兵者純誠奏曰臣侍陛下十年無絲毫惠及鄉里歸省而首集子弟為兵父老其謂臣何太祖動容稱嘆而止山東初定欲擇一管鹽筴者而難其人太祖曰前張某奏免黃山茶稅者不可耶遂以為長蘆鹽運使未至官卒

方克勤

寧海人通五經里中目為神童弱冠徧窮濂洛關閩遺書尤潛心于易至于天文地理制度名物之屬必析至當明兵取台州廼著國家興亡之故為書獻諸行在洪武三年應命為邑庠師越四年擢守濟寧郡毀浮屠以葺廟堂社各立學凡數百區隸學弟子籍者二千人兵後號為最盛歲暮轉戎衣于燕時禁役民舟別郡載以牛車雨雪牛僵死破產者十八九克勤獨從民請以舟就役郡城外故事築以兵指揮挾貴臣勢當五六月聚民萬餘治之民哀號即工克勤密聞中書即日詔罷之先是不雨克勤袒跣臥祠下誓不雨不還會大雨如注初壯官時戶僅三萬稅萬餘石

三年五倍其初永嘉侯朱亮祖將舟師數百艘北征水涸舟泥脅取五千夫決河否則以軍法論值日暮克勤不忍煩民泣禱于天二鼓天雨黎明水起數尺舟竟去八年春入朝上賜璽書褒美賜燕儀曹使踐舊職褒諭有加秋八月曹縣令程貢常以不職被笞心啣之上封事言狀御史助之謫役江浦會空印事起吏誣及之次子孝孺將草疏伏闕訴之而克勤歿矣年五十一克勤孝友天成晝之所為夜白于天其文章質而不華平而中理有汗漫集今祀鄉賢

詹鼎

寧海人性豪邁奇偉方谷珍聞其名強致之

鼎為草表謝辭恭而辨太祖見之曰孰為方氏無人乎乃舍不問更以谷珍為左丞鼎亦召至京師為書萬餘言須車駕出上之太祖立馬受讀

付丞相授以官後以刑部郎中謫陝西而卒

陶凱

字中立號耐久臨海人生時有大星墜簷前光耀臥室比成童讀書輒過目成誦性遲重

不妄言笑元末以明經除永豐學諭不受職隱居
 教授及明太祖起兵聞凱名訪見延上座凱曰將
 軍器宇軒昂襟懷豁達凱閱人多誠見所未見者
 因進望空取天下之策太祖曰何謂也對曰羣雄
 所據地是實地兵強未可與敵元人雖有地政衰
 民怨是空地也取之易也太祖大奇之後辭歸戊
 申定鼎金陵遣使奉書幣召凱授翰林編修洪武
 二年與宋濂等纂修元史三十八卷志五十三卷
 傳六十二卷又撰大明集禮以吉凶軍賓嘉及官
 服車輅儀仗鹵簿字學樂律六者為之綱凡十五
 卷上之太祖稱善命教大本堂授楚王經三年陞
 禮部尚書剖符封功臣議五等封爵據歷代故實
 討論詳定四裔之未歸附草璽書諭之又制鄉飲
 酒禮采周官儀禮及唐宋之制參定其儀定科舉
 式以取賢才諸凡創制禮儀區畫居多四年初會
 試天下舉人為提調官取中式進士吳伯宗等一
 百三十名初刻程文序其首又命撰大明樂章九
 闋凱又言漢唐宋時皆有會要紀載時政及起居

注紀言動宜令臺省府各置銅櫃簿錄聖旨及時
 政依會要編類為書使後之議事者有所考俱從
 之後以嫌坐微罪見殺翌日傷悼之贈

林公輔

名右字以行臨海人與方希直王元采為
 友洪武初任王府教授為文章善馳騁且

喜談古今豪傑事以自况許給事廷慎嘗贈之詩
 公輔笑曰吾豈文士耶廷慎曰子非文士豈有經
 濟才如古豪傑者乎公輔曰
 吾非豪傑亦不願為文人也

葉彝仲

名見泰號蘭生臨海人明師取台州見泰
 衣褐造軍門謁其帥語三日夜不休署部

從事及下永嘉取福建收兩廣皆有叅謀之力未
 幾使安南竭誠諭其君長來貢以功授高唐州判

官尋陞睢寧令終刑部
 主事所著有藍瓦集

鄭華

字思孝臨海人洪武丁丑進士授行人奉使
 川廣有聲已卯以註誤出典東平州幕庚辰

秋聞靖難師南下謂其妻蕭曰吾身不足惜奈親老汝少何妻泣對曰君能為國計吾獨不能為君計耶思孝乃稱疾尋醫攜家托其友無錫趙次進亟還東平時守佐俱亡去乃獨率吏民死守力不能支憂勞病甚水漿不入口者五日遂卒時年甫三十

許弼 字廷輔黃巖人治周易初以文名會天下紛擾集兵以禦寇尤能挽強命中及明興建科

目取士乃慨然曰聖天子在上可以出而仕矣中鄉試第二名通判沔陽州剽煩劇如庖丁解牛游刃有餘地也號雲中生宋太史濂為賦辭

於仲完 江西通志作仲寬黃巖人洪武間以聰明正直任永新知縣時南鄉龍仁和為亂千

戶所官幸捕盜為利欲調軍盡屠南鄉仲完力止之躬率鄉兵執其渠魁治之寇乃平南鄉人生子者多以仲完姓為名

張文琮 臨海人洪武中令新城廉而惠不事苛察雖當繁劇處之裕如民有爭訟諭令惕悟自新歲饑不俟請輒便宜發粟賑貸全活者眾遇旱積誠以禱輒應尤加意學校士風振起邑人頌其德焉

李至剛 寧海縣人祖洧號霽峯博極羣書宋末為黃巖州判洧生賢賢生至剛本名銅以字行洪武初以名經舉侍懿文太子初授祠部試郎中坐事謫戍邊未幾召還為虞部郎尋補河南叅議會河決調湖廣叅議太宗登極至剛來朝為楊士奇所器重擢右通政預修高廟實錄陟禮部尚書甲申冊立太子命至剛兼左春坊大學士初開經筵同解縉進講及修永樂大典多所裁定侍郎宋禮劾之降儀制郎中及縉被譖詞連至剛下詔獄仁宗嗣位復以為通政改守興化卒子原永樂甲辰進士官叅議

新江通志

陳公成

名季鏞寧海縣人洪武四年登進士初授

府責屬州墾闢荒田商乾華邠諸州虛具頃數公
成獨不報日民生尚窘虛增糧額以腴削之是毆
之流散也府不能強而耀州之民賴以無額三
轉廣東鹽課司提舉未任客死京師年五十四

王叔英

太平人篤學力行洪武丁卯辟仙居訓導

焉為講官議行井田叔英移書勸止已而名為翰
林修撰上資治八策識者知其為經濟遠畧靖難
師起奉命募兵廣德無何成祖渡江兵部尚書齊
泰來奔叔英曰泰貳矣令州人執之泰告之故乃
釋泰與圖再舉已而知事不可為沐浴具衣冠書
絕命辭于案云生既久矣愧無補於當時死亦徒
然庶無慚于後世遂自經死尋有詔治姦黨其妻
庾死獄中二女俱投井死或上其辭上曰彼食其
祿自盡其心耳置不問

方孝孺

寧海人克勤仲子至正丁酉始生之夕有

為小韓子年十四五侍父守濟寧歷鄒魯故墟慨
然嘆曰使吾得遇孔子同時若遲求輩豈多讓哉

曹國公李文忠一見待以國士宋濂以道德文章
推尊海內洪武八年克勤嘗註誤繫京孝孺乞以

身代不從克勤自獄中遣孝孺從濂遊孝孺持為
文上謁願受業濂一見大加賞異謂孝孺日喧啾

百鳥中見此孤鳳凰也即日館置左右日與討論
經史為文辭丙辰空印事起克勤沒孝孺扶襯東

還適濂亦乞身還金華復執經青蘿山凡四年盡
得其所學然孝孺下視文藝恒以古聖賢自期經

綸天下為已任辛酉濂坐累徙屬孝孺欲往省以
家難不可為文籲天願輸壽以延之壬戌上用學

士吳沈揭樞等薦詔徵至京入見陳說多稱旨謂
太孫日此莊士也當老其才以輔汝光輔太平足

矣太孫素重其才名賜食東宮待以賓友禮諭歸
孝孺益杜門纂述會仇家劄連孝孺械赴闕下太

祖立命釋之壬申復辟至京上方重賞罰以孝孺志存教化謂左右曰今非用孝孺時乃除漢中府學教授由是南人皆知向學甲戌蜀王聞其賢聘為世子師遂名其讀書之齋曰正學字其子愈曰師韓故當時蜀治依于禮樂諸王國莫比焉丙子徵入典試應天府丁丑閏五月太祖大漸遺令必先名孝孺建文即位馳驛召之天下莫不以王佐責望旦夕成功而用事者忌之乃止戊寅擢翰林博士己卯遷侍講直文淵閣日侍左右備顧問尋定官制改侍講學士為文學博士以孝孺為之是時修太祖實錄及類要諸書皆命孝孺總裁朝廷大制作皆出其手將相所行必咨之時議削諸藩孝孺與其謀北師日迫孝孺知事不可為畫策堅守誓死社稷成祖即位欲詔天下問左右誰可草詔者廷臣以孝孺對遂使人擁之入孝孺衰經杖哭聲徹殿陛左右授筆札孝孺大批數字投筆于地且罵且哭曰死即死耳詔不可草上大聲謂曰汝焉能遽死朕當滅汝三族孝孺曰便十族奈何

及逮其宗枝及九族盡滅之孝孺變罵不止大怒命抉其吻剔其舌孝孺猶嚙血犯御座磔之廖氏二子拾其遺骸殯之聚寶山麓時年四十六復收其妻使者至門先自縊死悉燔方氏墓以次捕其族黨至輒不屈乃盡誅之死者八百四十七人謫戍絕域者不可勝計

葉伯巨

寧海人宋相夢鼎四世孫性倜儻有奇才居父喪哀毀嘔血為人耿介不能藏人短

人知其無他亦不之恨洪武初以邑庠生入太學會詔諸生分教河北子弟伯巨得平遙縣諸生愛之如父兄九年星變求言伯巨即為書言三事曰分封太侈曰求治太急曰用刑太煩今四方已平而不務以寬御之視誅殺人如螻蟻欲以圖治難矣夫圖治于亂世之餘猶理絲于棼亂之後緩之則端緒可得欲速則膠結而不可理此二者人皆知其不可然非敗之根也所謂分封太侈者天子畿內地止千里而燕秦晉楚踰千里之國以封未達事之王無事則易生驕佚有事則易為僭亂此

人所謂患難見者也語甚切直詔繫刑曹問狀庾死獄中無子今祀鄉賢

王琦王敏

寧海人與郭士淵皆以文名初宋太史見方遜志文歎曰真奇才也繼見琦士

淵文喟然曰吾道台矣林公輔嘗因太史之言評之以為方之文如春氣方至津液之色充滿廣宇飛潛動植各有生意郭之文如蒼鵠摩空飛縱東西初無定適而俊逸之氣自為人所畏王之文如月墮澄江上下一色淨絕垢氛清明之氣可掬也琦後以事謫戍雲南弟敏氣剛不與人欵狎讀書至忘寢食嘗偕友讀書館中夜半隣女叩門求宿甚哀友欲納之敏擊門厲聲使聞于女竟去分教太原忻州暇日與騎將習騎射邊將奇其才而苦其清介欲汚之名使飲酒幃女妓于別室酒酣納敏大呼跳門出乘廐馬以還諸將驚謝懿文太子一日謂宋太史曰世道日漓人其無古若者乎太史以敏對太子稱歎曰何異魯男子也後嘗督運舟川峽悍急行者多舍舟登陸為自全計敏日督

事君命也何以陸為且舟失累人已獨安平後他舟覆溺甚眾陸行者皆獲譴敏獨不坐遷監察御史未幾以

例免歸

張機

字士璠黃巖人貢入太學嘗持部檄督宣歙等州笙竹謝絕賂遺楊文貞公士奇聞其名

以語祭酒李文忠公時勉文忠歲割俸贍之授定州同知解內蕭然如僧舍內艱歸再起涿州其廉介如治定時奏減荒地稅民甚德之秩滿告歸行李蕭條老稚擁泣不得行寮案醵贈以金不受

鄭士利

寧海人縣諸生與兄士原游學有名洪武九年天下考校錢穀策書空印事起凡守

令署事者皆置之死佐貳以下榜一百免死為軍丞相大夫皆知空印者無他罪莫敢諫適星變求

言士利乃為書數千言極諫上覽書大怒詔丞相大夫雜問誰教若為必有主謀者士利笑曰吾業既為國家言事自分受禍人誰與我謀辭卒不屈得免死輪作而竟殺空印者永樂中累官翰林院

編修

盧原質

寧海人母方氏孝孺姑也原質問學得于

修以辭翰為上所寵任乙亥除太常少卿以弗與

南郊左遷溧水丞單車赴任摩煦撫字不屑於簿

書期會而趨事赴公者以後期為恥尤存心教化

大修孔子廟後以他事坐逮者民數十百詣闕言

丞廉平狀多感激流涕上遣還明年又以實徵事

坐逮民復請時天下吏坐實徵者以千計詔特還

溧水丞餘皆抵法永樂初為太常少卿

坐方禍不屈族其家與弟原朴皆論死

石允常

寧海人甲戌進士授行人陞河南按察司

奉旨內官無娶婦事竟坐誣奏收獄未幾民有訟

其冤者事白復坐憲司官管有司事謫州同知病

歸囊無一錢人稱石清潭云先領河南南時詔廢周

王府綿羊宮室沒官允常實董其事永樂元年

周府追究前事被逮過常州有憐公貧斂銀贖聞

之夜遁去至京各官追綿羊五十隻罰米六十石

得復官惟允常等五十人義不從謫戍良鄉

六年歸省過金陵舊宮痛哭成疾不食而卒

夏迪

字廷簡天台人性孝友洪武丁卯中鄉試戊

辰上春官入胄監卒所業庚午授溧陽縣丞

邑遞年丁水滂其糧里有鬻妻貨子者迪閱之乃

勸借于殷實巨家得米十萬七千餘石先足官賦

次贖其子女以歸咸德之調福建懷安縣丞薦陞

大理左寺副凡審決一秉至公文皇即位陞吏部

文選司員外郎轉本司郎中仁皇試以太極論褒

美有加拜河南左叅政有妬其能者交訐陰私詔

繫獄勘仁皇憐其無辜請命于行在宥其罪從隆

平侯分理庶務尋授兵部司務越四日召至文華

殿諭以戶部田賦不清用為浙江司郎中不數日

清理明晰尋拜四川左叅政時朝廷遣使採辦木

植踰越歲時厲氣盛行民多夭折迪因入覲奏蒙

齋勅寬免軍民歡聲如雷調江西左叅政仁皇即

位遣使名至拜都察院右副都御史已領詔督常州府稅糧先是左府困于水災廵徧名鄉之巨室告以陰騭事發倉撥廩得米六萬餘解以充濟公私郡民全活者甚眾未幾遘疾卒于金臺

盧迥 仙居人洪武間以貢入太學元夕太祖微行未意其為上也曰客何問家二大人白髮紛如遙在天涯安能樂此耶與語久之上悅詰旦召對復稱旨授戶部主事累官戶部左侍郎建文四年燕

兵起與郭任主抗禦之策京師陷抗節不屈延頸就刑聞者壯之

郡邑俱有祠

鄭恕 仙居人洪武間貢寧波知府禮聘為鄞縣訓導未幾陞蕭縣令燕將王聰攻蕭恕率眾拒

守矢被體如蝟毛不少撓旬餘城陷聰說之降恕奮然曰縱貴極人臣詎從逆耶遂死之後被族誅

一女不污死嘉靖中與盧迥同祀于縣稱二忠又與方正學等同祀于府稱八忠女亦有四烈祠

王一寧 名康以字行仙居人年二十琴書詩翰皆絕人獻陵在東宮聞之名試稱旨遣肄國

學十八領應天鄉薦登進士授工部主事蒞瀟湖廉介自持以文名召見尋轉吏部稽勲司主事薦

入內閣輔太子改翰林修撰陞經筵侍講正統改元兼修宣廟實錄兩主南北京闈鄉試一典會試

進禮部右侍郎督餉湖廣時苗蠻蠢動運道不通一寧擘畫有方不勞而餉足回部轉左侍郎兼學

士召入閣辦事進太子少師一寧歷事四朝賚賜甚優襟度坦彝休休有古大臣風卒贈太子太保

禮部尚書諡文通有集二十卷門人李夢陽為之序

章朴 寧海人幼喪父侍養母蘓氏至孝永樂癸未領鄉薦甲申三月上臨軒親試朴居二甲授

庶吉士與曾棨等二十九人就文淵閣讀內秘書先是方孝孺死難同邑林嘉猷鄭公智皆死獨居

深念未嘗不扼腕傷悼竟以收藏方集為寧郡序班揚善所構上怒逮朴時弟宗簡相隨號泣擊登

聞鼓願以身代併逮之朴言孝孺効忠蒙戮其文章大抵明先王之道未宜深罪法司以聞上益怒命戮于市朴顏色無異祀鄉賢配享方祠

陳遜字廷嘉號逸菴臨海人永樂戊子鄉試已丑會試皆第一辛卯殿試以禮樂刑政為問執政見遜策驚嘆及進呈成祖覽之親批曰骨月誤

寫月字殊夫不敬可列二甲授翰林庶吉士擢檢討尋奉勅纂修五經四書性理大全參攷諸儒微辭奧義條入以補經傳總裁胡穆公深稱其有卓識未幾坐郎中盧信事繫獄久得釋杜門十餘年

足跡未嘗入公府時郡邑有用刑嚴峻者正辭以告遂易以寬執政薦擢廣西按察司僉事尋改督學江西至則日與諸生講學務以見諸行事為先

闡明周子輪轅之說禁革淫祠甫三載遂乞休人服其勇退焉卒于家年八十有二葬之夕有星殞其墓祀鄉賢嘉靖時御

史周汝昌復請建特祠

朱思平字廷準天台縣人行中子由太學生中京府試第六會試為劉三吾所拔將冠多士以五策多中時忌而止除中書舍人建文朝命為翰林院侍書與宋懌劉彥銘黃淮等日侍左右以備顧問多所啓沃上御經筵問朱陸同異答曰摠是反求吾心建文時親老乞歸省靖難時在籍聞變長號涕泣作哀君王詞四首思平儀表清挺于勢利澹無所好為文敏瞻典則書法得歐陽率更之體詩詞奇拔解大紳稱為李長吉流亞

陳祥字從儉天台人永樂甲午舉于鄉授南昌府學教授陞工科給事中奉詔覈諸衙倉糧綜理周密人不敢私漢庶人叛隨楊文敏公征討有功又奉命與平江伯陳瑄選調江北軍吏垣李培言事忤旨免官祥上疏力救後

楊文貞等累薦以觸近侍歸

許敬軒號南湖天台人永樂甲午鄉貢遊國學以才華敏瞻選入翰林與修大全諸書推禮

部司務陞儀制司員外宣德庚戌詔舉近臣優于民牧者以軒與况鍾九人應得閩之汀州並假璽書至則興學校勸農桑開常平倉以濟貧乏均徭役以鋤豪強以賢良方正薦程原慶朱振等于朝以貪殘虐民劾祝永昇等五人逮治問罪郡內大治卒于官行李蕭然士民爭賻之延途設祭

李茂弘 太平人毓之子永樂乙未進士授刑部主事勘獄閩藩時論稱其有為有守陞考功員外郎冰蘖之操終始如一大臣爭論薦之年六十即乞致歸土木之變李文達嘗語人曰往正統間李先生嘗言可憂謂君臣之情不通經筵進講文具而已抗章引疾去乃今先生言果驗一統志稱尚澹泊不慕榮進可謂得其生平之概云

魯穆 字希文永樂丙戌登進士第賜歸屏絕人事兩淮鹽法監給龍江抽分竹木局薪炭所蒞皆冗務而綜理周密吏不容奸外艱去哀毀逾禮服除

拜福建道常州巨商屬治當斬斬鄉人居京師胡姓者懷白金二百兩乞減其罪穆曰汝豈不知我耶竟致之法洪熙改元秩滿陞福建僉事泉州進士李思義調官廣西妻吳與富民林肆中表常私焉肆中途謀殺思義吳歸肆遂納焉穆至廉得其情擒肆與吳一訊服正其罪漳州民許某家裕無子以姪為後既而妾生子托孤于姪及許子長其姪言子實非吾叔出也逐之奄有其貲穆至漳妾攜孤言狀穆取孤別置之召父老問嘗識許某者得數人問曰汝識其子否皆曰未嘗識也乃于市集諸小兒密以孤子雜其中令諸父老別之諸父老指曰此兒甚類許某即孤子也事遂白悉歸其貲晉江縣有陡閘四所以蓄洩水溉田千數頃民賴之為豪勢所專歲旱民不能得水訴于穆執專利者械以徇眾民皆驩呼鼓舞英宗嗣位大臣薦其治行驛召拜都察院右僉都御史正統二年卒既卒幾無以為殮特賜諭祭仍給舟歸其喪

趙季通

天台人由教官舉任吉安永豐知縣調漳
州龍溪寬厚愛民民甚戴之永樂初與修
太祖實錄書上除國子博士陞司業調北京國子
司業簡為趙王府左長史宣德二年七月卒季通
端厚和平操守堅確有政事才隨事規益委曲盡
誠侍講讀必推理以驗諸事多所開悟王甚禮重
太祖仁宗皆深知之當時論親
藩輔導之良季通為國選云

徐善述

天台人遂于經學且工為詩以薦授桂陽
州學正持身廉慎士子欽之秩滿陞國子
監助教仁宗為皇太子時簡入宮僚為左春坊左
司直郎每作詩使善述指摘數過乃已書睿制以
賜之善述亦盡心不懈於文事多所啓沃仁宗每
見聽納陞右贊善以疾卒于官為入淳厚質實學
識端正耿介恬靜不為阿附仁宗即位追念輔導
功贈太子少保諡文肅命有司立祠墓側每歲春
秋祭之

杜寧

天台人宣德丁未第一甲第二人歷翰林修
撰侍講遷南京兵部侍郎土木之變人心危
疑寧與于忠肅公謙建議立郕王監國社稷賴以
復安者寧與有力焉居官清介人不敢犯工文詞
所著有樂全集及
邑志崇祀鄉賢

范理

天台人少穎悟甫踰冠中宣德乙酉鄉試第
一明年會試第二知江陵縣先是民累歲負
租至十四萬石民貧不能償乃名將卒家之佃號
畸零戶者諭之曰世言戶役既佃田立戶而免役
可乎遂定其等各出募役之米負租畢完甫七月
以卓異聞于朝少保楊溥薦知德安府時溥子來
自石首備言所遇州縣餽遺之厚惟江陵縣獨否
故有此薦隨州民四百家田為楚府護衛所占猶
輸租理備奏盡歸其田超陟福建布政使尋改貴
州貴州草創即驛為署理奏徙貴州前衛于他所
以其地造司數百楹不擾而就土官無貲弗襲職
者十五六理悉俾襲秩滿擢南京工部侍郎南京

歲久凡百皆做葺造之費不欲煩民廼請易蘆場之新葦抽分局之腐木碎炭內府之庫舊貯布帛通售銀得萬兩又請南畿獄囚贖者隨葺造所需而納于是自郊廟宮殿內外諸署城樓街表或造或葺凡八千間皆以次成而民不知又奏各處饋南京糧者自船抵倉每米石費三斗請兵就其船人支三月之餉官取費米歲可十萬而以備賑貸從之尋轉南京吏部右侍郎考滿赴京途遇疾卒

李匡 太平人宣德丁未進士授太常博士遷御史彈劾無所避奉勅錄囚陝右平反數百人已而代巡江右時楊少保士奇柄國其子稷暴橫鄉里匡按其不法事百餘逮械詣京調四川兵備副使平播州蠻之亂擢僉都御史巡撫四川許便宜行事適敘州蠻亂又討平之尋罷歸且十年宣府獨石告警起匡巡視宣府備禦有方又邊事以寧璽書褒美賜白金文綺以疾致仕

陳員韜 字從熙號勿齋臨海人自幼穎異矻矻類老成人受業于逸菴陳公之門登宣德庚

戊進士授江西新城令藩憲交薦宜守一郡當道以非九載例格不行改知永新甫兩月禮部聘典壬戌會試竣事擢監察御史正色直言不避權貴甲子巡按四川黜貪酷獎廉能辯釋諸司死獄四十餘人陞廣東右叅政未幾轉左布政使壬申會勦漳寇邁疾不起年僅五十有四士民莫不洒泣居官踰二十年囊無

贏貲人稱其廉介

侯潤 字仲璣號省菴臨海人自幼與陳勿齋齊名同薦于鄉登宣德八年進士擢禮科給事中

對糾駁有聲稱正統乙丑校文禮闈首取商公

鳳陽行間復劾振罪尋改知和州及振敗議將柄

用聘司順天鄉試檄至適以疾卒縉紳咸痛悼之

平生孝友尤篤嘗請分祿代養所減年壽母讓

業以厚同氣所著有詩書啓蒙省菴稿藏于家

侯臣 字仲敷與兄仲璣同登宣德八年進士任刑科給事中以忠直著聲已未元旦與兄聯班

朝賀時上有大小侯之稱歷官河南布政築河堤置水閘中州人立石紀功所著有青瑣薇垣等稿
祀鄉賢祠

趙鼎 字廷九黃巖人宣德丁未會試第一性篤孝官也澄江之水清者浹日時人以擬杜清獻既而天沒論者惜之

徐簡 字易道黃巖人新之孫正統壬戌對大庭欲置狀頭其策有云賈生遇漢文而欲為痛哭流涕臣獨病其激公孫弘遇漢武而曰水旱堯湯不免臣獨病其諛當軸者嫌其剴切落二甲第一終吏科給事中

許端宏 名恢以字行太平人博學能文正統戊午西鄉試狀元彭教學士張元禎皆出其門攝篆遂

溪都指揮有求于富商弗遂誣以通寇端宏白其冤釋之都御史韓雍出師端宏隨征命作露布倚馬而成夏埏為巡按其受業子弟也以師禮見分俸資之不受

夏埏 天台人景泰辛未進士擢御史巡按廣西首除奸貪息盜賊通錢帛民皆便之再按福建天順未用薦者擢廣東按察使廣東有師旅之命守城兵不足取之民埏曰誰獨無父母妻子而今舍其親以扞人之親奚罪哉民皆感泣而去成化初擢布政使尋遷江西未幾遂擢右副都御史巡撫四川四川通蠻獠歲多劇寇北至以楊兒捷聞上寵賚之立互知會捕法賊得以不熾古州苗以萬數徙居爛土幾年矣有仇播州宣慰者誣為導引將逐之埏亟奏曰制馭苗蠻當如虎狼其靜也若棄之使不懷疑其動也必馬之使不為患今靜而故使之動何哉松茂叅將請益兵曰將不在兵兵不在眾揀精銳四千八百人往更之而一無所增意有所不合輒引病歸以疾卒

魯崇志

天台人穆之子兒時聞家學已屹然有自立之志景泰甲戌成進士授吏科給事中

彈擊不避權貴上嘉獎之天順初奉勅齎銀數萬兩給賞邊戍防範嚴密下無敢欺戍者皆蒙實惠時武臣曹欽犯闕待漏闕下駭其事即馳馬與一偏裨格鬪大軍尋亦合而曹就誅矣癸未陞南京太僕寺少卿徧歷州郡釐其宿弊不數年馬遂蕃息而民咸稱便成化癸巳陞應天府尹先是七邑民阻饑通賦數萬石為勸貸以代之輸而賑其貧者中人王敬怙勢以鹽二萬引懇鬻規重利厲色拒之壬寅九載秩滿加正二品祿仍掌府事癸卯終于任遣官營葬仍諭祭如禮

黃孔昭

太平人名曜以字行登天順庚辰進士授工部屯田主事屯田號濁曹孔昭獨持以

正為同僚所怨嗾吏誣奏之後竟得白其僚坐是落職而孔昭譽益起歷遷吏部郎中時選曹率引嫌謝客孔昭獨延見諮訪得其人乃薦天官鄉人莫敢干以私擢南京工部侍郎署尚書事深別宿

弊如恐不及先是沿江諸郡蘆洲咸屬工部資營繕多為豪勢家所侵孔昭稽籍悉歸之官有詔令大臣舉堪任方面官孔昭舉知府樊瑩及致仕僉事章懋時稱得人嘗兩以吏部薦不果然物論咸以樞衡望之吳文定公嘗稱之曰昔毛玠仕魏為東曹掾所舉皆清正之士今觀黃定軒為人蓋近之嘉靖中贈禮部尚書諡文昭

陳選

字士賢號克菴臨海人員韜子髫時有大志天順庚辰遂魁天下拜監察御史巡按江西

不事威辟而官吏相戒莫敢犯憲宗嗣位上疏力請追復直諫之士而劾大臣侍進者數人尋督學南畿子視諸生身代條約浮靡一變歷遷河南按察使尋以憂歸服闋擢廣東左布政使閩有賴克哥等三十九人漁于海風漂舟抵潮陽守者獲之以通番論又邑民劉馬住等十九人被誣為盜選察其寃咸釋之中官有弟冒為武職逼娶娶婦乃正以法而歸婦于其家提督市舶司中官為春倚

進貢為奸利役戶苦于供需選特奏減三十人又以番禺令高瑤獨能與抗作獎賢文以勵之番人馬力麻與海商私通販易詭稱蕪門答喇國使臣市舶利其貨不問選察其偽禁之時又有撒馬兒罕使臣船六灣以獅子入貢浮海還國云欲往滿刺加更市獅子選言此西域賈胡圖利耳使墮其謀必貽安南諸酋笑市舶素利進貢被沮遏乃奏誣以他事仍覓選所嘗黜吏張褻者賂以誣褻不從市舶益怒并繫以赴京師廣兵民數萬號訴擁留選行數日病作及南安卒年五十八遠邇冤之褻至京備疏市舶誣織狀人高其義而服選感人之深如此選雖貴惟服先人故袍帶客至瓦器疏食相對欣然自河南聞喪還行李蕭然惟車一兩而已之官廣東騎驢出都門其清操有寒士所不能堪者以俸餘置田賜宗族立丹崖書院教子弟註文公小學及序宋史學道傳傳于世後毛給事憲始奏請贈諡奉旨贈光祿卿諡恭愍羅守僑復奏立祠祀之

余錢

字懋器臨海人性介直成化十一年進士知崑山縣推誠撫字崑多水患設法疏築事不

勞而集政舉大要民甚德之擢監察御史去之日行橐蕭然在臺不避權貴巡按廣右地多瘴毒父老遮道請勿遍歷錢慨然曰吾不忍慮土瘴之自病而坐視人瘴之病民也因出瘴說以遺之還京以疾卒于途年僅四十有九

郭紉

字仲端臨海人成化十七年進士知績溪縣以廉幹聞擢監察御史風裁凜然正德已巳

以山東叅政掌順德府事歷改安慶介潔賢能之聲達于上下迄致政歸杜門如寒士其去官也行囊減于其來御家清約僮僕或不能堪有逸去者

陳世良

字崇之號青嶼臨海人成化癸卯薦于鄉登丁未進士授樂安令邑勇悍成風世良

恩以撫之威以震之宿弊盡革內艱去服闋補南和令下車卽新先聖廟嚴諸生教條親為講解時

考較以勗其成表宋廣平里以勵士風築堤以障
 汚田數百頃鑿渠三十餘里引澧水以溉高田遇
 澇則洩而歸之河民受其福置預備倉糧以萬計
 請減牧馬場歲徵租銀舊額之半鄰封並受其益
 逋逃復業當道交章薦舉擢監察御史時逆瑾干
 政抗疏言之為瑾所忌正德二年遷南京大理寺
 右寺丞未幾以事罰贖米三百餘石至轉貸於人
 完納瑾敗勅廷臣起諸被瑾抑者首擢為大理少
 卿六年拜右僉都御史兼管操江憲度振肅適流
 賊猖獗悉心防禦申明號令所至克捷屢疏乞歸
 杜門却掃正德十三年起應天府尹未

蔣顥

字思誠號介石臨海人父鏞學行端方人稱
 純菴先生以舉人署南靖教諭顥幼承父訓
 成化丁未成進士授南刑部主事熟諳律例遇事
 迎解丁母憂起復陞本部員外郎轉湖廣僉事分
 巡武昌道吉府儀賓殺人立抵以法鎮閩張怵為
 劉瑾腹心有衛指揮張青索軍人財不遂囚死其

父又蘄州衛指揮王欽以貢錄毛龜取部下二百
 餘金顥廉實兩置之法二指揮重賄怵為請顥不
 為狗弁答其投刺者怵大怒曰蔣監司縱不為怵
 地獨不念劉公耶密白之瑾瑾諷當道媒孽罷官
 顥具疏辨析延臣多直之顥歸後怵復以遠年積
 案移參罰米二百石行本省臬司追取顥家故貧
 有司為代輸顥入石塘方山力耕自資幾十年瑾
 敗朝廷理顥前疏晉階三級致仕家食五十年居
 止數椽自榜其楹曰為官三任僅置屋三間做人
 百年擬垂名百世嘉靖壬子卒年九十有五所著
 有達意錄
 祀鄉賢

柯昌

字廷言號確安黃巖人通經篤學領成化丁
 酉鄉薦授揚江知縣身先禮教不以稽會簿
 書為事白沙陳獻章嘗謂其生而民愛
 戴之死而民俎豆之咸嘖嘖以循良稱

蔡餘慶

字從善號瘦石黃巖人燉之子成化丁未
 進士性孝友惇朴初授中書舍人手不釋

卷為李學士東陽所重欲引直內閣輒辭陞南京
刑部郎中宜興江陰多勲臣田土小民被侵奏牘
累下餘慶執法不阿民賴以直陞汀州知府廉慎
自持遷福建鹽運使益厲清操秋毫無所私惟積
圖書數篋當道交薦有獨不廉于儲書之語陞山
東叅政未幾以忤中貴人歸林下踰三十年足跡
不至公門

張鎮字定國臨海人成化甲辰進士歷刑部員外
讞決明允聲稱甚著擢湖廣僉事激濁揚清

有埋輪風采又征苗有功陞通政司叅議忤劉瑾
奪職瑾敗陞福建布政在閩數年興利除弊僚家

肅服明藩入閩者
聲望以鎮為最

范綱字太和天台人登成化壬辰進士授兵部主
事擢武選司郎中時武臣皆結交中貴凌次

銓選綱抗顏執法羣奸側目陰誣以事出知濱州
別奸弊奏減解部軍糧七十石民甚德之事無不

舉巡撫奏治行第一秩滿赴京病
濱人思之奉其主于龔遂祠中

王中寧海人幼聰慧奮勵讀書日有新得成化丁
未進士授南京河南道監察御史監收場局

竹木上供犧牲俱有程限尺度及清理內帑錢鈔
賞給軍士一洗宿弊巡視京畿商旅稱便陞山東

按察僉事弘治中分巡遼東以邊事與大理卿吳
一貫等九人連逮至京孝宗躬親鞫訊中獨從容

疏對上怒釋第坐失奏左遷石屏州同知武宗御
極會赦陞同知南雄府當路以中素著清望特委

專理抽分人皆以為錢貨藪中益勵清操俸入皆
儲公帑及病革惟一老婢侍囑之曰吾一閨女也

今當歸勿污吾節言訖而逝昇喪歸至
杭盤詰者發其囊囊惟敝衣書卷而已

林霄五六歲時號奇童成化丁酉中應天鄉試第
七連登進士選入翰林陞給事憲宗以其秀

哲語洪亮特賜以品服出使暹邏在海外人皆危
之霄曰君即天也顧辱命是懼何足危已而至其

國竟以議相見禮不合遂不肯宣詔彼乃除館於西郊供帳甚薄公不屈遂憤憤成疾死其後副使行人姚隆竟以折節獲厚宴寶賂以歸上聞之竟罷姚詒錄霄子非為國子生

龐泮

天台人登成化進士弘治間歷刑科都給事中居諫垣十二年持論蹇諤武岡知州以事忤岷王王訐奏之逮繫錦衣獄泮率同列論掾并下獄直聲大著大學士徐溥上言言官為國盡忠而槩以為罪後有大利大害大闕失誰肯言者上釋之仕至廣西左布政以疾歸

夏鏃

天台人幼篤學成化丁未進士不樂仕進乞放歸弘治辛亥始赴闕奸人李孜省等亂政鏃上疏乞就近府教吏部尚書王恕惜其才不與先是庶吉士鄒智進士李文祥御史湯鼎給事中方向以建言直聲振天下文祥方從咸寧丞入兵部至是獄辭連及智等謫戍殆盡于是鏃抗疏救之因并論大臣蔽塞言路劉吉等大怒矯詔下錦衣衛獄治無所得釋之復謝病歸再以強起值火

篩入寇京師戒嚴人人爭議靖邊鏃獨以邊患雖可憂而土崩瓦解蕭牆之禍尤有甚者語極懇切章入不省除南京大理寺評事守備內監違例受詞復奏奪其權尋以母老乞終養不起嘉靖初詔起用竟以老辭年八十有三卒

盧濬

成化丁未進士初任工部主事擢刑部郎中恤刑南直出冤囚百餘人出知黃州府廢郡

中淫祠河鎮有景祐真君廟亦在廢中忽門皂為神所憑索筆題云吾乃張巡在世與許遠同時濬驚異詰以時事應如響廟因得存一日舟行江上會狂風起舟師大懼急呼楠木大王濬訊得故撰文投江中期三日必以木來屆期大集工俟于江眾皆竊笑須臾一巨木自樊口逆水昂首奔至濬命縛之登岸時值修葺學宮以為左柱江患遂息轉守南安邵武二府以耿介忤上司去易箒時自撰墓誌沐浴冠帶端坐而逝

王純 仙居人成化十七年進士初授工部主事會
王少保恕批鱗致仕純言恕社稷臣無容輕
 棄上怒命詔獄隨謫思南推官弘治元年吏部主
 事儲懽言王純以直言殉國乞置之風紀論思之
 地與其旋求敢諫之士不若先用已試之人報可
 當事忌其戇乃外擢湖廣督學使純較士先行誼
 抑競浮士類翕然向風未
 竟厥用而卒眾咸惜之

林克賢 太平人字一中鶚從弟成化丙辰進士拜
刑部主事轉員外陞福建按察僉事其在
 刑部治獄不為顧忌苛刻有阮成者錦衣也常以
 大辟屬克賢讞之知其冤白尚書陸公曰固知錦
 衣權重然殺人以媚人某勿為也卒從末減又吏
 部誣王宗穰投匿名書罪宗穰父淵嘗以言官獲
 譴眾咸曰非林員外莫能辯遂以屬之事竟得白
 其在按察力振風紀有要宦豪奴肆為并吞竟置
 之法巡按御史某舞文恣奸嘗面質其過坐是十
 年不得調嘗兩監鄉試御史欲以意黜陟人抗執

不從其勇於
 義類如此

姜鳳 字廷儀太平人成化丁酉舉人授舒城教諭
典試四川湖廣山東陞歸化知縣值歲旱奏
 減秋米六百石民頌其德判臨江築魚梁壩遷潼
 川知州時大兵征伐糧餉仰給于州鳳調運有方
 歷任三十六
 載宦橐蕭然

許崇仁 字一元太平人成化庚子舉人署河南寶
豐教諭聘典順天應天廣東鄉試陞清流
 縣尹政教兼施適潮有屬邑程鄉崇山巨壑群盜
 肅聚特設通判一員以才望推仁比至則簡士卒
 嚴號令民賴以安江閩寇熾三省出師會勦仁獨
 當一面躬擐甲胄深入險阻元惡次第授首以冒
 險得疾致政歸
 民肖像祀之

王鑲 字崇重太平人登成化丁未進士授南京工
部都水司主事清介目持本部員外郎以貴

近佑勢攬納旁午環持不可以例調知許州言者皆知其枉環不以爲恨至許求害人者去之本部黃尚書首薦且有名命以病作卒於官許人悲悼至有抱其孤而慟者

張成德

名浹號遜志仙居人以字行成化六年貢

許勿休進而問之曰若等願舉子乎曰然願多舉

乎曰然曰若父之願猶是也今日若于兄弟異日

若子於兄弟亦猶是也二人憮然媿悔後竟以友

于聞嘗作戒三篇月朔令父老申論之又創五經

書院延名宿爲子弟師捐俸資其費春秋久失傳

親爲講解聘分校黟闡陞通判饒州謝病歸優游

林下越十餘稔而卒

繆恭 太平人字思敬通春秋爲縣學生已而棄舉

子業攻詩文弘治初詔求直言恭以布衣上

書論天下事一曰保神器二曰崇正學三曰紹絕

屬四曰懷舊勳五曰廣賢路六曰革冗員首尾歷

歷凡數千言其曰紹絕屬者大略謂漢景帝立平

陸侯劉李爲楚王蓋思元王之賢封禮以續其後

也矧懿文太子功施社稷澤被生民禮宜擇賢宗

室封國以續其祀指斥忌諱皆人所不敢道者疏

入通政司官大懼遂拘留而劾奏之上亦不之罪

余寬

字仲粟號約中臨海人侍御史饑之後弘治

甲子薦于鄉正德辛未成進士授刑部主事

以才品轉吏部考功員外陞文選郎中嘉靖甲申

翰林部寺臺諫諸臣力爭興獻帝與國太后本生

二字不宜削于金水橋南伏哭帝命司禮監諭退

不去大怒命錄諸姓名收繫爲首者豐熙張紳余

元丁卯褒錄先朝建言死事諸臣凡三等其繫獄
戍邊斥死牖下如唐胄余寬等二十八人俱復職
贈太理寺卿
祀鄉賢祠

蔡潮 字巨源號霞山臨海人弘治辛酉鄉魁乙丑
會魁選庶常丁卯改兵科給事中戊辰分考

禮闈適逆瑾當事建議閱驗天下府庫虛實遣言
官中貴人雜出意在擊搏漁利潮奉擇詣閩惜元

氣存大體庚午轉右給事辛未遷湖廣僉事提督
學政乙亥轉貴州右叅議時清平苗寇據香鑪山

以叛勢搖全省潮至鎮遠賊圍城數重殫慮經略
誓死以守間道轉餉士皆奮勇先登竟賴蕩平自

鎮遠距省城凡七程岡嶺險絕旅行無所依止為
之十里創亭翼然相望壬申轉福建叅政閩山路

崎嶇相地遠近創立涼亭萬里林鹽田谿北嶺飛
鸞雲嶺一帶悉為康莊丁亥轉河南右藩兩河盜

賊充斥令郡縣道種榆柳木長成行賊騎難于出
沒薪蒸亦資民用未幾具疏乞休撫按交畱疏凡

五上乃得請潮襟度宏曠不立城府凡可以利物
濟人者為之無遺力卒年八十三所著有霞山集

今祀鄉賢祠子雲程
終刑部尚書另有傳

戴德孺 字子良號雙江臨海人登弘治十八年進
士初授刑部主事時劉瑾怙寵羅織縉紳

嘗欲以私憾籍都御史強滿德孺不從為力辯其
冤以此忤瑾謝病歸瑾敗起補工部權關蕪湖以

清節著出知臨江府時寧王宸濠反徵已著德孺
至即修城繕兵為備俄濠反遣逆黨來收郡符德

孺斬之以殉誓死守會贛撫陽明王公將赴閩取
道豐城德孺力請駐臨江以圖興復王公以臨江

近省南趨吉安集眾德孺據臨江以障逆鋒前後
三上書制府并移吉安守伍文定策其必敗王公

引五郡兵至樟樹鎮直攻省城臨江兵從永和門
梯絕而入宸濠從安慶回救逆戰敗之于東湖又

敗之于八字腦濠退保樵舍相距三日風逆戰不
利俄而風順遂以火攻破賊濠就擒諸將譁然爭

功德孺無一言班師返郡篋中惟筆劄衣裳而已
事定論功陞秩三級後以父喪歸嘉靖二年服闋
補雲南右布政事行至彭城遭風卒以御史朱節
言贈光祿寺卿又以少卿黃綰言蔭一子入監祀

名勳

秦禮秦武

臨海人俱文弟禮號樗菴弘治乙未會
魁令常熟直道正辭執節不貳先是貴

遊歸鄉縣則盛供帳郊迎禮一切貶削鄉貴有匿
罪人者命圍其家執治之歷官刑部員外陞福建
按察司僉事別奸蒐蠹稱為秦龍圖云武號噴峯
正德丁丑進士由行人擢御史直諫有聲嘉靖二
年應天等處地震上疏云近日以來或以養子而
冒闡豎之封或以內臣而奪司寇之職又云勅自
內出政府不得贊其詞法以私行六曹不能攄其
志經筵屢罷禱祀累修此天之所以示異也言皆
中切

戴乾

字元之號丹崖臨海人性至孝父珙素嚴毅
乾能得其歡心與弟聰深相友愛登弘治庚

戌進士初授宜春令循聲第一擢御史出按湖廣
激揚務合輿論人不敢干以私會湖南苗亂乾指

畫勦平將大用以病乞休屢徵不起家居
敦睦好施至今言仁及三族者必稱焉

周玉

字朝振號東湖臨海人弘治癸丑進士官祭
酒以逆瑾用事致仕歸屢薦不起時論高之

生平謙厚家居三十年恬淡自好曾修
臨海縣志年踰九旬而終崇祀鄉賢

侯緘

字世言號三峯臨海人正德庚辰進士初授
刑曹時有中貴下獄為刺請者盈案緘不之

視曰吾知有法耳既而中貴得名赦以緘能守法
言於上詔賜文綺旌焉歷官貴州布政使時思南

宣慰有讐慢者巡按欲召度詰之緘曰彼土官也
急之則生變巡按竟召而杖之其部噪至城下發

火露刃官司震恐緘曰彼迓其主耳非有他也白
巡按出之立階下禮諭而徐遣之卒不為變再遷

閩藩卒於官

陳器

號三石臨海人燧之孫正德癸酉解元甲戌進士授淮安推官持三尺不畏權貴郡有鎮

守總戎舊例丞以下咸以屬禮見器力爭於督撫獨與抗禮遂著為令陞刑部主事執法多所平反會武宗巡游儲貳未定器抗章奏請早選宗室之賢者養於宮中如宋仁宗育英宗故事言甚愷激尋以予告終養回里杜門却掃居家四十年誘掖後進終

應良

仙居人少稱奇童稍長以聖學為已任舉正德戊辰會魁憤劉瑾預政歸與湛甘泉王陽

明講明良知之理有語錄行世辛未廷試登二甲第七人選庶吉士時瑾雖誅闖燄仍熾復解組逾十載世宗御極用臺諫交薦起為侍從會議大禮不阿忤旨杖闕下尋奉使冊唐王悉却驢覬督學山東陞廣西叅政齋表北上張桂二老密曰北司成正以遲公良正色曰朝廷官爵奈何私許人乃

外陞廣東右布政無何致政歸

吳廉

字介夫仙居人正德九年進士授禮科給事中時武定壽寧二侯並貴幸廉疏聲其罪武

宗將幸西北率同官跪午門外懇畱三日巡按某不職徑劾去薦王守仁代之中貴畢真多受寧王金借孝行推轂于朝廉引祖訓叅駁事獲寢大駕還京上言請郊天策士追帝王之盛節轉戶科給事中值世廟嗣統首陳正君心開言路時經筵近端人四事嘉納之直聲大起為當事所忌出為四川叅議入境輒糾重臣之使蜀殃民者民賴以安有許遊擊某坐法當斬餽千金堅卻之既而覺其寃竟為減死許來謝絕勿與見未幾三疏乞休歸籜冠芟衣優遊雲蘿烟水間翛然也

張儉

字存禮仙居人為人倜儻有大節正德九年進士除工部都水司主事尋改南刑部員外

世宗議大禮儉抗疏爭且面斥桂萼廷杖濱死者再出為江西僉事豐城水溢親行視築民德之呼

張公堰調福建建寧道建寧兩衛屯田半蕪糧茂
 由辨賑軍攤賠不敷漸派幼丁屯旗不堪命舉
 男子不敢育儉反覆請蠲報可歡呼聲震里巷陞
 四川副使會銅梁盜熾儉親援抱鼓蕩平之陞福
 建參政持法廉平有一張八閩安之
 謠無何致仕歸所著有圭山稿行世

蔣泮 字良潔仙居人正德十五年成進士授工部
 主事權稅荊州別弊懲患悉蠲前陋規江陵

驛日餽支應銀泮行州令貯庫備賑陞員外督理
 倉廩中貴楊某素艷泮名希交驩泮絕不與往來

楊慚思中傷已而跡泮所為默然良久曰吾閱人
 多矣若蔣副郎冰心雪肝未數數觀也遷郎中奉
 使再如楚抵姑蘇而卒囊橐蕭然

無以為殮郡守胡纘宗經紀其喪

蔡德器 字重之號守齋黃岩人授竟陵教諭時大
 水民饑監司議賑恐有司乾沒命德器主

其事全活甚眾陞靖江知縣廉潔自持靖江故盜
 藪民浚河得金銀器盈車以一半來餽却不受當

道以能治劇檄署江陰武進二縣抑豪右懲奸猾
 境內帖然屬刷卷許御史行部通貨賂誣以事欲

逐之屈於清議不敢遂引疾歸行李蕭然見者泣
 下家居杜門埽軌足跡不入公府劉知縣贊桂推

官榮皆其門人也無
 一請託其高尚如此

汪憲 字尚鎰黃岩人領鄉薦任新淦教諭律身清
 介日與諸生講誦暇則俾習禮射士風一變

陞將樂知縣首束豪強立社學毀淫詞增先賢龜
 山祭田復忠臣穆公故宇庭無私謁獄空繫囚有

流賊將犯境憲披甲身禦之賊畏遁去百姓德之
 製銀甲以謝却不受命貯之庫至今名為汪公甲

以廉平課最陞寧州知州未至而宸濠變作憲冒
 險而進翊都御史王守仁竟平大憝未幾引疾歸

卒之日家無殮資
 詔從祀將樂名宦

蔡紹科 號龜厓黃岩人餘慶子弱冠領鄉薦授海
 州知州始至值旱蝗殫心荒政巡撫席書

奇之檄行旁郡為式陞寶慶同知與利釐弊數決
 疑獄為郡守所倚重尋轉福建鹽運司同知鹽司
 為利藪科冰檠自勵秋毫不緇擢知大理府首禁
 輕生之俗多所全活減繇役冗費數千金上官欲
 有所請夜懷金數百伺于途杖而遣之因榜于庭
 日公庭三尺法暮夜四知心居官凡三十年所至
 一惟節用愛民執法不阿以是不悅于貴勢坐罷
 歸官二千石服食器用如寒士至老手不釋卷有
 林謝諸先輩之風
 從祀大理名宦

鄭特

字汝英黃岩人璋之孫領鄉薦知崇明縣崇
 居環海中民以魚鹽為計蘆洲為產故事魚

鹽船戶皆有恒例動以干緡蘆洲則聽勢豪兼併
 特至首除恒例而歸蘆洲于編戶勢豪謂之御史
 被劾送部調用廷論寬之改特大縣以疾卒旅橐
 蕭然無以為殮黃學士縮何行人贊為治其喪請
 驛馳歸抵姑蘇崇民無老少
 咸哀痛之從祀崇明名宦

潘穎

字叔愚寧海人幼穎異與石簡華涵為友正
 德丙子領鄉薦嘉靖癸未進士出宰豐城案

牘山積一日剖決堂下無稱冤者修學濬河剔奸
 釐弊頌聲載道擢陞南京稽勲司主事兼攝四司
 黜陟惟允辛卯特旨宣見奇
 其奏對迨擢郎中未幾卒

許仁卿

號古泉臨海人嘉靖戊子南畿解元筮仕
 吉安司理殫心獄訟全活最多洗冤錄所

載其彰著者歷官瑞州知府救荒殲盜
 立社建橋州人祀之陞湖南副使致仕

鄧棟

號澄菴臨海人嘉靖二十九年進士初任行
 人以出使不辱遷給事當肅宗時獨立敢言

每報可輒取封草焚之宦跡半天下所歷臬使者
 治民按部狀皆著為令後人循之稱便歷任提督
 雲南屯政
 乞養歸里

張志淑

字世彥號石橋臨海人中嘉靖甲午解元
 授瑞州司李江右俗狡險而健訟志淑摘

發悉當合境稱神豪右皆相戒毋犯張使君直指
 巡列郡輒檄志淑與俱志淑亦慨然激揚自任墨
 吏悉望風解綬分宜柄國志淑半刺弗與通遷廣
 西思恩郡守思恩蠻獠雜居志淑履郡示以威信
 衆咸懷之未幾土酋以兵逼城下志淑率吏士奮
 擊郡賴以安後致政歸還家惟圖書數卷而已
 楊三守襄敏譚公之募每戰先登自仙居逐至寧
 海又于太平南灣擒斬倭寇調廣東福建等處討
 賊多立殊功陞叅將萬曆中湖崧登萊等處副將
 仕終總兵居鄉嘗築賴嶼土橋河
 開蓄水救禾功德及人者甚衆

王鈴王洽

黃巖人鈴字予才嘉靖丁未進士授宜
 興知縣汰冗費闢荒穢緩徵科以峭直

忤當道調將樂至則揭五事以自矢行之一如其
 言尤急教化建學校修龜山書院丁外艱服闋補
 成安愛民造士後先三爲縣囊橐蕭然將樂成安
 皆肖像生祠之督蘆洲稅羨金悉歸公帑陞山東

按察僉事卽引疾歸子洽字近之領鄉薦授池州
 司理性清肅訊刑聽獄詞氣和平多所昭雪按使
 者密帖以鄰郡委著賢否洽不承命乃曰名利非
 敢要也寧干出位之愆遂引疾告致歸囊不支郡

守姚心亭捐
 金贈行云

余鐸

字振之號雲屏黃巖人天性孝友父陵倉使
 滿秩力勸之歸以善養終天年讓田與宗人

復賑其窶者年十五爲諸生試輒高等以貢授崇
 義訓導邑僻左七陋弗學至則日與譚說詩書衆
 皆奮起故事齋膳夫直率倍徵穀然請于縣革之
 學旁多隙地舊募人藝蔬收其稅則撤而歸之官
 屢請歸不許會峽江尹成某以御史檄行縣勢張
 甚顧獨與亢禮無尊巽色成陰以濫酒中之坐免
 蓋不知其不善栢杓也賦一絕歸諸生垂涕送之
 數百里外不能別士大夫若劉中丞節輩咸爲文
 寃之居二十年杜門著書後先邑令莫能覩其面
 平生學務實踐不屑近名於紛華勢利泊如也所

著有雲屏
稿西山集

張元勳

字世臣號東瀛太平人北直東安縣籍承祖蔭襲海門衛新河所百戶嘉靖壬子倭

入寇從叅將戚繼光征勦頻獲戰功授守備南路既而大盜諸良寶賴元爵藍一清等盤踞山海關粵騷然復討平之遂由偏裨晉中府僉書鎮守廣東萬曆四年征羅旁徭浪等洞蠻搗平賊窟五百六十餘處拓羅定一州東安西寧兩縣特賜蟒玉追封三代皆正一品廕四子以少保兼太子太保中軍都督府左都督致仕

李超

字升霄太平縣松門人其先世江右鄱陽人超以軍功襲封嘉靖間倭寇浙東觀察譚綸

薦于總督胡宗憲委以備倭之任時甫蒞三軍而倭寇適至超單騎持矛直突倭營倭驚潰斬首無算後譚以憂歸豫章適豫章土寇為亂勢甚猖獗超恐譚罹寇難遂私率步兵百餘徑往豫章斬殺

靡遺豫章獲全譚遂挾以見薛中丞薛特疏于朝授南贛遊擊屢著戰功遷金台嚴三郡叅將會倭深入台南督諸軍大敗之倭片帆不返自是不敢復寇事聞遷京城後軍都督提督京營疾發乞休優旨特進柱國光祿大夫

林應麒

字必仁僊居縣人幼穎特喜吟咏嘉靖十

五年成進士授吳縣令吳多豪右為民患應麒下車輒收訊之會御史苟汝安按郡應麒晉謁苟端坐不為禮應麒徑長揖出豪右乘間誣之遂被劾已而除國學博士調判泰安轉金谿令陞雲南提舉尋陞惠州府同知先是令金谿時為鄭副使世威屬稿議革餽送內引分宜進賢二邑歲費六十金為證語頗激切嚴世蕃萬鎗二權貴諷言者文以他事廼奉旨罷閑應麒弱冠釋褐登朝人皆嘖嘖艷之顧以才高不能下人且嫉惡過甚終弗克大

展其用

應大桂

字邦才仙居人嘉靖丙戌進士授行人遷刑部主事轉刑部員外稱職上賜銀壺一

座除漢陽知府多惠政調黃州學傍有隙地捐俸

以給之改登州陞湖廣副使致仕子存魯號省吾

能世其學丙辰倭寇仙居當事者請命築城力役

浩繁區長不堪命存魯慨然出數千金獨繕迎暉

門以紓眾困家漸落萬曆丁丑貢乙卯領順天鄉

薦除石埭令與利去弊卓

有廉能聲陞鶴慶通判歸

何贊

黃巖人登嘉靖壬辰進士授行人擢監察御史即上疏劾戶部尚書某輸邊失策伏乞賑

山西飢氓所全活甚眾時以河套宜守首陳禦敵

三策以絕亂本章屢上不報而患隨作當路始服

其先見按河東饑政解池鹵源久嗇公私告病至

則齋沐為文幸所部禱于神數日瘳液如初已而

巡歷期滿所司循故事以羨錕進即斥歸諸公而

罪之御史大夫王公廷相聞之歎曰真御史哉安

南之亂以翊贊征討功賜金帛進俸二級錫燕于

梧州金銀珍器盈席獨無受牒藏郡帑資滿九載

例得遷卿佐以忤嚴相第轉福建按察副使以疾

卒居官所得俸輒分其弟及宗族故舊之貧者田

園邸舍視未貴時不加益所著有疏義端山稿

曾銑

黃巖人弱冠成嘉靖己丑科進士累官兵部侍郎二邊總制丙午請復河套世宗壯之本

部不決令銑與邊臣計議以聞銑劾仇鸞科斂士

卒阻撓軍機詔奪職邊兵入延安慶陽諸路銑遣

參將李珍夜劫其營上嘉勞之賞以銀幣戊申嚴

嵩論銑開邊起釁夏言和同附會致誤國是廷議

奪言師傳逮銑詣京即訊時兵部奏俺答入延寧

上曰此曾銑開邊名之也會劾以聞仇鸞先被銑

劾乘機訐銑會擬銑罪律無正條宜比失陷城池

例斬于市妻子流三千里銑死家無遺資妻子狼

狽天下冤之隆慶初復官加贈兵部尚書諡襄愍銑雖家楊今登科錄及諡類鈔俱刻浙江黃巖人

戴豪

太平人弱冠中鄉試第七連登進士拜兵部武庫主事遷員外郎擢職方郎中武庫主謀役出納職方主邊務區畫實天下勢利所在居之者恆溺焉豪獨收天下書而盡讀之公退雖甚疲亦手不釋卷家人以日用告不足輒麾去曰稱貸之無亂吾志其在職方時會邊報旁午衆務糾紛豪不動聲色而應答如流當是時鈞陽馬公為尚書時特倚重豪諸司奏牘委以屬看詳同官人皆服其精雖老成練達之士亦自以為不及也尋陞廣東右叅政未幾病卒士林嗟悼之所著有贅言錄若干卷文肅公序而傳之

戴顥

太平人中浙江鄉試第一進士第為庶吉士拜吏科給事中劾奏光祿卿馮蘭不職章再上竟降謫武宗議南巡百官伏闕諫且哭大理少卿吳堂喝令毋哭顥乃上章劾之由是直聲著聞石簡寧海人嘉靖癸未進士長從陽明先生游初令餘干清慎公勤百廢具舉不諂事上官去

之日有僉事某銜之以峻法鞫其庫役欲以枉法中簡其人引刀自刎寧死不忍媒公其服人心如此陞南京武選司主事歷陞吏部文選司值考察

不徇權勢陞高州知府一郡大治逾年調安慶行李蕭然惟圖書數卷而已安慶當水陸之衝供需

費出無經簡為裁節歲省四萬餘金歷雲南湖廣山東藩臬巡撫

雲南所至有聲

陸州寧海人嘉靖甲辰進士貌若不勝衣遇事剛斷嘗以南昌教官典湖廣鄉試舊例官入簾

品題之權屬提場外簾御史州鬱鬱不自得比定解額抽中式二卷閱之多訛謬以詰御史御史無

以應即易之同事者咸服其持正遷刑部郎中出守常德先是榮藩嘗請郭西濱江地租中官豪橫

闖及經行艦筏州下令禁治中官斂跡又為石堤以捍五溪水患治郡三年不為烜赫之政惟潔已

愛民而已考職擢九江兵備副使民立生祠于城北後丁內艱卒于家計聞郡中父老率子弟朝夕

人物

勸哭祠下事見分省人物考

吳時來

字惟修仙居人嘉靖三十二年進士授松江司李適山寇犯境士女趨城或議鍵關

止之時來曰獨非吾民乎悉縱入全活萬計明年夏倭猝至攻城西南隅驟兩城壞人情洶洶時來盡撤屯戍第以驍勁數十扼其衝總臣以為危時來曰淖濘彼安能登果無恙修城完倭稍却時來度必走樵李密檄吳江令決太湖水出平望賊果阻水不得進隨以伏兵夾擊之斬首數千級溺死無算名拜刑科給事中輒劾楊順路楷嚴恚甚必欲置之死地適使琉球有差思以此陷之時來遂上疏數世蕃諸所不法狀竟為蕃所竄發錦衣訊所主使盡獄具徧訊之無完膚次日欲再訊世宗舉筆問地震筆墜呼何物是能動地耶乃得減死戊橫州時年方二十七在橫一紀穆宗嗣統詔起復授原職遂上保泰九劄與張相居正不協即轉府丞蓋不欲有所建白也隨轉操江僉都御史釐

革宿弊殆盡轉廣東僉都御史降憲副復以逾限間住家居十八年萬曆中起原職歷陞掌院都御

史正色立朝知無不言卒贈太子少保諡忠恪

石承芳

字子孝寧海人簡子也讀書力學古樸無嗜好不異田家子以明經授常熟二尹時

養齊嚴公在籍嘉之邑有梅李地磽因通糧往勘賦詩有飛沙迷望遠瘠土不毛同之句涇陽顧公傳之而此城糧額遂減後署捕民有犯盜者匿勢家承芳卒擒獲三陞廣東興寧令因廉介與府道忤遂辭歸老穉郊送者哭聲如雷回舟僅餘俸七金環堵蕭然日以書史自娛家居十載卒

盧明諷

黃巖人萬曆進士授太常博士以郊廟大祀典章濇漫明諷考故實編次二十卷釐

正之擢授刑科給事中倭警上方略大事奉旨嘉獎內侍頓隆犯罪已下部訊尋有旨見原滇南歲進鑛金初議量減尋復故明諷并疏叅駁語多切直忤中官意又疏請召還直臣張棟鍾羽正萬國

欽等二十餘人明諷疏畱中不報因給假歸復補吏科轉戶科右給事倭陷朝鮮力陳大司馬石星議欵之失總督顧養謙議牴牾疏請孫鑛經略意在分過明諷言經督並建事鮮責成後所言俱驗又疏請起用閣臣王家屏尚書沈鯉員外鄒元標等時家屏等方以建言忤旨歸由是失上意會枚卜銓部首列家屏選司顧憲成坐謫明諷復疏救之上益怒命降雜職用迨遂中立疏進竟削籍時年三十餘後撫按交章推薦不起

吳執御

黃巖人天啓進士初任濟南司李潔躬執法不假色笑濟人呼為吳靜街兩校秋闈

時德州建魏祠執御獨不往迨瑞伏誅授刑科給事中辛未有加派捐助搜括之議執御曰理財加派不得已而用之未有年餘不罷者捐助搜括二者尤難為訓不聽又疏今日言餉加派則害民不加派則害兵沿邊諸邑宜選補賢守畀以本地錢糧訓練士著此法一行餉不取償於司農兵不借

援於成卒計無便于此者亦不聽復具一疏痛指首輔周延儒攬權擁蔽私其鄉人塘報章奏一字涉邊疆及流寇輒借軍機密封下部明畏廷臣摘發長短他日敗可以捷聞功可以罪按也疏凡三上俱畱中上責其多言下詔獄尋釋之家居謝客州府之長罕觀其面年四十六卒

金孚兌

字吉所乾之後太平縣人七齡知屬文舉萬曆辛卯鄉試授廣東韶州府曲江知縣

甫蒞任值歲祲請于巡撫奏蠲稅糧復發官帑賑之所活數千家韶郡密邇諸洞互市交關者稍忤其意輒羣譁殺掠兌內嚴守禦外布恩惠徭人戒不犯境為粵東清廉第一居曲江五載遷江西瑞州府治中治瑞方七閱月力辭而歸杜門不出惟以古詩文自娛

任大治

寧海人萬曆己未會試給事中元詩教奇其對策以為劉蕡後一人也力薦元典試

史繼階驚其言置第三初授無錫知縣鋤豪強清積弊絕請托每與權貴人忤因左遷武昌教授轉

博士晉刑曹主政歷員外郎中時有顧宗孟以觸
 魏璫下刑部勘大治謝病司寇強起之大治日天
 日在上詎可附會予頭可斷筆不可轉也越月出
 知廬州至則問民疾苦敦厲士習民大悅服崇禎
 巳巳以殫力政務卒于
 任入名宦卽崇祀鄉賢

應朝卿

字行叔仙居人萬曆巳丑捷南宮授建安
 令課最調繁晉江擢山西道監察御史時

南城寺內某勢灼天特疏劾其不法狀籍其家巡
 按貴州一以肅官邪軫民瘼爲事轉兩淮巡鹽兩
 淮鹽賦半天下弊政較他處倍多朝卿湔剔殆盡
 商困得以少蘓往例商人派贄見錢約二十四萬
 奇朝卿峻却勿受商人懷其惠立祠歲祀之復命
 奉巡按湖廣風裁益著以母老賚王命歸省爲隙
 者所議左遷永平道
 陞按察司廉使尋卒

鄔若虛

字君受寧海縣人幼穎敏萬曆乙卯登乙
 榜初授崖州守州在海外適黎蠻猖獗增

濬城濠與總戎協力距守衷甲不解者五旬賊遁
 又海寇引倭蹂躪崖上孤城旦夕下若虛以信義
 糾集民兵先告妻子曰天子以封疆屬我城亡與
 亡義不及顧其妻宜人洪亦預潔智井以待于是
 厲氣登城將士用命寇驚潰兵後漸摩撫字正風
 俗培士氣反誣獄以治行奏最遷郟武司馬至則
 典利除害課士訓民一不欺其素學戊午春致政
 歸力新祖廟分宅以居諸姪族戚待以舉火者周
 給無倦容家居
 十餘年以壽終

應世虞

字子昭仙居人萬曆壬子領浙江鄉薦會
 試兩置副榜謁選授新昌教諭陞徐聞令

徐民有幼女日晡窺園見白馬羣入池中歸語父
 父與女荷鍤掘得金一藏漢時馬援所瘞物也父
 喜謂女俟若長中分之及嫁父嗇其奩女大怨望
 白諸官漸聞于上問官各厭所欲含糊置之世虞
 下車喚女諭以父子天性恩不容傷且密勸其父
 分之金立出讞章以結其案父子乃相見如初甲

子因赴闈舟至蜺岡夜半颶風發而覆世虞茫然緣倉板而坐若有兩人擎足者平明岸傍聞覆舟內有人聲鑿出之是夕夢母吳氏謂曰汝濱死得生數世不食牛報也世虞因著牛禁一書以警世陞雷州同知致仕歸

楊三省

號紫凝太平人以選貢入北雍試第一授江西安義令居常沉默寡言遇事剛斷劉

總戎僕殺人當道置不問省鞫得其狀立置之法值歲稔煮粥療饑告糴散種寬積逋籍糧額政聲大著陞茂州知州茂軍民雜處且近西番省處置徵調得宜論以溫語番人皆歡呼踴躍而去以剛直忤上官遷潞藩

左傳遂引疾歸

陳期奎

字豫嘉弱冠負文名登萬曆壬子鄉書署教淳安崇實黜浮且輯學宮賑寒士擢令

鹽城下令詢疾苦如射陽湖為害日地僻多盜郡庠傾圮一日土豪朱騰蛟事犯在逃捕其妻至庭

訊時擲子于地呱呱聲不絕期奎憐而釋之騰蛟感激遂自縛請罪期奎曰善惡止在一念汝能改

為善倡修射陽湖為一邑除害并救汝矣騰蛟踴躍効命未朞而工成有僧優曇積薪自焚里民羣募建塔期奎曰報佛何如報吾夫子以簿付丞悉收為建學費忤齷院左遷致仕歸卒時七十有八

蔣承勛

字繼之號蕙齋臨海人楚臬僉事顯曾孫年十歲能習漢書萬曆丙子薦于鄉授教

諭陞東流令首除供具以甦里甲清驛遞侵牟之弊革兩造先納紙錢陋規凡大小獄務決以情浮梁黃士鳳與樂平何天俸並客于東而鳳橐饒俸覬之俟歸途刃腹抉面挈其篋而逃勛聞報疾馳視之微息尚存稍稍言其狀而斃賊犯于他郡胥吏以為辭勿許密移饒州遣役于娃館獲之械至

定獄萬口稱快郡俠汪一滄習符呪立能死人利兄貲斃四命而奪之有遺腹孫寄他姓獲全冤久未雪赴承勛伸懇勸戒勿泄越日集丁壯托他行

倏至滄家備得符咀驗實坐辟悉還其資以至嫁

無家之女抗開採之使具載東流遺愛碑中兩臺
 交章薦陞邵武丞丁母憂服闋補楚黃州黃郡帆
 艘鱗集狙獍出沒下車清軍役盤獲巨盜招申棄
 市一境肅然攝府篆則革南糧之弊署蕪春則核
 盜藏之奸荆府宗藩時貴驕縱凌民巨璫李忠奉
 旨謁陵虐用民夫悉折以理不為屈並相愧服引
 去具有祖風治績為三楚冠轉蜀
 藩長史致政歸卒年六十有六

張昌辰

字漢明號對文臨海人為諸生二十年以
 善治春秋名萬曆癸卯鄉薦至癸丑捷南

宮除豐城令豐城為洪都下邑世族巨宦播虐細
 民昌辰下車廉得尚書某者侵民舍傍隙地僉憲
 某者斂債入民子女即詣撫按具白其事下昌辰
 勘問據律定案諸貴俛首無辭豪右為之斂跡
 牟賢 號拙菴黃岩人甲戌進士與龔鼎孳楊元錫
 為一榜三少年賜歸畢姻當時榮之授廣州
 司李俗頗譁張刑書統於省會滯獄者不下千人
 賢疏其案牘以慈佐明旬日囹圄為空龍門民叛

逐其長史賢單騎詣鐵岡三峒為指陳其善後計
 龍氏歡然拜服癸未冬行取吏部文選主事後歸
 里不復出優悠三十年足不至
 城府所著有拙菴存草四卷

柯夏卿

號遜菴黃巖人八歲失怙二十四歲舉鄉
 魁成進士時澄江水清三日謂清獻後身

授秋曹主事多所平反每冬寒備薑粥蘆葦給獄
 中人調樞曹職方年未三十歷練老成楊司馬敘
 贊畫功賜金幣晉太僕少卿推天津兵備叅政庚
 辰冬河東三府饑教臺村盜起震驚都城廷議遣
 帥將盡屠其村夏卿計縛其渠魁餘眾悉放還之
 生者數萬戶教臺民為立祠焉母老給假歸省林
 居植忍冬蔓于書屋顏曰忍
 冬軒所著有忍冬軒集十卷

馮學易

字韋卿少溫恭力學登隆慶丁卯賢書授
 汝寧西平令六載奏最晉淮安管河同知

時距潘季馴治河之後已逾二十年黃流屢決學
 易上下相度疏濬得宜後歷官河東運使以廉潔

著稱

陳函輝 臨海人字木叔號寒山崇禎甲戌進士有文名初授靖江知縣後以節著云

應昌士 仙居人崇禎庚午中式庚辰以特恩賜進士授安定知縣癸未冬闖賊圍安定昌士

倡兵民登陴效死守越月城陷被執賊欲降之昌士奮罵不屈妻周氏與女貞年十六在旁亦奮罵

賊先殺以脇之笑曰各得死所矣終不屈十一月十九日械至蘭州偽帥親釋其縛從容勸曰識時

勢者呼俊傑昌士舉杯擊偽將首時漏二下即席被害僕趙登裹屍還安定與夫人合葬于東山

皇清許鴻儒 太平人順治四年歲貢選廣西柳州羅城縣知縣隨征四載緣兵燹城荒土司

叛踞到任日桂林失守羅城孤立無援被執不屈罵賊而死弟男五人俱遇害事聞 勅贈廣西按察司僉事遣使祭葬 仍蔭一子入監讀書

金華府

秦顏烏 烏傷人事親孝父亡負土成塚羣烏銜土助之烏吻皆傷因以名縣

漢龍丘萇 本烏傷人新莽時隱居九峯岩連辟不就任延為會稽郡尉縣吏白請名萇延日龍

丘先生有伯彝原憲之節都尉酒掃其門猶懼辱為寧敢名之遣功曹奉謁疾致醫藥吏使相望於

道歲餘萇詣延乃署儀曹祭酒尋謝病去

楊喬 本河東人高祖茂從光武為威寇將軍封烏傷新陽鄉侯三世以罪國除因家焉父扶交

趾刺史有能名喬為尚書儀容偉麗數直言政事嘗疏薦合浦孟嘗異政竇武表薦張稜及喬等文

質彬彬明達國典桓帝愛其才貌詔妻以公主固辭不聽遂閉口不食七日卒

楊璇 字機平喬之弟初舉孝廉靈帝時為零陵太守是時蒼梧桂陽猾賊相聚攻郡縣賊眾多

而璇力弱吏人憂恐璇乃特制馬車數十乘以排囊盛石灰於車上繫布索於馬尾又為兵車專殼弓弩剋期會戰乃令馬車居前順風鼓灰賊不得視因以火燒布燃馬驚突賊陣因令後車弓弩亂發鉦鼓鳴震羣盜披駭破散追逐傷斬無數梟渠帥郡境以清三遷為渤海太守所在有異政以事免後尚書令張溫特表薦之徵拜尚書僕射以病乞骸骨卒于家

張敦 字伯人烏傷人即今浦江漢時為諸暨令海寇二百餘人剽鹵為患悉平之轉重泉令民

悅其化遷車騎大將軍

駱俊 字孝遠義烏人察孝廉補尚書郎擢拜陳畱守值袁術僭號盜起俊保疆境賊不敢犯百姓安業歲時豐盈時鄰郡饑荒人多仰給俊傾貲賑贍全活甚眾民育子者厚遺米肉所生子多以駱為名後術眾饑求糧

俊拒絕術怒密使殺之

吳駱統

字公緒父俊為袁術所害統八歲與親客歸會稽孫權領會稽太守統年二十三試為烏

程和民戶過萬咸稱其惠權嘉之名為功曹行騎都尉妻以從兄輔女統嘗勸權以尊賢接士勤求損益出為建忠郎將時征役繁數民戶損耗統上疏以為財須民生強賴民力威恃民勢福由民殖德俟民茂義以民行六者既備然後應天受祚權感統言後隨陸遜破蜀軍於宜春遷偏將軍曹仁攻濡須使別將襲中州統拒破之封新陽亭侯後為濡須督數陳便宜前後書數十上所皆善權納用焉年三十六卒

畱贊

字正明金華人勇果絕人與黃巾賊帥吳桓戰手斬之贊創一足自後屈蹙不伸操刀自

剔其筋血流氣絕家人驚怖遂引其足足伸得愈駱統聞而壯之乃表薦贊疊有戰功稍遷屯騎校尉直言不阿權右憚之隨諸葛恪征東大敗魏師遷右將軍孫峻征淮南拜左護軍道病卒

晉許孜

字季義從豫章太守會稽孔冲受易詩書禮

骨立柱而後起建墓於縣之東山躬自負土每一

悲號禽鳥翔集棄妻宿墓所手植松柏巨五六里

時有鹿犯松栽孜悲嘆曰鹿獨不念我乎詰旦忽

有鹿為猛獸搏死於所犯松下孜悵惋瘞之猛獸

復至孜前自撲而死孜益嘆息又取猛獸埋之自

是林木滋茂而無犯者積二十年孜乃更娶妻立

宅墓次朝夕奉亡如存元康中郡察孝廉不起卒

年八十有餘邑人號其居曰孝順里咸康中太守

張虞聞于朝詔旌門閭蠲其賦役今祀府鄉賢祠

龔孟舒

金華人通毛詩善談名理仕梁為潯陽郡

丞元帝在江州師事之陳天嘉中官至中

大夫

隋蔣郃

字景倩浦江人為益陽令遷洪撫二州

刺史攘虎却蝗民蒙其惠轉交州刺史

傅柔

字仲席浦江人為宣城令無為

而治謳歌載路遷鄂州刺史

唐駱賓王

義烏人七歲能賦詩與王勃楊炯盧照鄰

使自言所能賓王不答歷武功主簿武后時數上

疏言事下除臨海丞怏怏不得志棄官去李敬業

起兵署為府屬為敬業傳檄天下斥武后罪后讀

至一坏之士未乾六尺之孤安在矍然曰為之

或以賓王對后曰宰相安得失此人敬業敗賓

王亡命不知所之中宗時詔求其文得數百篇

馮宿

字拱之東陽人父子華廬墓有靈芝白兔號

孝馮家宿擢進士第歷工部刑部二侍郎修

恪後敕三十篇行于時擢東川節度使完城郭增

兵械十餘萬浚水數壞民廬舍宿修利防墉一方

便賴疾革將斷重刑家人請宥之宿曰命修短天

也脫法以求祐吾不敢卒諡曰懿貽命薄葬悉以

平生書

納墓中

舒元輿

婺州人始學即警悟元和中舉進士裴度表為掌書記文檄豪健一時推許拜監察

御史諸凡按劾無所縱累遷左司郎中署御史中丞會帝錄囚奏辨明審不三月即真尋同中書門

下平章事與甘露之難嘗為牡丹賦一篇時稱其工弟元褒元肱元迴皆第進士元褒又擢賢良方

正終司封員外郎

宋胡則

字子正永康人登端拱己丑進士宋婺士登進士第者自則始釋褐調許田尉轉憲州錄

事參軍時靈夏用兵轉運使索相遣入奏邊備名對稱旨太宗顧左右曰州郡有如此人命記姓名

中書未幾改著作郎簽書具州觀察判官會遣使省冗役檄則行河道凡去籍者十餘萬民用休息

升知潯州時有虎患則齋戒禱城隍翼日得死虎廟中尋丁母憂廬墓終喪知永嘉郡遷屯田員外

郎提舉江南路銀銅場鑄錢監得吏所匿銅數萬勸或懼且死則曰吾豈重貨而輕數人之性命耶

籍為羨餘不之罪入為三司度支副使賜金紫除禮部郎中兩浙轉運使移廣西南南路按宜州大辟

十九人為辨活者九人累遷太常少卿乾興初坐丁謂黨降知信州天聖初徙福州時張希賢奏請

福州官庄田納二稅外仍輸租米則奏云官田多瘠少肥且地臨巨海風潮漂蕩州縣難以催督乞

仍納二課不輸稅課詔從之民以為便遷諫議大夫進給事中入權三司使寬於財利不以刻下為

功通京東西陝西鹽法進工部侍郎集賢院學士出知陳州遷刑部侍郎移知杭州得請加兵部侍

郎致仕卒

梅溶

其先吳興人五代時有諱等者始避地來遷浦陽溶以儒受薦為單州助教年七十餘攝

松陽丞宣和二年冬盜發青溪據歙睦遂破杭明年春發衢處相繼陷兵及境溶勢不能敵死之從

子執禮吉子朝官其二子敦時敦成敦時後為遂安令

胡埜 金華人事親以孝聞崇寧間應八行舉除婺州教授宣和二年冬方臘反青溪據歙睦明年兵及婺境官吏皆風聞夜棄城遁諸生勸埜避難埜曰先世以武功顯而我應八行舉豈可上負朝廷下辱先世耶城陷闔室皆死之事聞贈朝奉郎官其二子

申屠大防 東陽人妙於兵法宣和初草寇竊發挺身破賊鄉里賴之帥闡檄權東陽縣事

與薛帥約往永康收賊大防往薛後期無援大防戰死贈武經郎三子邂逅迺皆承信郎

錢適 字德循浦江人自少強敏記問過人登熙寧九年進士調洪州推官守將王詔出樞府出

威重異常僚屬不敢仰視會有疑獄適正色爭辨至怒罵不少奪卒如適議歷遷通判越州吏挾守

為奸雷難訟者嘗數百人適攝府事纔二日獄為一空建中靖國初擢殿中侍御史出提舉湖北常

平興利除害發奸摘伏風采凜然遷工部尚書兼侍讀為言者所論出知滁州歷宣州越州浮

沉外郡大觀初復故職以疾致仕起為寶謨閣直學士改述古殿皆奉祠適家居十餘年修築三太湖以利鄉民民德之宣和二年方臘陷婺城適避兵蘭谿靈泉寺為盜所害事聞贈大中大夫適無所不學晚尤深于曆書為文章明白簡切自成一家言所著文集八十卷

梅執禮 字和勝浦江人家故貧幼又喪父其母胡氏教以讀書中崇寧五年進士第調常山

尉未赴俄遷九域志編修秩滿除武學博士或謂執禮交儒不宜處以武士執禮欣然就職陳說大

義間親挾弧矢為諸生倡大司成賢之數為宰相言相以未嘗識面為歎執禮聞之曰以人言而得

必以人言而失吾求在我而已卒不往知滁州西洛歲供官炭自元豐以來稱林木且盡令淮南代

輸執禮曰滁之林木亦盡矣即奏免之賦鹽有定數而比者抑配以補故額執禮曰郡不能當蘇杭

一邑而食鹽倍於粟數民何以堪請於朝捐二十萬滁人德之皆繪像祠焉金人抵闕執禮勸帝親

征而請太上帝后皇后太子皆出避用事者沮之
 泊失守金人質帝於營邀金繒以數百千萬計執
 禮歸見其母曰主辱臣死何以生為母曰忠孝難
 兩全汝受國厚恩慎勿以老人為念執禮乃以其
 母屬兄弟去與諸將謀奪萬勝門夜搗敵營歸二
 帝以賑給為名與宗室子昉密圖結軍民不旬日
 得十餘萬王時雍徐秉哲聞之使范瓊泄其謀遂
 及於難高宗即位詔贈資政殿學士諡曰節愍

何敏中 字元功浦江人自少學易恐飲酒廢事終
 與論定之郡縣察其賢將以入行及遺逸薦辭敏
 中素仁厚游太學時同舍生萬立卒敏中鬻行橐
 持其喪歸鄰州寇起將壓境敏中攜家避山中比
 鄰從者以百數道遇擁刃來者眾相顧泣懼死敏
 中出告其會會大呼曰此浦江何公也吾昔為尉
 所縛藉公一言而免是嘗有恩於我者不可害即
 命兵護
 出之

滕甫

字元發一字達道東陽人母夢虎行月中而
 墮其室是夕甫生性豪雋九歲能詩舅范仲

淹見而奇之俾從胡瓊學舉進士授大理評事通
 判湖州累遷戶部判官神宗即位名問治道對曰
 治亂之道如白黑所以變易者朋黨亂之耳上稱
 善進知制誥知諫院拜御史中丞京師地震上疏
 指陳致災之由大臣不悅出知秦州未行河北地
 震命為安撫使民賴以安尋除翰林學士知開封
 府請乘夏亂擇賢將經營分裂之此百年之利帝
 奇其策然不能用甫在帝前論事言無文飾洞見
 肝鬲上知其誠事無巨細輒問之甫隨事解答不
 少隱王安石立新法恐上信其言出知鄆州徙定
 州入覲力言新法之害徙青州歷應天府齊鄧二
 州會婦黨李逢為逆知池州改安州再貶筠州或
 以為復有後命甫曰天知吾直上知吾忠吾何憂
 哉上章自訟上惻然即以為湖州哲宗即位徙蘇
 揚二州除龍圖閣直學士復知鄆州淮南南京東饑
 甫慮流民且至先度城外廢營地名富民使出力

為席屋一夕成二千五百間竈器皆具民至如歸所全活五十萬徙真定又徙太原令將吏無開邊隙河東十二將其入以備西邊分半番休甫至未幾邊請八將皆防秋甫不許卒遣更休是歲塞上無警省芻粟十五萬夏人欲以綏德為城畫境出二十里外甫曰是一舉而失百里必不可九上章爭之議者謂近世名將無及甫者以年及力求淮南乃以龍圖閣直學士復知揚州未至任而卒年七十有一贈左銀青光祿大夫諡章敏

杜伯僖

字安常東陽人宣和盜起大將楊惟中帥兵進討伯僖獻策遂畱之幕下運籌制勝

起授成忠郎調台州鎮將歷史館檢閱紹興間妖賊嘯聚東鄉將官王公稚問計于伯僖對曰愚民迫饑寒弄兵山谷間非其本心但殲厥渠魁則脅從自解若縱兵窮討必且濫及無辜公稚從之

江渙

字德濟武義人自幼勇毅以杖擊石石碎而杖全睦寇起縣傲防守柵隘屢以少擊眾保

全鄉井後隸淮西酈瓊麾下瓊叛殺叅謀呂社舉軍降于劉豫將出境渙與其屬謀曰吾儕誓忠義死君父詎可為降俘夜與其徒還得社之首至楊子江無舟可度埋其首于江臯識其處遂浮渡達行在時方收鞫社家屬渙力明其不叛具告所以然命押渙取社首按驗不誣遂赦其家出獄者咸拜渙曰微公吾曹安能生忠義得白皆公力也後任廣東統領克海寇以一矢殪其渠魁卒于官

姜綬 武義人靖康元年敵侵東郡募士赴睢陽趣敵見執大罵而死妻陳氏年二十三子特立尚幼人欲奪其志陳取刀斷髻自誓卒守其子以成令名特立孤貧力學淳祐間名試除閤門舍人歷官至寧遠軍節度使致仕卒贈開府儀同三司官

黃仁環

浦江人建炎初以賊作亂仁環呼諸子唐子客謀偽與賊合賊信不疑仁環語其酋

曰今欲破縣兩主首俱行誰守洞汝等畱此吾先破陣於是引眾東行十餘里將覆賊乃詭分兩道

出攻虛整部伍密令子客等各挿竹爲標識與賊
兩兩相夾部分既定仁環乃呼曰轉陣殺賊與子
客夾擊賊千餘人脫者無幾諸酋畱者仁環令諸
子饗于家酒酣用大斧斫殺之初仁環有女嫁賊
黨中或曰公報國固善如愛女何仁環曰吾恐事
不就一女何惜至是其女竟爲賊所戮後仁環官
至訓武郎卒鄉人感其德立祠祀
之今縣之花橋有黃將軍廟存焉

滕茂實

字秀穎東陽人初名課登政和八年進士

允迪使金議割三鎮太原尋奉密詔據城不下金
人怒囚之雲中徽宗遷茂實請侍故主北行金人
不從且欲用之茂實不屈遂畱雁門憂憤成疾臨
終囑友董誥曰我死卽以奉使黃旛裹屍而葬且
大書曰宋使者東陽滕茂實墓復作詩以自叙金
人哀其忠爲起墓臺山寺下時祀之後董誥自拔
南歸上其詩贈龍圖閣學士官其家三人

項德

武義人充郡禁卒宣和初盜陷婺城縣亦隨
沒德率潰亡軍破賊于城隍廟東抗江蔡西

拒董舉北扞王國大小百餘戰出則居先入則殿
後俘馘莫勝計賊聞盡銳邀德于黃嶺下德力戰
死邑人哭之聲震山谷遂
肖其像于城隍廟祀焉

許瓊

東陽人字世英剛毅有力善騎射宣和中邑
懷德鄉寇起瓊集民壯攻討之鄉賴捍衛奉
檄援郡城有功上其事補秉義郎攝郡事旣而睦
寇入境屢挫其鋒久之兵食不繼而盜益攻城瓊
力戰死屍猶僵立如生能戴所
乘馬而歸至今廟食于鄉焉

陳德固

金華人靖康初爲京城守禦司屬官嘗獻
守禦之策朝議沮之及京城失守督士卒

與金人力
戰而死

傅雱

浦江人多膽略遇事有爲與李綱宗澤游建
炎元年金兵始退黃潛善力主和議上遣雱

為祈請使自宣議郎遷宣教郎以優異之未行朝
論遣重臣以取信改命周望為通問使上用李綱
言乃命綱草二帝表付雱以行獻二帝衣一襲且
致書於粘罕雱與王倫俱留軍中久之乃歸官至
工部侍郎弟光字子溫為諸王宮教授未幾退歸
田里方臘反縣民多托之為亂任士安統兵至怒
甚欲盡屠之光與任厚往諫之曰亂者唯通化一
鄉餘者良民將軍奉朝廷命殺賊爾奈何延及無
辜耶任悟
如光言

陳昭 字襲明義烏人游太學偕陳東上書乞斬六
賊不報棄繻東歸後舉進士調錢塘尉御史

陳堯臣為權倖所擠下其子於大理獄昭為納告
身贖之再調戶部贍軍酒官用薦改宣教郎卒所
著有
易說

呂渭孫 字希祖東陽人紹熙間第武舉開禧初從
軍為殿前司統領官薛象先宣撫荆湖用

司神勇軍統制使募兵悉帳前千人授之渭孫將
行坐教塲立紅白二旗謂眾曰此行當以死報國
能偕死則偕往一人貪生敗吾事矣願行者立紅
旗下不願者立白旗下趨立紅旗下者僅四百人
渭孫即以六百人還宣司因下堂勞四百人徧拜
之乃出軍令有軍士入民家擊碎二釜者渭孫立
笞殺之眾大驚所過秋毫無犯更募得四千人率
守樊城累立戰功後為副都統魏支諒見疑為其
壻所
殺

宗澤 字汝霖義烏人登元祐六年進士第通判登
州忤道士倖用者褫職羈置鎮江尋監鎮江

酒稅靖康元年用薦者假宗正少卿充和議使澤
奏名不正改計議使眾謂澤方剛難合止除秘閣
知磁州從羸卒十餘人之官至則治城池募敢勇
為必守計且條畫邊防及勤王策進秘閣修撰河
北義兵都總管康王再使金過磁澤力止之王遂
回相州有詔以澤為副元帥加集英殿修撰從王

起兵王承制除徽猷閣待制二帝北行澤趨滑抵大名將據其歸路邀之而勤王之兵無一至者高宗卽位南京趨詣行在擢龍圖閣學士知襄陽府改知青州尋知開封府河東王善最爲巨寇澤單騎說降王再興李貴楊進王大郎等皆相繼降遷延康殿學士京城畱守兼開封尹又進資政殿學士旣至修宮禁治城壁增武備結連諸路義兵燕趙豪傑京城內外所屯兵實百八十萬剋日大舉爲黃潛善汪伯彥等所沮憂憤疽發於背臨終連呼渡河者三薨贈觀文殿學士通議大夫諡忠簡詳見宋史

王師心

字與道金華人登政和八年進士調海州沐陽縣尉敗劇賊宋江詔改承奉郎知長

沙縣政事詳明累遷太府丞樓照使陝西辟爲幹辦公事進權工部侍郎充賀金國生辰使還除知袁州時秦檜方用事監司郡守皆爭獻羨餘以希進師心獨取以代貧民逋租除戶部侍郎奏宜塞

倖門開言路生財不如節用上勞問甚渥且曰卿以不附秦檜故去國久朕知卿未嘗忘也遷權吏部尚書兼侍讀進讀三朝寶訓終篇前後進見從容盡規者非一浙東水災充兩浙安撫使寬逋債振乏絕民不流亡乾道初以左奉議大夫致仕卒後諡莊敏

樓照

字仲暉永康人登政和間進士第累遷尚書考功員外郎高宗在建康照言今日之事當

思古人量力之言力可以保淮南則以淮南爲屏蔽權都建康漸圖恢復力未可以保淮南則因長江爲險阻權都吳會以養國力於是移蹕臨安擢右司郎中紹興二年召朱勝非爲侍講罷給事中胡安國照與程瑀等言勝非不可用安國不當謫皆落職六年召爲左司員外郎除端明殿學士簽書樞密院事繼命往陝西宣諭德意照至長安會李世輔自夏欲歸朝照以書招之世輔以二千人赴行在所賜名顯忠以親老求歸省于明州命給假迎侍仍賜金帶十四年以資政殿學士知紹興

府過闕入見除簽書樞密院兼叅知政事尋爲李文會詹大方劾罷與祠起知宣州徙廣州未行而卒賜諡襄靖

蘇簡

字伯業父遲文定公轍長子也建炎初知婺州奏減和買羅額二萬八千民爲立生祠因

雷家焉簡以祖廕承務郎帥廣東措置海鹽有方遷龍圖閣直學士卒所著有山堂集

鄭剛中

字亨仲金華人紹興二年進士第三人調溫州判官賑饑得法用秦檜薦爲敕令所

刪定官累陞尚書右司員外郎時秦檜主和議剛中爲陳金不可信不聽遷殿中侍御史抗疏條奏和議利害甚詳及胡銓上書欲斬秦檜檜怒禍且不測剛中率同列論救銓得編置樓照出諭京陝辟充叅謀官還除禮部侍郎再擢樞密直學士出爲川陝宣諭使尋充陝西分畫地界使金使烏陵贊謀將至剛中出關迎之與金使反覆辨難終全階成岷鳳及秦商之半列險據要蜀賴以安就除

端明殿學士四川宣撫使宣司舊治河池餽餉不

繼剛中移治利州省費百萬時蜀中勁卒十萬都

統吳璘楊政郭浩已加三少皆驕悍難制初議移

屯楊政不從剛中呼政語曰我雖書生誠不畏死

聲色俱厲政遂聽命剛中在蜀凡六年金不敢犯

秦檜見蜀中富饒諷使進金三萬兩又令下錢米

荆門剛中不從檜不悅令御史汪勃奏置四川財

賦總領官以趙不棄爲之不隸宣撫司因令刺求

剛中陰事會金索北人在南者檜悉遣之蜀門有

義勝一軍首領李謹等十四人皆驍勇剛中以其

畱蜀久縱之必生患悉斬之檜怒其專名剛中還

文致其罪罷職謫桂陽軍居住再徙封州卒檜死

後追復原官

諡曰忠愍

潘良貴

字義榮一字子賤金華人以上舍釋褐爲璧雍博士遷秘書郎蔡京父子欲引致良

貴謝絕之欽宗賜對良貴極言何卓唐恪等不可用當國者不悅黜監信州高宗名爲左司諫請誅

叛命偽黨又乞封宗室以壯國體巡幸維揚養兵威以圖恢復汪黃惡之改除工部良貴以不得其言求去去主管明道宮越數年除考功郎宰相呂頤浩謂曰旦夕相引入兩省良貴正色曰親老欲乞外退語人曰宰相私恩牢籠何以立朝即日乞補外知嚴州未幾請祠起為中書舍人廷叱侍郎向子諲以修撰提舉太平觀起知明州除待制提舉明道宮歸十年不出李光得罪以通書坐降三官良貴剛介清苦壯老一節為博士時王黼張邦昌俱欲妻以女拒之晚年家居貧甚郭外無尺寸之田秦檜諷令求郡良貴不屑有雜著十五卷朱子為序極其推重又曰三戒文磨鏡帖切中學者之病卒年五十七

章服

字德文永康人紹興二年進士授青田縣尉累遷朝奉郎用魏良臣薦除兩浙提舉市舶公事轉朝請郎差知建州軍糧久不給軍情洶洶時庫錢不能三萬緡服徐諭之曰汝輩第歸營得

一月當次第給矣立案稅籍得豪民奸胥要領及期軍用沛然連遭父母喪服闋除知鄂州州額秋租纔五千上供至萬斛他須稱是服視酒稅籍得贏錢立辨人以為神再遷侍御史上疏言願以財賦邊備二事專委大臣集群臣之說參訂其可行者初朝廷嘗揀諸路廂禁獄軍就閱行在所籍為忠勇軍約以防秋遣還所在郡久留未遣軍人不堪相率詣臺自言服上言孔子語去兵去食而信終不可去今因兵而失信無乃不可樞臣迎合聖意得無悔乎上領之曰更當徐議虞允文時知樞密院事一日名戚方議之事復寢一軍竄逃無畱者又相與拒闕不可捕將校以下皆貶官而方獨放罪服遂上章併劾允文挾私任情連章不已允文竟罷去中官梁彥俊幹辦皇城司轉官不行臺謝服劾其廢法彥俊坐論贖會服除吏部侍郎辭免彥俊摘其章有不遜語上大怒謫罷汀州居住得旨放還提舉江州太平興國宮卒年六十八所著有論語孟子解各三卷易解二卷古律詩二卷

章徠

淳熙甲辰進士歷官右文殿修撰時陳賈議
貶道學徠與劉光祖極論道學之正光宗嘉
納及趙如愚罷相徠復與章穎抗疏劾韓侂胄坐
罷官歸寶慶間召為宗正少卿兼侍講卒贈少師

所著有
疑塵集

章堦

咸淳末都城失守浙東諸郡多陷時衢益二
王在福州堦念世受國恩與弟堅捐家貲募
忠勇得義兵數千收復婺城制置使李珪以聞授
堦直秘閣知婺州堦主管官誥通判衢州與元兵
力戰於丁鼠山援絕
城陷堦與堅皆死之

賈廷佐

字子野其先真定人康王南遷隨父淵扈
蹕渡江遂家于東陽登紹興二年進士除
左迪功郎嚴州桐廬縣主簿時金遣使張通古偕
王倫南來以詔諭江南為名廷佐一再上書累數
千言請誅王倫拘來使決意用兵其詞旨剴切大
略與胡銓同以官卑適不為秦檜所忌幸免竄逐

累官大理司直通判湖州台州遷詳定司敕令
所刪定官後知處州遂致其事卒贈朝奉大夫

王師愈

字與正幼時潘良貴令賦竹詩有願堅松
柏操同保歲寒心之句良貴異之年十二

以書論為文養氣之法台門下親教之又從楊時
及呂居仁知中原文獻之傳登紹興戊辰進士與
朱熹同年游張呂間以聖賢之言為必可行師友
之論為必可信初調建州崇安尉母喪不行乾道
中召除金部郎官兼崇政說書名見言事御札俾
條奏嘗稱其有諫官御史才尚書楊傑陰附執政
欲督諸郡積逋以償內府貸銀師愈以為罔上擾
民持不可罷知饒州丐祠卒階至中奉大夫直煥
章閣爵金華開國男其為政仁恕而綱目整齊所
至卓卓可傳子瀚孫柏呂祖儉狀其行朱熹為墓
志稱其有本有文德
望隱然為東州之重

范溶

字茂寬賢良浚之兄以祖任為郊社齋郎歷
司理士曹知歷陽武康二縣權通判饒州溶

練熟吏事於決獄尤詳明在澶淵日有毆婦人傷甚者四十九日而婦人死日破骨法限五十日而創傷辜不踰月今四十九日矣脫不破骨能無冤乎生固不容剔肌以辨今死且腐骨可驗也驗之實止創傷遂得不死武康父老訴前令定物力溢故數錢千百十餘萬科輸不前欲更之吏白板已上郡須三載可改日是一日不可緩也立除其十之二繼列其弊白于郡追易前板民以為利

徐良能 字彥才蘭谿人紹興五年登進士第歷知
亡勤勸課不以土產供餽遺前政私增俸給盡削
去之聞者服其廉及為安吉則竭力以賑艱食之
民除水災之賦民于學宮記之為御史檢法官繼
除太常博士首陳預謹邊防精擇守令虔恭祭祀
之事由監察御史遷殿中侍御
史給事中封蘭谿縣開國男

黃中輔 字槐卿義烏人紹興中秦檜和議既成但
有言其奸者輒捕殺之中輔作樂府題太

平樓有快磨三尺劍欲斬佞臣頭之句檜聞大怒
踪跡不得而止居鄉每為讐家所挾將發之會檜
死乃免

王淮 字季海金華人登紹興進士調台州臨海縣
尉累遷右正言劾宰相湯思退無物望坐免

改秘書少監兼恭王府直講出知建寧府改浙西
提刑入見陳閩中利病甚悉淳熙二年除端明殿
學士簽書樞密院事兼叅知政事時諸將平寇有
功淮皆處置得宜上深嘉之八年拜右相兼知樞
密院事樞密都承旨王忬怙寵為奸淮極陳其罪
斥之章穎論事狂直上將黜之淮曰黜之適成其
名上說穎復畱時以荒政為急淮言李椿年老成
練達擬除長沙帥朱熹學行純篤擬除浙東提舉
上曰朱熹職事畱意淮言修舉荒政是行其所學
民被實惠拜左相龔頤以執政之客補官求諸銓
曹淮以為此門不可啓力絕其請上章求去加觀
文殿大學士判衢州淮力辭改提舉洞霄宮光宗

嗣位詔詢初政准以盡孝進德奉天勤民用人立政罔不在初對紹熙六年病卒年六十四贈少師諡文定但以嫺家唐仲友私怨乃擢陳賈為監察御史疏言近日道學之士假名濟偽請詔禁革熹用此奉祠遂落慶元偽學之禍人以此少之

葉衡

字夢錫金華人紹興十八年進士調福州寧德簿以獲鹽寇改知於潛縣治為諸邑最名

對擢知常州發廩以賑水潦命醫藥自隨以遍救疾疫除太府少卿遷戶部侍郎奏興鹽利絕私販累除樞密都承旨奏革馬政之弊措制民兵得治兵之要尋遷戶部尚書除簽書樞密院事拜叅知政事奏收守將帥必擇才以稱其職令戶部取湖廣會子實數盡以京會立限易之從之拜右丞相兼樞密使召對賜坐講論機密又問三代為政漢唐治亂衡對願陛下常以周公無逸為龜鑒年六十二薨贈資政殿學士

陳良祐

字天與金華人紹興進士調興國軍司下累遷左司諫首論會子之弊願捐內帑以

舒細民之急上從之軍民翕然上銳意圖治以唐太宗自比良祐言太宗政要願賜省覽上曰卿亦當以魏徵自勉又奏公侯貴戚椒房肺腑專利冒禁願言戒敕左相蔣芾丁外艱詔起復良祐言起復非正禮宜使之終喪事遂寢遷諫議大夫再轉為吏部尚書時議遣北使請地良祐奏請地乃起釁之端今之求地欲得河南曩歲嘗歸版圖不旋踵失之必須遣使則祈請欽宗梓宮猶為有名奏入忤旨貶端州居住尋移信州九年許令自便淳熙四年起知徽州再加敷文閣待制知建寧府卒

林大中

字和叔永康人登紹興庚辰進士調湖州烏程縣主簿遷知撫州金谿縣郡督賊急

大中請寬其期不從取告身納之求劾而去守愧謝許焉父憂服除知湖州長興縣訟牒未竟曲直不聽私解或謂恐滋多事大中日此乃所以省事之法也由是訴訟日稀用侍郎詹義之薦除大理

寺主簿光宗受禪擢監察御史論事無所迴避遷殿中侍御史兼侍講帝問今日群臣孰賢大中以趙汝愚對汝愚由是被名江浙西路民苦折帛和買重輸大中疏論之有旨減其輸者三歲除直寶謨閣知寧國府朱熹遺書朝士曰聞林和叔入臺無一事不中的去國一節風誼凜然當於古人中求之尋移知贛州寧宗卽位名還試中書舍人遷給事中兼侍講知閣門事韓侂胄使人通問因願納交笑却之會彭龜年抗疏論侂胄有旨侂胄與內祠龜年與郡大中請畱龜年經筵而斥侂胄外在不聽侂胄愈恨御史汪義端以論趙汝愚去侂胄引爲內史大中駁之改吏部侍郎不拜遂以煥章閣待制出知慶元府舊傳府有鬼祟大中謂此必黠賊亟捕治旣而果然併前政所失器物皆得之由是奸人屏息丐祠得請未行給事中許及之侂胄黨也承風繳駁遂削職歸與趙汝愚朱熹等俱入僞籍歸凡十三年優游龜潭別墅時事一不掛口或勸通書侂胄以免禍大中日福不可求而

得禍可懼而免耶及侂胄誅名見試吏部尚書擢端明殿學士簽書樞密院事嘉定元年六月卒年七十一贈資政殿學士正奉大夫諡政惠

應孟明

字仲實永康人登隆興癸未進士歷官樂平縣丞侍御史葛邲薦爲詳定一司敕令

所刪定官輪對首論南北通好疆場無虞當以民隱爲憂以邊陲爲警則政治自修紀綱自張次乞申嚴監司庇貪吏薦舉徇私情之禁帝嘉獎久之他日宰相進擬帝出片紙書二人姓名曰其一人則孟明也乃拜大理寺丞出爲福建提舉常平陞辭帝諭之曰朕知卿愛百姓惡賊吏事有便宜悉意以聞尋除浙東提點刑獄以鄉郡引嫌改使江東會廣西謀帥帝謂輔臣曰朕熟思之無易應孟明者進直秘閣知江府兼廣西經略安撫使之禁卒朱興結黨弄兵雷化間孟明遣將縛至轅門斬之以徇光宗卽位遷浙西提點刑獄尋名爲

吏部員外郎改左司遷右司再遷中書門下簽正諸房公事寧宗卽位拜太府卿兼戶部侍郎慶元初擢吏部侍郎卒贈少師孟明以儒學奮身受知人主官職未嘗倖遷韓侂胄遣密客誘以諫官俾誣趙汝愚固却不從士論以此重之

應純之

孟明子也與兄謙之茂之受業考亭之門純之嘉泰三年舉進士歷知楚州兼京東

經略安撫使收捕李全等所向多捷會李全來歸密請于朝謂中原指日可復時相史彌遠鑒開禧事不欲大舉但敕立忠義軍令純之節制既而陞兵部侍郎秋八月金人入寇力戰死之朝廷嘉其忠遣使葬祭

喻良能

字叔奇宋初始遷義烏之香山父葆光睦

窘藏之盜平婦翁亦死三子俱幼莫知金所葆光舉而歸之三子請奉數百兩為謝葆光雖貧力辭

弗受良能登進士第補廣德尉調鄱陽丞遷國子監主簿進忠義傳起戰國王蠲止五代孫晟通一百九十人乞頒之武學授之將帥孝宗嘉歎願侍臣曰喻良能質實平正御書其名于屏丁內艱服除以國子博士名兼工部郎官除太常丞兼舊職請外知處州尋奉祠而歸以朝請大夫義烏縣開國男食邑三百戶致仕

何恪

字茂恭義烏人父渠多材略睦寇竊發詣軍門獻策主帥楊維忠用其言以取勝奏補承

信郎監恩州酒稅營卒謀為變密白郡守而往誅其元惡釋其誣誤上功轉承節郎神武後軍統制劉光世辟主管本府機宜文字未踰月徑歸每謂人曰使吾二子文行有成勝吾擁使節疏侯封也恪與兄恢皆感勵而力學及同上春官恪中選恢欣然曰是足以報吾父矣遂謝場屋恪性好古藏書至萬卷博覽而工於文初主永新簿再調徽州錄事叅軍未赴詣闕上萬言書進興復二十策與

朝論不合歸治園築亭奉母為樂所著有南湖集二十卷從孫器噩器取進士終於廣昌丞善為古詩噩亦工詩有曲江集

呂祖泰

字泰然寓居宜興祖儉謫瑞州祖泰徒步

貶諸人籍口我雖無位義必以言報國當少須之今未敢以累吾兄也及祖儉卒乃擊登聞鼓上書論韓侂胄有無君之心請誅之以防禍亂又請誅蘇師旦名周必大語甚激切在宋史本傳中有旨拘管連州諫議程松與祖泰狎友懼相連及乃奏祖泰有當誅之罪縱宥不殺猶當杖黥竄之遠方乃命杖泰一百配欽州牢城侂胄誅詔雪祖泰寬補上州文學改迪功郎監南岳廟母喪無以葬至都謀於諸公得寒疾索紙書曰吾與兄共攻權臣今權臣誅死且不憾獨未能葬吾母為可憾耳乃卒尹王構具棺葬焉

潘燾

字無愧蘭谿人以祖任補官仕至中大夫直

秘閣廣南東路經略安撫兼知廣州以終其權知邵州日朱子安撫湖南與周必大聯章薦之稱其以問學持身以文雅飭吏囹圄屢空雖湖北徭寇犯邊而處置得宜民用安堵其為大賢所稱如此

喬夢符

字世用東陽人從呂祖謙學嘗作不欺論

大達當水衝居人歲苦霖潦夢符為築堤鑿渠人免水患號喬公街後守潮陽會宰相薦士十九人以夢符為首改與六院差遣尋除大理正奉旨鞫訊郭倬獄于宿州不畏權勢獄具除監察御史尋卒所著有西峴類稿十卷

陳黼

字斯士東陽人少從呂東萊游經術淹貫文章爾雅永康林大中聞其賢以女妻之登淳

熙八年進士恬靜有守以婦翁在政府力辭擢周大中薨乃累遷國子博士至著作郎會臺臣建議

朝士不曾作邑者不當遽典州乞授參議官黼遂
乞祠歸貧無室廬卒於永康寓舍有文集二十卷
子行可沿海
制司幹官

楊大法

字元範武義人登淳熙二年進士授知龍
游縣累遷監察御史尋除殿中侍御史冬

雷繼以淫雨上封事推明天人之理乞法孝宗敬
天治國以自警省除侍御史兼侍講乞置言事官
章簿以備燕覽內侍鄧彰等指使毆人至死奏行
法當自近始乞付有司竟獄事除國子祭酒兵部
侍郎請外除集英殿修撰知鎮江府乞祠以華文
閣待制提舉江州太平興國宮卒贈中奉大夫嘗
與朱文公遊往還詩
簡甚多所著有易說

倪千里

字起萬東陽人七歲能默誦九經諸子登
淳熙進士議論文墨籍甚開門授徒戶外

屢滿以縣最擢御史公饋不入門私書不出闕退
食蕭然如山居遷右正言以言事忤大臣除起居
舍人兼國史編修實錄檢討並兼侍講卒于位特
贈右文殿修撰階朝奉大夫子允文奎皆襟度都
雅詞章光靚
克稱其家

孫祐

字居敬東陽人淳熙十四年進士第三人累
遷太學正時寧廟拱默祐奏對慷慨亟蒙褒

獎且諭大臣擢用遷博士進監丞會京尹辱武學
生不以其道祐抗疏爭之不報遂請外知漢陽軍
尋知黃州憲湖南所至皆有善政嘗書真實心地
簡經法門八字于座右仕終兵部郎官所著有畸菴
集及大學講義子德之一名道子博學善屬文舉
進士中宏詞科仕終秘書丞著有續東萊大事記

馬王仲

字次辛本建陽人從朱熹游擢紹熙元年
進士乙科寓東陽遂為東陽人歷仕州縣

以廉能稱嘗知古郢撫循兵民捍禦邊寇郡賴以
安尋上祠請歸王仲議論典刑詩章閑雅所著有
得齊集孫世穎世綸
皆以王仲恩入仕

石範 字宗卿浦江人從呂祖謙游中紹熙元年進士第調奉化尉歲饑民將為變範賑之不誅一夫而定海寇為害範設計捕殺之改知麗水縣以憂去

王介 金華人從朱熹呂祖謙游紹熙初廷對言道學之禁有傷正人君子及復仇事光宗嘉其

直擢居第三又言壽皇挈神器授陛下孝敬豈可缺乎不報孝宗崩累疏激切寧宗即位介上封事

論即位未三月策免宰相遷易臺諫悉出內批非治世事遷太學博士時韓侂胄居中疑介詆已出

知邵武會學禁起諫議姚愈論介偽學之黨且附趙汝愚謫主崇道觀嘉泰初赴闕人勸入對自明

不聽蘇師旦謂侂胄欲相害亦不為動久之除度支郎官為丞相陳自強所惡不肯往見又以不禮

蘇師旦為御史所劾侂胄時議用兵極諫其不可介遂謫桂陽軍居住再徙封州卒檜死復官諡忠

愍所著北山集周易窺餘等編

喬行簡

字壽朋東陽人學於呂祖謙登紹熙四年進士歷官知通州遷淮南轉運判官列上

備邊四事再遷宗正少卿理宗即位應詔上書以謂賢路當廣而不當狹言路當開而不當塞治亂

安危莫不由此累拜叅知政事兼知樞密院事嘉熙三年拜平章軍國事封肅國公每以上游重地

為念請建節度安撫使提兵戍夔邊事稍寧告老卒于家年八十六贈太師諡文惠所著有周禮總

說孔山集

徐邦憲

字文子武義人紹熙中試禮部第一進士第三累官秘書郎韓侂胄開兵端無敢言

其非者邦憲獨首言之乞外知處州陛辭力諫用兵不可太驟侂胄既誅名對上言今日更化未可

與紹興乙卯同論秦檜專權天下猶可以葺理侂胄專權天下敗壞盡矣進尚書右司郎中兼太子

侍講寶謨閣待制致仕卒諡文肅

朱質

字仲文義烏人受學呂祖謙而卒業於唐仲友中紹熙四年進士第二人廷對春秋大義

以復讐為說孝宗大喜累官著作郎兼侍左郎官尋擢左正言左司諫皆兼侍講奏疏論邊事甚悉

及師出無功嘉定再和遂以謫去用累赦復官積階朝散大夫有易說舉要奏請詩文雜稿

李誠之

字茂欽東陽人鄉薦第一呂祖謙與學人為學者不與科場相妨嘉定中知蘄州作惠民倉

糴米數萬石實之十四年春金人一日破五關入蘄誠之時已逾滿代者不至欲先遣其孥歸聞寇

至而止州兵存者無幾金百道攻城勢不能支誠之激厲將士勉以忠義城陷子士允從子士宏力

戰死士卒感其義皆死無一降者左右略盡引劍自剄時年七十餘妻許氏及子婦若孫皆赴水死

事聞贈朝散大夫秘閣修撰封正節侯立廟於蘄陽賜名褒忠士允贈通直郎士宏承務郎妻以下

皆褒贈有差獨長子士昭先返家獲全以公喪歸葬于縣東七里東山之原

章如愚

字俊卿金華人登慶元丙辰進士與真德秀同榜累官國子博士尋改知貴州開禧

初被召上疏極陳時政因忤韓侂胄罷秩歸結草堂山中與士子講學遠近咸師尊之稱曰山堂先生所著有羣書考索六

十六卷文集若干卷

潘時

字德鄰金華人少受業於仲父良貴及長又遊張拭呂祖謙之門力學不倦以良貴任為

登仕郎出知興化軍歲饑募客舟予錢轉糴而寬其期莫有喻其意者既而糴者得以其間往返至

再然後及期則糴價已久自平而民不饑人乃服其有謀除直秘閣進直徽猷閣知潭州安撫湖南

再遷尚書左司郎中以疾辭歸卒朱熹為志其墓

李大有

字謙仲東陽人慶元二年登進士第判通州民苦旱大有相地勢鑿五狼山石麓引

江入河以溉之自是歲以大稔而商舶亦竟達城下爲通州無窮之利攝郡事吏持案白事例錢合自支送大有判曰有例可送無法可支悉却之入朝主管官誥院改太常寺主簿遷博士卒于官太有與弟大同極相友愛內外數百指猶同堂共食無間言寧宗爲大書怡怡堂三字以旌之子自勉以大有恩任州縣歷班行授江陰軍不赴自道以叔父大同恩爲常寧丞孫興宗由鄉薦知鄞縣

喻侃

字伯經義烏人登慶元己未進士第歷隆興

善訟侃聽必以情民退無後言凡訴臺部者必曰得宜春丞一聽死無憾陞朝奉郎遂請祠歸築室夫人峯下曰蘆隱所著有蘆隱類藁五十卷隨類錄二百卷初侃受經于陳亮當乾道淳熙間諸儒皆談性命而闢功利亮侃起而非之人皆未信其說侃獨力爲倡導使亮之門惡聲不入于耳而高名頓出世儒之上皆侃之功也已而亮不爲世俗所容再下詔獄侃極力營脫人尤義之

康植

字子厚父仲穎官尚書吏部郎中居官以清白稱植用世科登嘉定進士累遷兵部郎官

出爲浙西提點劾奏平江守史宅之治郡無狀嵩之宅之兄也時爲丞相并連及之疏入理宗震怒尋悟乃徙宅之隆興而植提刑福建改轉運判官兼攝建寧府振水菑拯鹽弊政惠大孚赴闕奏事卒于建谿驛

胡巖起

字伯巖永康人登嘉定甲辰進士授知閩縣事卓行危論奇文瑰句士大夫皆自以

爲不及廣帥真德秀雅敬重之尋遷江西幕府平贛州之難全活數十萬人贛人作平贛錄紀之子居仁登淳祐甲辰進士累官知台州其文詞政事亦卓絕云

范鍾

字仲和蘭谿人嘉定元年進士歷官崇政殿說書進對帝曰仁宗時甚多事對曰仁宗始

雖多事乃以憂勤政治徽宗始雖無事餘忠至於今日上悅尋遷吏部郎中累官至淳祐三年特拜

左丞相兼樞密使贈少師
諡文肅所著有禮記解

王埜 字子文金華人介之子也嘉定十二年進士
淳祐間以察訪使出視江防自嘉興至京口

增修官民兵船守險備具江上晏然寶祐中拜端
明殿學士與宰相不合罷提舉洞霄宮卒贈特進

王寔 字定叟東陽人嘉定四年中絕倫異等喬行
簡喜曰吾為朝廷得一帥材矣理宗朝知濠

州光州戰守皆有功尋召為吉州刺史仍知光州
寔固辭曰士大夫當以世從道不可以道從世也

再授閣門舍人知高郵軍因時宰見讒提舉雲臺
觀尋改蘄州貽書丞相杜範乞瞰江置三城以備

邊寇不報尋卒寔嘗訓其子弟曰窮
理盡性學之本也有玉溪集行于世

虞復 字從道義烏人由太學登進士第以楊村酒
官上緝熙殿四十八規累官太常博士太宗

正丞出知信州時史嵩之開督府以御札盡收列
郡利權因上表進愛養根本之說大忤其意遂奉

祠歸退居東巖十有五年董丞相槐力薦于朝待
次入見改尚右郎官轉朝議大夫致仕所著有成

已等集八
十餘卷

朱元龍 字景雲義烏人嘉定十六年進士歷平陽
青陽尉調饒州司理叅軍德興令誣其民

董氏五兄弟溺死縣卒具獄上力辨其非辜得不
死後皆為名進士嘉熙元年以縉雲令治最擢幹

辦行在諸司糧料院輪對論三邊形勢理宗嘉納
語近臣曰朱元龍好臺諫官陞宗正丞兼權左司

郎官京局官時方括兩淮浮鹽致書執政以謂朝
廷行商賈之事廟堂踵諸闡之規使史氏書曰括

浮鹽自今始不可又兩上封事言上自宮禁朝廷
以及百官萬民之利病皆可痛哭流涕史嵩之疾

其直言斥去知衢吉二州遂以朝奉大夫致仕家
居十年卒有遺藁十卷及讀騷集子幼學用廕入

仕終臨江府
觀察推官

李大同

字從仲東陽人嘉定十六年進士累遷右正言兼侍講首陳謹獨之戒謂人主燕閑

情欲一肆如水橫流而莫之遏况復有宦寺之屬窺伺歡娛導淫勸侈以盡上心竊弄威福上為之

改容次論人主能容諫不能從諫大臣能聽言不能

願陛下勿以小異而或忽一語一言一政一事必求有以格天心而消災變至于用兵攻討尤切謹

重遷太常少卿與真德秀同在經筵進工部尚書寶謨閣直學士嘉熙端平之治大同之助為多所

著有詩文十五卷奏議十卷羣書就正六卷羣經講議十五卷通鑑隨錄六卷唐事類編二卷

葛洪字容甫東陽人少從呂祖謙學得義命一語終身服膺擢淳熙十一年進士第時方禁道

學為考試官獨以不背師訓對既足舉員又以不登權門遭迴下僚年垂六十始除籍田令守盱眙

陞提點江東刑獄按吏不法一章十七人雖親故不免入為樞密院編修官尋遷尚書工部員外郎

兼樞密院檢詳諸房文字進直煥章閣兼國子祭酒遷工部侍郎拜尚書兼侍讀進端明殿學士同

簽書樞密院事拜叅知政事贊討平李全援王素諫仁宗却王德用進女事以止備嬪御世多稱之

告老積二十六疏乃得請還鄉卒諡端獻贈太師信國公洪篤實嚴毅閨門肅穆所著有奏議涉史

隨筆蟠室集凡二十四卷

龔應之字處善義烏人嘉定癸未進士久淹下僚今安在臺諫即漏舍傳上旨于是驟陞歷踐

清要遷右史以大中大夫直寶謨閣致仕

王萬字處一浦江人嘉定十六年進士萬自少忠熙元年知台州萬至郡惟蔬食敝衣終日坐公署事至立斷吏無所售多改業散去民亦化之不復訟丁歲祲盡力拯之民無饑死者但言萬名莫不舉手加額曰吾父母也四年擢監察御史史嵩之

自帥入相衆莫敢言萬首論之會議相之事已決
 疏入除大理少卿萬即日乞休及嵩之罷相上思
 萬先見謂萬立朝蹇諤古之遺直爲郡廉平古之
 遺愛特贈集英殿修撰予錢五千緡田五百畝以
 贍給其家諡忠惠所著書名時習編有易詩書論
 語孟子中庸太極圖說及其他奏劄論天下事者
 凡十卷

何淡

字履常東陽人嘉泰三年車駕臨雍上舍釋
 褐累遷國子丞秘書郎以歿淡性恬靜好學
 居官多建明識大體遺書有通鑑手抄
 拙錄賢關漫錄武攸錄武林錄藏于家

馬光祖

字華甫東陽人之純之孫寶慶二年進士
 歷官安撫使知建康始至官即以常例公
 用器血錢二十萬緡支犒軍民減租稅養鰥寡孤
 疾無告之人屬縣稅折收絲綿絹帛倚閣除免以
 數萬計興學校禮賢才辟名僚屬皆極一時之選
 拜端明殿學士知江陵府既去而建康之民思之

不已帝聞令再知建康士女相慶光祖益思寬養
 民力興廢起壞知無不爲蠲除前政逋負錢百餘

萬漁利稅課悉罷減建平糴倉以利小民公田法
 行光祖遺書賈似道言其非便乞不及江東必欲

行之罷光祖乃可名赴行在遷提領戶部財用兼
 知臨安府浙西安撫使會歲饑榮王府積粟不發

光祖謁王王已無粟辭光祖探懷中帖曰某庄某
 倉若干王無以辭得粟活民甚多再以沿江制置

江東安撫使知建康郡民建生祠六所尋拜叅知
 政事樞密院事以金紫光祿大夫致仕卒諡莊敏

胡侁

字子先永康人寶慶丙辰進士累官監察御
 史內侍董宋臣竊弄國柄侁屢疏劾之奪職
 調將作少監即日棄官歸泊然不復以勢利經心
 後累名不起人稱雲岫先生所著有孝經論語釋

王夢得

字起巖金華人端平乙未進士調錢塘縣
 主簿兼領學事修廟學築江壩京尹白于
 朝連進兩資再遷知鹽官縣史嵩之當國或薦除
 掌故力辭未幾嵩之去國人服其先見除太常寺

主簿有薦于丁大全者欲引為
察官固辭遷寺丞尋請祠歸

范士表

字叔端蘭谿人丞相鍾之從子嘉熙戊戌
以別院亞選登第由廣濟簿歷宰湘鄉以

治行聞倅括又倅衢適郡民有嘯眾為亂者守懼
委印去人心大震士表攝郡事登城撫勞越半旬
元惡就戮十萬生靈賴以全活軍民歡呼曰我輩
若無范權州皆為魚肉矣杜夢炎誌其墓稱有全
活衢郡之功而賞
不酬勞公論惜之

吳世鳴

蘭谿人歷官提幹終錢塘縣令時元伯顏
駐軍江沙世鳴挺身出戰敗績死之今有

家祠五峯菴右神主
題曰勅封忠翊吳公

唐元章

唐良嗣元章字子換為文思院官良嗣
字昌之元章之兄子也為建德

軍準備差遣德祐失國二王南遷元章與良嗣起
義與復官撥砲手三千助之時元兵壓蘭溪元章

良嗣與戰于黃灘斬其將奚達魯遂進兵拒守嚴
州朝廷以元章知嚴州良嗣加江淮浙閩都統兵
馬使相持二年糧乏兵敗元章戰死于白雲寺前
元主帥以雙虎符招良嗣不屈戰死于仙霞嶺元
人皆稱曰義士今
嶺上有唐將軍廟

元陳萍

蘭谿人宋丞相宜中弟自中之子宋亡育于
外家楊氏元世祖物色宜中子孫得之奇其

骨相厚遇之萍刻意於學兼通梵教至于騎射亦
精其能賜名輦真伽刺思入侍東宮日見親幸成
宗時吐蕃強盛邊人告警以萍領吐蕃宣慰使帥
兵討平之悉定其地賜上樽襲衣獎諭甚至及武
宗朝以萍習知西事特命撫寧邊陲初入境有數
千騎整眾而來猝與之遇亟令從騎解鞍列坐環
以重車如城郭左右指揮外示閑暇敵疑有伏懼
莫敢前有以所戴白帽揭於竿首者萍引弓一發
中之遂驚駭而遁由是諸部服從不敢叛
入朝以功拜大司徒進階銀青榮祿大夫

趙大訥

一名良勝字敬叔浦江人起家泉州錄事

盜為引去

遷龍溪尹俗尚鬼疊石作屋奉紫衣神

黠民將為奸利

大訥授神江中移石以修孔子廟

庭縣多山畝洞獠輒弄兵暴掠訥調御得術服從

如良民俄遷永嘉永嘉計口賦鹽民以為病訥建

請令富商轉售之瑞安猾吏偽官書誣平民盜販

民自殺者三人訥徙之臨汀州城枕大江水暴岸

善崩訥列植巨木先以箕芒殺浪勢然後實土以

石甃之岸凡數千尺得不壞除溫台等處海運千

戶鵠湖羅陂皆盜藪時出為過客患訥用奇計剪

除渠魁餘黨奔散屢典劇縣皆有能聲數平反冤

獄民為

立生祠

吳直方

字行可浦江人年七歲母亡獨與其父寶

中書復北走京師在逆旅中凡三十六年困苦艱

難無不備歷志愈壯不少折至元末廟堂用事專

權肆虐人情震慄上與近臣謀罷其柄更新庶務

直方實協贊之上念其功名之便殿賜以黃金繫

帶趨授學士時脫脫為右丞相國有大政令多咨

直方然後行直方每引古義告之民被其賜者甚

眾未幾乞骸以大學士榮祿大夫致仕食俸賜終

身直方深沉有謀可屬以天下大事縱羣言沸騰

不少動為人謙下待人恒如布

衣時人以是稱焉子萊別有傳

劉良

仕元為常州萬戶府知事張士誠圍常州其

及還而城陷良不屈闔

門赴水死者十餘人

胡長孺

字汲仲永康人居仁子也長孺性聰敏九

子入官銓試第一宋亡歸隱至正中應求賢詔擢

集賢修撰因忤執政改教授揚州轉台州寧海縣

主簿善發摘奸伏人稱神明浙東大疫民死者相

枕宣慰同知脫歡察斂民錢一百五十萬賑之至

縣以餘錢二十五萬屬長孺藏去長孺覺其有乾沒意悉以散於民民賴以濟尋謝病歸隱杭之虎林山晚得疾卒長孺師青田俞學古學古師同邑王夢松夢松師龍泉葉味道則朱文公高第弟子也晚年慕陸九淵之為人每取其宇宙即吾心之言諄諄以告學者至元中與金履祥並以學術為郡人倡學者尊而仰之所著有石塘文集若干卷從兄之綱之純皆以文學名人稱為三胡云

吳思齊 字子善永康人其先居處州之麗水祖深至朝散郎思齊少穎悟以文章知名用父廕補官攝嘉興丞數以書予用事者言賈似道母喪不宜用鹵簿又言御史俞浙以論謝堂去職宰相附貴戚塞言路如朝廷何凡所為要以直遂其志弟知有是非不知有毀譽禍福也宋亡隱浦陽家無擔石之儲有勸之仕者輒謝曰譬猶處子業已嫁矣雖凍餓不能更二夫也所善惟方鳳謝翱相與放遊山水間晚自號全歸子學者尊其行爭師之年

六十四手編聖賢順正考終之事日俟命錄錄成賦詩別諸友遂卒

王安國

字靖翁東陽人寔之孫也侗儻有志略以功授成忠郎當入官會宋亡不果元始有

江南人心危疑未輯往往兵起安國以策干大帥高興歷陳撫綏之計署東陽尉能布威立信以馭其民玉山民婁覃等恃險為亂殺宣尉使陳天祐行省左丞史弼將兵來討安國詣軍前效謀親入賊窟手縛其渠魁以獻弼喜曰使吾兵不血刃而獲賊者爾力也延置麾下將薦用之以親老辭後寧海妖賊楊鎮龍反玉山境接寧海據為巢穴勢甚猖獗安國率鄉兵扼險要拒之賊乃從間道趨義烏遇官軍與戰賊眾奔潰遂成擒安國為人謹厚重然諾民服從之有訟不直于官而惟尉言是直鄉閭賴以安靜者二十年歿後民有肖其像而祀于家者

胡嘉祐

字元祚永康人至正乙未縉雲箬溪賊應君輔杜仲光剽掠通境嘉祐白邑令為防

禦計乃散家財集丁壯立保伍大書其幟為義兵賊偵之不敢輒犯詐遣其徒來降尋復旁出抄掠會官兵至嘉祐率其眾助討之賊退去兵駐邑中頗恣睢嘉祐扣軍門白主帥出旗樹于鄉約曰敢擾吾民者殺無赦士卒皆如約鄉民安堵令嘉其能上其名于憲府署曰義士俾與方允中合而拒賊賊畏之不敢越鯉溪而西歲丁酉正月賊寇武平合德嘉祐與戰大破之逐北數十里二月丙午戰于前倉又破之又明日賊復至與嘉祐遇于占田嘉祐盡銳以戰顧謂允中曰賊眾我寡惟死問耳不可退而覆也自辰至午戰酣不解方允中呂伯川歿于陣嘉祐自分不獨生戰益力厲聲罵賊不旋踵

唐元嘉

字德顯以進士釋褐授仁和縣丞至正末從左丞相答刺軍節制金陵兵敗被執不

屈而死

蘇友龍

字伯夔金華人嘗學經於許謙汀寇謀襲臨漳遣友龍督長吏為備長吏欲籍民為

兵友龍曰民不知兵久矣一旦籍之此非禦盜是增盜也閱兵籍得放逸者二千使帥之擊賊竟獲其首禍者紅巾犯杭州惟叅政樊執敬坐堂上以死自誓友龍說曰明公以身死國義則得矣如一城生齒何今城中眾不下數十萬公庫金帛以萬計與其委諸盜曷若募民使戰耶戰而不勝就死何晚也樊不能從上馬迎敵而死友龍與椽李樞謀召民殺賊殺一人者即攜首受錢二百五十緡民持刀爭奮數日之間獻馘充庭未幾援兵至破賊走之友龍絕口不言功授蕭山尹啓常平倉以賑餓者僚屬力沮之友龍大言曰啓天子粟活天子民有何不可儻有譴責吾自任之民賴以生者蓋數萬計叅政石抹宜孫分省處州請友龍與俱友龍勸其禮賢下士安輯流亡招徠羣盜撫之以恩眾心翕然

明劉辰

字伯靜金華人慷慨負氣節明太祖兵下婺城辰首上謁署為典籤奉使方谷珍令左右

飾二美姬以進辰峻却之李文忠開省于嚴辟辰參其軍事大將葛俊當祈寒集丁夫浚城濠民苦之將為變文忠欲臨之以兵辰請往諭以大義後悔聽命事遂解知鎮江府濱江田八十餘頃歲久淪沒仍責賦於民為請于朝除之京口關廢舟楫不通乃自京口至呂城百二十里濬淤塞修閘壩公私便之漕河源淺易涸恆仰練湖以益水湖有三斗門久廢亦修築之於是漕舟既通而湖下之田亦稔浙人轉漕道其境上死者收瘞病者給米以小舟送出境賴全活者甚眾永樂元年召修高廟實錄凡當時戰伐克捷之功宿將舊臣有所不能盡者歷歷言之聽者如目睹其事考之記注無不懸合書成超拜江西布政司左叅政兩潞江溢畿民為盜檄郡邑勸富民出粟以貸者官為立券期以來年償本蠲其役以為之息民遂相安南贛諸府荒田糧六萬餘石有司歲仰取於民民不堪

命辰以聞悉蠲其額卒年七十八所著有國初事蹟子徵博覽能文著金華名賢傳

陳顯道

字如晦東陽人好學明經旁通天文地理律曆兵機試鄉闈不偶乃棄去謂人曰大

丈夫要當以勳業垂名竹帛安能與羣兒爭長於鉛槧間耶元季兵起散家財結義旅以衛鄉井歲戊戌明祖下婺城駐兵赤松宮顯道詣謁陳濟世安民之略畱置左右叅決大事時方國珍據台州明越未下特命顯道往諭至則國珍納欵明祖賜顯道手劄及和其詩以寵嘉之復遣諭國珍兄弟納土入覲歷官至尚寶司少卿以忤旨出知臨洮府俄召復職卒帝悼之令官造墳致祭護喪歸葬

呂文燧

字用明永康人元至正間括寇為亂郡縣

合謀散家貲率眾以備之設禁令明賞罰諭以大義眾有固志賊陷縣治四出焚掠文燧使弟元明姪季文帥四百人迎之屢戰皆捷會官兵至與之夾攻賊敗走縣治以復帥府署文燧等以官職皆

辭後賊復煽饑民為亂文燧詣憲府白之即命文燧總制民兵討賊乃與其弟姪分道出兵屢戰皆捷因義士吳元祚敗死占田賊乘勝陷縣治文燧兄弟合兵擊賊走之進至上黃橋賊大奔潰時行臺遣都鎮撫邁里右恩帥師專征將與會兵方岩賊掩至松明橋擊却之又陣于剝棕嶺以逆官軍諸軍四面夾攻賊遂大潰枕屍三十餘里諸將分道窮追於是賊降地方悉平論功加文燧等官復皆辭不受及明祖下婺城文燧籍其眾歸附授永康翼左副元帥兼知縣事遷中書管勾轉嘉興府松江民亂襲嘉興文燧使告總帥李文忠遣兵擒獲諸將欲屠城文燧力爭止之入朝差往諭婆國行次興化卒于驛舍

吳志德

浦江人元季盜起偕蔣可大協謀倡眾扞禦民賴以安歲戊戌行省左丞李文忠帥兵下浦江志德可大率眾迎謁畱至麾下從取諸督處州論功授志德浦江翼左元帥可大副元帥

未幾皆以病辭歸志德與兄志道友愛甚篤誓不分異傳及五世皆同居

吳文秀

字啓明浦江人有膂力習騎射兼知韜略元末寇盜縱橫乃集鄉人累石為岩以扞鄉井及明兵取紹興文秀率眾來應以計開錢清濠兵遂大捷救免其家差役以旌其義後授宣武使卒于家

田子貞

名貞以字行永康人至丁酉寇起縉雲鄉民多奔竄岩穴且饑饉頻仍道殣相望子貞出粟賑之皆羅拜曰我等已在鬼籙賴公而生儻有所役雖蹈水火無恨子貞因結為義旅使扞鄉井寇不敢犯廉訪使者檄授巡檢辭歲戊戌明兵下浙東而七閩猶未歸附陳友定遣使持空名

敕授子貞武義縣尹子貞知天命有歸遂縛使者戮之而焚其書

石應雷

字雲中浦江人膂力絕羣弓挽十石應募授狼山把總擒大盜翁云飛陞保定叅將

調備宣府倚山設險屢著奇功陞
蕭鎮團練總兵人稱為石于劬云

宋濂

字景濂浦江人其先居金華之潛溪徙浦陽
青蘿山後幼入小學日記二千言為詩歌有

奇語人呼為神童元至正中用大臣薦擢國史院
編修官以親老辭歸入龍門山著書及太祖定鼎
金陵歲庚子遣使者樊觀來聘與劉基葉琛章三
益俱應詔入見上與之語必稱先生不名除江西
等處儒學提舉尋詔入內授太子經改起居注知
無不言補益甚多俄以疾告還家洪武二年徵總
修元史除翰林學士知制誥三年遷國子司業四
年以他事出為安遠知縣五年詔還為禮部主事
擢太子贊善凡一言一動皆以禮法諷諭使歸於
道太子每斂容嘉納言則稱師父仍書舊學二字
以賜上嘗問帝王之學何書最要濂以真德秀大
學衍義對上覽而悅之上作祖訓成命濂序之歷
陳帝王之道及創業之艱以致儆戒上稱善又奉
詔總裁纂修大明白曆一百卷擇言行之大者為

寶訓五卷濂在朝久凡郊社宗廟山川百神之典
朝享宴慶禮樂衣冠律曆之制四彝朝貢賞賚之
儀及勳臣名卿焯德耀功之文承旨論次咸可傳
于後世日本遣使求文以百金為獻却不受上以
問濂對曰天朝侍從之官而受小國金非所以崇
國體也四彝朝貢必令其使問宋先生安否上欲
俾叅大政辭曰臣少無他長惟文墨是攻今幸待
罪禁林其恩大矣臣誠不願居職任也上或問廷
臣臧否但言其善者不置又問否者為誰則曰善
者與臣交故臣知之否者縱有臣不知也凡上前
所陳答絕不以語人至於應制之作亦鮮畱藁署
溫樹二字於居室之壁有問及內事者指以示之
九年進擢翰林學士承旨仍知制誥兼修國史如
故上謂之曰朕以布衣為天子卿亦起草萊列侍
從為開國文臣之首俾世世與國咸休不亦美乎
十年准敕致仕復畱侍左右累月嘗廷譽濂曰古
之人太上為聖其次為賢其次為君子若宋濂者
事朕一十九年而未嘗有一言之偽謂一人之短

寵辱不驚終始無異其誠所謂君子人乎匪止君子抑可謂之賢矣瀕行賜楮幣文綺既歸歲一入觀外此惟終日閉戶纂述人罕見其面十三年孫慎坐法被累謫茂州至夔門得疾不食臨觀化帖端坐而逝正德中賜諡文憲

李希明 字濬文東陽人父唐從許謙游潛心經史郡儒學教授所著有靜學齋尚綱齋集希明夙夙庭訓洪武中舉孝廉入太學舍選第一授伴讀侍

太宗于潛邸從容輔導甚披禮遇陞監察御史進江西左叅政時陳友諒餘黨依險縱掠朝廷將出師勦之希明奏乞矜其勢窘不得已者招撫不服典師未晚從之希明榜示流民爭先來歸卒以安業擢刑部侍郎卒于官

何士英 字子文東陽人洪武中舉人材授知平涼府以親老乞歸忤旨謫廉州判官永樂初

起知平涼府編氓相慶以為重得慈父母母會主者較郡庠虧數千石士英方自劾民爭輸之如數考滿去父老遮留載道御屏記廉吏十八人士英居其首陞兩淮鹽運使遭母喪吏部尚書蹇義以其廉奏欲奪情堅辭終制起復泣前職始終一節致仕歸卒

吳沉 字濬仲師道之子蘭谿人與兄深傳其家學名重一時洪武初召為翰林待制陞編修轉國子博士以文學被寵眷官至東閣大學士禮遇亞於宋濂後以懿文太子之故宮人讒之逮械至京太子營救不能免竟死於罪朝野憐之

諸葛伯衡 蘭谿人性清介持名節少時嘗從鄉先輩游獲聞前輩緒論精求實踐鄉里咸推重之洪武初以薦授北平雜造局大使不以家

累自隨出入無車馬遇雨輒草履行泥途中遷趙州吏日州有建峯廟廟有青蛇惑人凡入人家必有禍伯衡殺青蛇罪巫者以左春坊大學士董倫

薦召問治道對以聖明之世紀綱正而法度修民皆安業但廉耻之道輕耳上大悅擢陝西叅議後改廣東叅議卒于官

吳履

字德基景奎子也蘭谿人後邁有奇才爲文學班馬尤工行草洪武初以有司薦授南康

縣丞推知安化縣陞知澠州召還遂謝事以歸其在南康日民有王瓊輝仇里豪羅玉成集衆相攻履一言而使釋憾安化土豪多糾民爲兵旣盡降有萬夫長易俊原者獨負固不服江陰侯吳良將出兵討捕履請以計致俊原侯從之民得免于兵禍後知澠州萊守欲責民償官驢之孳息履謂國家富極海內豈少數匹驢耶守乃止山東民願以牛羊代秋稅官從其言履謂牛羊有死瘠患不如納粟便獨收粟後他縣皆破家而澠獨無患其爲政類如此

董仁仲

洪武中知莆田縣涖政精勤而持之以公於民一無所取公庭鞭朴雖設不施民大

悅服後卒於官貧不能歸葬尺相與營墓於邑之西劉山焉

王禕

字子克義烏人師事黃潛潛屬以斯文之任隱居青巖山太祖取婺徵至行在禮遇之語

必稱子克而不名及進平江西頌上喜曰吾固知浙東有二儒者卿與宋濂耳學問之博卿不如濂才思之雄濂不如卿除禮部郎一朝禮制多所刪定尋出爲南康同知上卽位召還議禮出剡漳州詔修元史總裁又自任以筆削之勞書成拜翰林待制兼國史院編修官預教大本堂歲壬子雲南梁王弗賓詔公招諭廷臣皆危之公獨欣然就道及見梁王爲陳天命人心吉凶從違之理將降會元遣孽立于沙漠遺脫脫來徵糧知其通於中國也欲迫殺公以自明公用是羈縻者二年脫脫以威挾公公罵曰天絕汝元命我朝寔代之燭火餘燼尚欲與日月爭光耶復顧謂梁王曰汝朝殺我天兵夕至矣遂被害公著有華川集續東萊大事記以忠節死絕域謚曰忠文

朱廉

字伯清義烏人自少刻苦厲志淹貫經傳既而學文於黃潛遂以文章知名明初知府宗

顯器其材辟為郡學師及浙東行省右丞李曹公文忠開鎮嚴州尤加禮敬遂移長鈞臺書院未幾

丁外艱洪武三年詔修元史聖朝日曆起為纂修

宮史成拜翰林編修八年乘輿巡幸中都命廉扈

從至滁州比至中都進詩十首上覽而大喜曰佳

詩朕為汝和有頃召廉賜和詩六首當時以為榮

既而授經楚府尋陞長史久之病贖遂致仕而歸

嘗取朱熹語類摘其精義名曰堊學纂言其為文

謹嚴精密有文集一十七卷

朱文

字悅道義烏人從王禕遊學博才膽剛方少

許可洪武六年舉明經授知星子縣廉介自

持與學勸農奏其縣山高風冷春意來遲艱于採

茶上可其癸遂罷茶黃人皆德之後陞贛州府同

知盡心撫綏秩滿民遮道

離留至今贛民祠祀之

王紳

字仲縉義烏人聰明好學從學於宋濂濂教

濂器之曰吾友王待制其有後乎紳事母盡孝及

卒哀毀踰禮蜀王聞其名聘至藩府待以賓禮紳

念父禕持節死雲南遠在萬里外乃請于王乞往

求遺骨王憫而資其行既至訪求不獲遂於死所

立木主號慟奠祭聞者泣下有滇南慟哭記以著

志既還王禮遇之益至未幾以文行薦於朝召為

國子博士橫經講解六館翕然卒年四十

有一所著有繼志齋文集二十卷行于世

龔泰

字叔安義烏人領洪武丙子鄉薦仕至戶科

都給事中建文壬午靖難師逼與其妻訣曰

國事至此我自死矣爾第攜幼穉歸急則俱投

于井無自辱也語未畢宮中火起泰赴之道為兵

校執送金川門驗非奸黨中人釋之泰遂自投城

王稔

字叔豐義烏人自幼潛心勉學博覽羣書侍

父入蜀遊學京師及父歿扶柩歸葬終喪復

登方孝孺之門以卒所業文行重於士林及孝孺

被刑很籍人莫敢收稔與鄭恂潛至聚寶門外求

其骸骨以歸禍幾不測人稱其誼永樂中以儒士

舉預修郡邑志及採上二朝實錄事蹟以病蹟不

仕所著有青岩類彙

貝泰

字宗魯金華人自少以文行聞永樂初由太

助教尋陞司業超拜祭酒以文學受知宣廟召見

便殿賜御製招隱歌前後在太學四十餘年六館

之士翕然從化後致仕歸縣尹欲為造大司成

坊木石已具回謝却之所著有文集若干卷

邢旭

字景陽金華人父沂從范祖幹游以詞翰知

名與邢悅成濬俱嗜吟咏互相倡和號山中

三詩友旭學於家庭登永樂二年進士累官河南

叅政適歲旱澇修舉荒政民賴以安奏免二程子

孫徭役賜田上正統初陞四川布政革弊去奸撫

養軍民恩威並著十司王永壽董敏治兵交攻朝

廷遣帥討之旭即身詣其寨諭以禍福皆釋甲待

罪請遣子入質進馬謝恩師遂不戰解還致仕卒

蜀人追思惠政立碑成都三公廟祀之所著有退省集

章聰

字俊民金華人登永樂甲辰進士宣德二年

拜監察御史彈劾不避權貴嘗奉勅撫諭南

彝及監軍討罪西戎規畫得宜相率歸化朝廷嘉

其能陞廣西按察使奏徙南丹衛於賓州奉議衛

於貴縣士卒免烟瘴之患議置巡司於潯湖柳慶

要害之地民免團軍之擾陞右布政使尋丁內外

艱卒

于家

杜桓

字宗表金華人領鄉薦以親老家居就養不

赴春試博極羣書登永樂進士授紀善悉心

輔導知無不言王禮遇之未嘗稱名後乞致仕桓

學識醇正制行剛方為詩文典雅俊逸所著有尚

新江通志

儉齋文集

馮傑

字孟英金華人永樂中貢入太學時方營建

正統中薦陞監察御史巡福建奏減銀課巡兩淮

奏寬鹽禁人多懷之景泰初廣東盜起州縣騷動

朝論以傑歷練老成陞授按察使隨方撫捕未幾盜平致仕歸

潘璋字栗夫金華人由進士任工部主事監稅刑

類尤尊禮儒先尚書周洪謨謂全蜀之士仰之若

山斗愛之若父母陞陝西副使仍董學政未幾卒

蜀祀名宦祠郡祀鄉賢所著有靜虛齋稿

邵玘字以先蘭谿人登永樂丙戌進士擢監察御

史歷江西福建按察使陞南京都察院左都

御史時宣廟患京職多曠欲舉察之任顧佐於北

任玘於南故特召於福建授以都憲考察之命玘

居家有孝行在官以威嚴稱遇事善

斷所至削妄費黜貪庸能舉其職

龔全安字希寧蘭谿人隨父戌紹興遂入郡庠領

中歷都給事中陞通政司左通政正統十四年與

同邑吏科給事申包良佐御史童存德扈駕北巡

並死于土木之難英廟復立加贈全安通政使遣

守臣致祭于家官其子廷輝為刑部照磨良佐存

德亦各恩蔭一子俱祀鄉賢

謝忱字惟壽永康人貢入太學領應天鄉薦登永

樂壬辰進士授監察御史遇事敢言不避權

貴九為巡按詰奸禁暴無所假借人稱謝閭王漢

府謀不軌廉得其實以聞命勅之賜反屬男女吳

德等四人因忤尚書蹇義陞四川按察司僉事歲

歉民多抵法忱憫之為求可生之途適地方多虎

患示以得虎皮三者免一命人爭捕之於是虎

患悉而民命以全卒于官歸葬日行李蕭然

浙江通志

卷之三十三

人物

八十三

杜瑄 字季璋東陽人由永樂鄉薦入太學會詔選有學行者補侍從授兵科給事中立朝詳謹

陞廣東按察司僉事治獄平允嘗巡海道邏卒獲賊船內四十餘人俱飢困濱死議者欲棄于海瑄

曰不可恐誤無辜也令飲食之明日俱甦詢之乃寧波追賊軍艘遭風飄溺南海耳遂移文遣之陞

陝西副使以疾乞歸

吳正 字希純東陽人端莊淳厚言行可師正統初以薦擢中書舍人入文淵閣侍經筵講官預

修玉牒上嘉之賜御書一車尋陞吏部稽勳司員外郎崇祀鄉賢

吳昉 字世望東陽人鄉薦至京特拔吏部文選司主事考察公敏門無私謁上賜白金獎賞以

峭直忤權貴適戍山西會靖遠伯征雲南舉叅軍務因勸給還所掠子女八百餘口衆戴其德立祠

祀之以功復銓曹年九十七具朝服賦詩謝恩卒

潘靖 金華人正統初知安溪縣恤災獨抑豪右逋逃者來歸強復者懾服邑嘗大飢靖禮諭巨

室各輸羨餘以賑貧乏全活者衆後召為御史未赴卒

樓澤 字濟霖東陽人登正統乙丑進士初授刑部主事正統十四年扈駕北征師潰于土木死

之天順初查褒忠節因無子故卹典弗及云

盧楷 字中夫東陽人天順壬午以春秋中浙江鄉試第一工詞賦入太學與商文毅輅姚冢宰

夔等為六元時祭酒邢讓陳鑑司業張業以典簿侵饌錢抵罪楷方歷事中書奮欲救之或曰無益

且取罪奈何楷曰師生猶父子也父既溺子可懼罪而不號呼以救之乎遂率同監百餘人伏闕上

奏明三人之枉京師咸高其義可方唐之何蕃云卒年三十四所著有可齋集若干卷

趙年 字有年初補蘭邑庠生因湯溪初設縣撥補湯溪縣學生登成化乙未進士授行人屢奉

命行祀事於諸王府凡饋遺一無所受在陝西值歲大歉減廩餼為藩臬諸臣倡以賑民飢全活甚眾陞工部營繕司員外監本部厥除革宿弊中貴憚之差監蕪湖木稅歲積羨餘且萬金悉歸之公帑代還管理五城九門事執法嚴正不可犯人目之為趙鐵面云又轉都水司郎中適中貴有希旨將于衢州府織造金龍絹者年抗疏極言不可上允其奏中貴誣以鬻所乘馬多索價值下詔獄竟坐除名

童俊

字邦英蘭谿人識達天人學窮理奧由舉人知嘉定時民事田獵不知耕稼公教以力穡至今祀為稷神又知趙州出富民陸氏之冤獄識拔進士安魁於寒微因內臣王振之橫逐致政歸民攀車泣畱共立生祠祀之歸家養殮不繼子撤其几以易米則持卷于手從容謂門人曰何居將以辦早厨耳處之怡然日夕考索經傳作書韻會通若干卷士論評其家學精則童品博則童琥其

兼之者俊也

章懋

字德懋蘭谿人自號闇然居士學者稱曰楓山先生幼穎異其學根據六經而尤邃於易天順壬午以易魁薦于鄉成化丙戌會試禮部第一釋褐改翰林庶吉士授編修甫踰月有旨元宵張燈翰林賦詩懋具疏諫忤旨杖于廷謫臨武知縣尋改南京大理評事陞福建按察僉事盜起秦寧懋托以清軍行部出其不意遂擒之沙尤饑民肅聚將為變急發廩粟賑濟迄以無事因觸瘴成疾懼貽親憂疏乞致仕時年僅四十有一既歸杜門養親四方之士爭來就學執經者常數十百人士大夫過縣者必造其廬以考德問業如餘干胡居仁南海林緝熙嘗不遠數千里而至貧無供具則刈蔬脫粟餉之不以為嫌弘治辛酉奏起為南京國子監祭酒明教化飭矩矱勵廉恥諸生翕然向風正德丙寅應詔陳言治要五事曰勤聖學隆繼述謹大婚重詔令敬天戒又乞致仕不待報遂

歸項之逆瑾怙權公卿多遭斥辱人乃服懋先幾云瑾既誅中外交薦擢南京太常寺卿辭更擢禮部侍郎又辭遂聽以侍郎致仕嘉靖改元即家拜禮部尚書且遣行人存問而懋已屬疾卒年八十有六贈太子太保諡文懿

童品

字廷式蘭谿人幼與楓山齊名成化甲辰貢于學丙午舉南畿又十年丙辰始登第或勸之減年通籍曰吾早學而晚達命也敢為欺乎初授南武庫主事再遷武選員外郎武庫頗有羨餘同官以啞庫諷之公不可有指揮詭以文憑失水求之任侍郎力庇之公力爭聲色俱厲尚書解之曰童員外義理勇也居官與楊廉邵寶蔡清葉釗余祐相友善僅兩考遂引年致仕家居十九年以讀書喪明貧不自振而卒

陸敬

字溫天蘭谿人由舉人授萬載知縣愷悌有為豪巨為盜者敬薙剪不遺力歲饑民多逋

負移檄交至敬即自械繫民咸願身代敬曰父老無自苦吾寧以此去無忍爾輩流離也勸課學徒撫存孤寡皆心誠惻怛後以謗調大庾民痛哭遮畱治大庾語無躁妄遇事堅執不為詭隨處劇繁以簡靜愛民禮士敦雅有古風陞福建漳州府通判去後民恆思之

黃傳

字夢彌蘭谿人生而穎異過日成誦從楓山成進士授江陰令興學勸禮威強梗惠良善精敏稱神明奉詔當行民奏畱之三年授御史朝貴聞其風裁相戒斂避以疾歸疾劇無資殯家人尤之公因賦詩曰病餐藜藿神尤壯臥死溪山鬼亦清所著有白露集江陰志

趙良

字時中永康人登成化己丑進士授給事中鯁介敢言因災異條陳謹天戒重國本恤民艱鎮邊境四事忤旨杖于庭幾斃歲丙午左右請立宮媵所生二歲于為太子抗疏力諫止之及孝

廟正位東宮又請簡正人為師傅以職輔導滿九年陞本科都給事中先是重臣王越被劾銜之譖于中官汪直誣以言事不謹謫四川廬山令弘治改元擢江西按察司僉事陞副使卒于官

徐讚 字朝儀永康人登弘治乙丑進士知棗強縣備賊不敢犯民飢捐俸募粟作糜食之富人義激爭先發廩所全活以萬計陞山西道御史理鹺長

盧兼巡河道逆瑾餘黨楊虎等流劫開濟間熾甚讚以計擒之械送京師巡按江西勦湖寇徐九齡

等數百人論功陞俸一級時宸濠結羣寇以自樹此舉實先剪其羽翼也宸濠之變治兵給餉遣戰艦出江為上流聲援濠遂挫於安慶不能直窺南

都加陞河南左叅政仍掌府事在蘇凡七年其政以愛民為本後蘇人舉祠名宦歷雲南左布政使

以母年八十疏乞終養歸家陞都察院右副都御史撫治鄖陽改撫河南值歲饑盜起條陳救荒三

事又陳疏便宜四事事皆施行陞工部右侍郎丁

母憂哀毀屬疾卒讚賦性寬和雅量汪涵終身未嘗有怒容或擬之劉寬婁師德云

潘希曾 字仲魯金華人璋之子也登弘治壬戌進士選翰林庶吉士授兵科給事中故太監

汪直義男汪鈺乞陞錦衣衛鎮撫帶俸守塋希曾首抗疏論之謂內臣不無後而強求世祿之恩義

男本異姓而欲冒他鬼之廕既又疏勸上隆大孝勤聖學節遊樂遠佞倖入事逆瑾遂謀中傷之乃

差往湖貴二省計處邊儲還瑾矯詔杖之闕下除籍為民瑾伏誅陞刑科右給事中奉詔持節往使

安南轉禮科左工科都陞南京太僕寺少卿歷晉都察院右副都御史提督南贛汀漳等處軍務惠

州黠賊賴貴聚眾肆虐進兵勦之空其巢泐頭餘賊曾蛇仔七巢並與流毒江廣發諸路兵夾攻賊

眾大敗名入工部右侍郎會河溢沛縣漕渠淤塞或議開昭陽湖新河命希曾兼憲職往代之希曾

議以沛漕之淤塞由黃河之旁衝黃河之旁衝由上流之未疏今宜疏支河築長堤然後鑿通沛漕

自無復淤之患僅用河夫二萬餘不期年而工成
 既而河溢境上西徙三百步希曾乃命穿故河廣
 十步以通水稍截徙河逼之東仍於徙河兩崖下
 埽以漸相屬盡復其舊論功升俸一級召入改兵
 部右侍郎未幾遷左
 卒于官贈兵部尚書

章拯 字以道蘭谿人楓山先生從子也自幼穎悟
 楓山勉以聖賢之學遂一意踐履造詣日深

登弘治壬戌進士授工部主事改刑部因忤逆瑾
 逮問謫梧州通判時土獠數百嘯聚馬平公單騎
 往諭獠遂解散瑾誅召為南京吏部主事再遷兵
 部郎中陞廣東提學副使振孤寒抑僥倖標示正
 學士習一變歷陞右副都御史撫治鄖陽等處治
 尚清靜民皆安之改總理河道時河決魯橋有獻
 議欲挽河使北漸復禹故道者拯議宜增卑培薄
 塞潰疏壅分殺其怒斯為實幹若羞出漢人下策
 欲求夏禹全功工役一興必致疲民誤國所不敢
 為也蒞事之明年山東大水廷議別遣重臣按視

商度得旨陞工部侍郎兼都御史仍治其事乃請
 浚孫家渡分殺河勢甫興工而夏潦驟溢言者論
 之不已改督視顯陵工程以盛應期代之別議開
 昭陽湖新河功竟不就更以潘希曾代之迄用拯
 請就陶於安陸伐石於唐子僅用銀一十萬兩畢
 事而以其羨歸諸內帑還朝陞尚書理部事時夏
 言建請分祭四郊拯偕僚屬上議乞如舊制合享
 忤旨鐫秩閒住既歸杜門不出人共稱其學本楓
 山直亮大節有古大臣風隆
 慶初贈太子少保諡恭惠

陸震 字汝亨蘭谿人從楓山先生學慷慨有大志
 以名節自砥礪登正德戊辰進士授泰和令

威惠並著振恤民艱邑遂稱治授兵部武庫司主
 事遷車駕司員外郎時江彬怙權車駕多巡幸震
 抗疏幾獲重譴已卯春彬復誑上南巡命下中外
 洵洵震遂與同官黃公鞏疏陳六事請斬江彬以
 謝天下彬矯詔下錦衣獄逮繫月餘鞏楷跪于廷
 五日三訊三杖而死時霾霧四塞晝晦如夜水溢

內海子玉河七鐵柱齊折世宗卽位贈太常寺少卿遣使諭祭錄其子有司爲立專祠祀之名曰褒忠體仁其季子也震係獄權奸必欲寘之死絕其食飲體仁甫髫年乃變服爲他囚親屬饋于父母徐以是強令承廕選通政知事歷臨江節推漳州通判涖官廉介有循政無忝先德云

唐龍

字虞佐蘭谿人游學楓山先生之門與章拯黃夢弼陸震董遵同稱高弟登正德戊辰進士授郟城知縣劇賊劉六等犯境亟集丁壯禦却

之擢監察御史出按雲南疏諫巡游及斥嬖倖不法事再按江西承宸濠亂後禁兵駐境內恣睢爲患亟疏請班師又請蠲租賦賑貧乏表忠義核實功罪輕重惟允陞陝西提學副使進山西按察使入爲太僕卿尋擢僉都御史總漕淮上所至皆有聲績以副都御史入臺進吏部侍郎總攝銓事未幾簡擢兵部尚書兼右副都御史總督三邊軍務至則賑貧恤災流徙來復御將士推誠置腹咸樂爲用乃簡兵三萬行邊耀武屢著戰功旬月之間

露布三上召還爲刑部尚書時都御史劉源清以勦大同亂卒過嚴郎中劉淑相忤執政皆坐重罪原情讞上咸得末減會降赦宥大禮大獄諸臣得放歸龍以母老乞終養復起爲南京刑部尚書未上改兵部加太子太保轉吏部尚書卒加贈少保賜諡文襄

李滄

字一清永康人登正德戊辰進士授南京工部營繕司主事督甃儀真司龍江關抽分廉

慎有爲人不敢干以私雖中官亦嚴憚之公暇輒與崑山魏校永豐夏尚朴講學窮理以求檢身之方一切世務泊如也卒于官貨馬質屋乃克斂鄉人高其風操率私錢爲樹坊以表之楓山章先生題其額曰清修吉士云

祝翊

字珍卿蘭谿人少從章文懿公受易後入太學中順天壬午鄉試授孝感令尋丁外艱服

除補羅田令縣界萬山中民習獷悍邑有大猾根株盤固翊廉知其惡具獄磔於市屬郡盜起白晝

剽掠翊密緝為內應十餘輩移檄徵諸路兵直搗其巢一旦盡殲之郡賴以寧擢刑部員外郎尋乞休歸卒年七十五祀鄉賢

唐鉞

字君錫蘭谿人博通羣籍自天文地理兵曆律諸書靡不探究其源委為文雄深爾雅有

西京體嘉靖辛卯舉於鄉授溧陽令繼守維陽分鎮瓜步會島寇猝起鳩工庀材指畫以具城櫓寇至卒以有備民賴以安例應殊擢為權要所阻再歲謝事歸

郭時斗

字文起蘭谿人以恩選授清遠知縣左遷兩淮鹽幕會稅銀解期甚迫上司檄以屬

斗斗列貧商良商頑商三等貧商蠲其徵良商令自立限頑商則催拘嚴比商咸感愧擢溱州府推官多所平反粵西大盜窟宅武弁冒功縛良民二十四人為盜制府梟其二斃於獄者四斗心知其枉白之監司盡釋其餘五指山刻賊韋公廩結連諸洞入寇斗密募忠勇授以方略盡行破滅當時

謂功不在王文成下尋以病乞休

盧仲佃

字出田東陽人嘉靖丙辰進士任晉江令時方苦倭患佃建議城安海居民拒守得

無恙改調福安邑新破佃請兵五千倍道而進繕治城塹招撫流亡日不暇給倭至三洋男女十餘

萬阻水不得渡佃以漁舟濟之已逼城城中人懲前禍爭走逸避佃令曰吾與若同死婦女出城男

子闌出者刑左右趾民乃止相持三日夜倭引去臺使者上其事陞比部尋陞兵部郎出守城都轉

惠潮副使調湖湘楚王薨武崗王謀署府與王戚共盜內藏相訐奏佃按王戚於法奪武岡府事江

陵相不懌調叅江右按治南昌寧州柯民民相仇殺寧守張其事以勦逆稱佃斥之柯卒解散守得

罪佃陞廣西布政使會有以誑誤謫者心疑佃與守比而構之是時江陵用事遂左遷備兵惠潮潮

故瘴鄉兼以流民據山寨為訑兵燹相尋菑癘大作佃諭降諸賊為編氓積勞冒瘴卒于官所著有

何莫軒
若干卷

王乾章

字順卿東陽人嘉靖壬戌進士授中書舍人轉山西道監察御史時宛平令以疆直

忤中貴獲罪御史顏公鯨抗疏極論坐奪官無敢救者章獨疏救之畱中疑叵測會閣臣申救得免

以陞政按山東除解額取盈外歲奇羨無所問遷四川按察司僉事訟獄旁午咸得其平轉江西布

政司參議分部九江暇日訂五經同異錄尋起福建按察司僉事時江陵柄政減藩臬諸司十之三

乾章兼視七道事凡所屬獄囚多開釋之福安治環大海颶發溺者萬餘人出金掩骼為文弔之擢

雲南布政司參議以告老歸所著浪游集行于世

程文德

字舜敷永康人登嘉靖己丑進士廷試擢第一甲第二人授翰林院編修繼侍經筵

進無逸殿講章大意以言事忤旨廷杖下獄謫信宜典史當道為建嶺表書院兩廣名士翕然尊之

遷安福知縣丁外艱歸服除授兵部車駕司郎中會北邊多事上禦邊四事多見採用尋陞廣東提

學副使又擢南京國子祭酒黜浮文敦實行未幾丁內艱去服闋起為禮部左侍郎癸丑述職門無

私謁詔知貢舉公明周慎竣事加翰林院學士掌詹事府事是歲兩直隸河南山東四省大饑開例

納銀賑濟文德具奏救饑如救焚溺緩則何及聚銀為難食物頗易宜隨民所有凡可以充饑者悉

得輸官散給上可其奏勅諭四省於是輸者踵至四省之民得以全活時大內歲例大祈文德撰元

詞多寓諷諫忤旨落職家居杜門謝客以著書為事比卒遺笥蕭然質產始克就殮加贈禮部尚書

諡文恭

王崇

字仲德永康人嘉靖己丑進士授吏科給事中直言讜論一時著稱寇犯寧夏總兵趙英

逗留敗績欲以賄脫崇奉命往正其罪朝論快之謝駙馬侵馬場崇時巡青發覺之詔還縣官貴戚

畏其直出為廣東僉事轉山西副使備兵井陘崇親簡閱明賞罰兵雄于諸鎮有緋衣金帛之賜轉湖廣參政時諸苗攻陷印江崇破之聽約束陞貴州臬司尋轉山西左藩以風望擢中丞撫山西繕城厲兵倡勇敢嚴斥埃寇至輒以捷聞名貳本兵丁巳湖廣川貴苗民犯順廷議推老成練達者往平之乃命崇以原官出鎮二年苗穴底定廕一子以徵疾致仕文章汪洋浩瀚為世所宗有文集行于世

周煥字克光浦江人資性穎悟博學能文章居家以孝友稱嘉靖戊午由貢授福建永福知縣

居官兩月倭寇猖獗攻陷郡邑城池所至風靡煥率民兵晝夜督戰斬獲百餘級賊退憤甚益眾併寇煥勵志堅守月餘力竭糧盡外援不至猶披血巷戰死之時一家死者八人福民白于上官立祠特祀扁其額曰忠勇文移本縣為申司府允議列祀鄉賢

張元論字伯啟浦江人博通經史尤精于春秋嘉靖丁未登進士授工部虞衡司主事廉介

自勵奉命董修內厰內官覲多估工料論直拒之工完羨餘悉歸于上時有誣論他事聞於銓司者銓長張華陽面詰之曰有諸論荅曰有之竟去其官而已不必問也華陽服其高雅誣者喙息尋轉本司郎中以忤權要左遷常州通判丁父憂歷守吉安桂林永昌三郡清白不渝咸著政績擢雲南憲副奉表北上以疾卒於途居官之日家積餘租悉以周族之貧乏及不能娶者羅念菴鄒東廓甚禮重之所著有詹詹集蓬底浮談等書行於世

姜綱字幼章金華人號方竹金華籍蘭谿人大理司務芳之子性剛方由進士任南刑部主事

讞議詳明嘗請除方遜志奴籍理高介夫冤訟以議大禮與時宰不合轉工部營繕司郎中別蠹斥奸為吏卒所憾共誣搆用官物下錦衣獄尋得辨釋落職家居淡薄自守不預外事亦不以營家為

念其自贊曰方不就曲竹不諧俗知我罪我方竹方竹

錢學孔

字以時金華人嘉靖癸未進士授大明府推官詳讞明允擢北臺御史巡視皇城京

師肅清奉差刷卷疏五事切中時宜清軍蕪松等處奏行補伍之法差滿復奏置巡江設兵構等四事奉命按順天疏與革四議上俱採納又疏上金華何王金許四大儒宜從祀以崇正學畱中不行尋陞大理寺少卿僉都御史巡撫保定地方會雷變自陳引疾歸家居以孝友稱歷官二十餘年蕭然四壁鄉人高其清節

馮亮

字執夫金華人嘉靖壬辰進士授丹徒知縣縣當孔道疲於供億亮務裁節以裕民什次

其六七歲稜以庫積贖緩代輸白糧當道難之亮持益力竟得請擢兵科給事中轉都給事疏奏清軍理餉建城堡浚濠塹數事悉見施行又嘗劾宦官高隆成國公朱希忠怙寵權貴歛蹟尋陞河南

叅政會歲大侵民相食亮捐俸賑饑全活甚眾以

治行卓異擢四川按察使風裁凜凜貪吏悍服後

以疾乞歸次夔州卒年僅四十有四夔守為視殮解其囊止四十餘金清介如此

章适

字景南蘭溪人少孤事大父母曲盡愛敬師名儒凌瀚步趨不違沉潛禮義淳如也舉進

士授行人擢禮科給事中時世宗未有倦勤意無敢言及儲君者乃慨然曰事有大于此者乎疏雖忤上旨而風節凜然殆人所難未幾引疾告歸竟不起家無羨儲蕭然一布衣也

徐用檢

號魯源蘭溪人嘉靖壬戌進士初授刑部主事調禮部儀制司疏請上親行郊祀又

請太子出閣讀書出補山東臬副專抑豪右遷江西叅議尋擢陝西督學釐正文體得士尤盛轉蕪

松叅政吳江災民喧擁軍門大中丞欲繩以法檢進曰人有急則呼天呼父母此嗷嗷者是也竟從寬釋丁內艱廬墓四載孝感產芝服闋補福建兵備偏將盧爵以私事杖卒一軍洵洵檢逮首禍宥

脅從眾乃定陞廣東按察使暹羅占城等國航海商粵眾且近萬檢設法以防之其患遂彌遷河南布政嚴蠹耗以給宗室買學田以贍貧士陞太常寺卿通籍三十年清白之操始終如一

陸鳳儀

字舜卿蘭谿人登丙辰進士初任餘干知縣性端方請謁不行除火耗絕饋遺歲祲

賑饑全活甚眾遇湖盜嘯聚兵不血刃布誠曉諭盜各解散去之日民置碑思焉擢南垣抗疏不避權貴以直道不容罷歸居鄉二十載足蹟不入公門起禮科給事中命甫下而卒中外惜之

唐汝承

字伯寵蘭溪人性好讀書事父母得其歡心舉嘉靖壬午鄉薦仕跡公門授應天府

通判郡多貴戚豪梁隱漏侵匿承至發奸摘伏剖决如神徐勲臣家有催租者同某臥夜死欲居為奇貨承識無傷立雪之徐不能奪署篆溧陽滯訟冤獄一決即平有兄弟爭產互訐承導以難得易得之義感而相讓調順天通判霸州盜發奉旨署兵道事勦撫有功擢常州府同知憫軍政之弊彈

心清刷視府篆值旱承虔禱嘉山雨即夜澍又先發賑濟民賴全活至今尸祝之

趙志臯

字汝邁號澱陽蘭谿人嘉靖己酉舉於鄉從遊錢緒山王龍溪之門登隆慶戊辰進

士奉命冊封吉藩賜予却不受充經筵展書官教習內書堂陞侍讀以切直構怨出為廣東按察副使攝泉篆持平不苛既歸治室靈洞山頗以詩歌自娛荐起為解州同知尋轉南僕丞歷晉南北吏部侍郎上久不視朝臯上保聖躬疏特旨簡臯入內閣居首輔十餘年不植黨亦未嘗私薦一人屢疏求歸上皆慰留不允臥疾三年嘗從枕上草疏其大者如曹侍御以直諫論罪懇疏力救得免等類卒謚

文懿

胡僖

字伯安蘭溪人幼穎異嘉靖己酉舉于鄉己未成進士丁內艱服闋授刑部主事轉主客

郎中進儀制郎會諸王襲封次子欲得郡王封僖以制不合持不可王子以數萬金賄大璫互相扇

謗僖勿為動權璫乃授旨吏部出為湖廣叅議楚
 比歲大水廉得虛稅蠲額十之四民感悅陞雲南
 副使蒞滇四載所至桁楊不設囹圄若洗深山窮
 谷聞胡使君名輒呼佛子以忤權要拂衣歸里凡
 貧不能婚葬者竭力資給之性至孝有治具延飲
 者必延其父始忻然偕往母鄭氏原產官塘東後
 歿往來不禁哀慕因建橋以志
 思焉至今名其為思親橋云

程正誼

字叔明永康人隆慶辛未進士司理武昌
 屬邑向無雉堞誼建議築五城陞刑部癸

未分臬雲南時士司八百老樞等負固誼開誠感
 諭遂悅服乙酉勦羅雄州賊中丞以誼才越境委
 理尋陞廣西叅政靖江王薨悍宗煽亂諭以威德
 不復噪王辰總憲河南轉四川左藩時三殿大工
 採木為厲誼立折筭法刑為書商民不困陞順天
 府尹時蜀帑羨餘數萬金吏以請誼正色却之赴
 京以蜀扇不工罰及僚屬引罪自陳請寬僚屬遂
 飄然歸曰與同志講學五峯壽八十卒著有華

堂集崇祀

郡邑鄉賢

王世德

字長民金華人萬曆辛丑進士初任同安
 閩縣陞工部主事轉郎中典試山西陞湖

廣黃州知府擢湖廣副使備兵下江屢擒大盜遷
 右叅政尋監軍貴州安邦彥謀犯省城世德請駐
 節威清待之邦彥圍威清世德募敢死士會大風
 破賊營賊潰陞本省按察使仍監軍平苗寇陞廣
 東左布政以彌鍾凌秀之亂朝廷嘉其功賜金劉
 香老謀犯省城世德調閩將鄭芝龍夾擊香老於
 洋香老溺死敘功擢左副都御史巡撫雲南世德
 去廣時庫中羨金數萬兩悉籍以充軍餉抵雲南
 牝妖萬氏為亂世德築堡建屯諸逆歛蹟旋以疾
 卒于官滇人哀之祀名宦贈兵部右侍郎賜祭葬
 歷宦四十年廉謹謙恕家僅中產割膏
 腴以奉公祠所著有左氏兵法若干卷

李學道

字汝致東陽人萬曆壬戌進士授丹陽令
 有治政人莫敢欺以父憂歸貧不能治喪

受徒自給在丹陽嘗雪一寃獄之就死者既離任其人以百金為壽學道正言却之服除擢江西道監察御史巡視中城會內使許義挾刃闖入民家取財物復按治之繫諸獄諸涓欲因以甘心焉聚午門俟罷朝邀而箠辱之至傷頰御史大夫以下俱上疏糾諸涓官府洸洸徐相國階以言動司禮監尚文文悅以告其長悉得其主名叅之都察院疏繼上諸涓就逮首惡三人杖之百發邊戍餘各杖謫守孝陵學道亦外調司理廬州已擢南兵部車駕司主事進職方即以祖母喪承重歸服闋補山東青州理刑入覲以勞瘁卒

陸可教

字敬承蘭溪人自幼警敏萬曆丁丑會魁分校會試未幾掌誥勅使者饋遺相續盡峻却之會典告成陞侍講戊子典江西試明年復典春闈試擢春坊諭德為經筵講官時朝廷久不御殿因為十二頌首列聖訓疏入而上感動下罪已之詔

又主應天試有司援故例餽金堅辭不受抵京屬西夏告警進坐困之策上為嘉納命部臣傳諭諸將上擢南京祭酒至則以身率士士風一振轉北雍尋陞南京右宗伯遭父喪哀毀成疾卒生平性孝友母蚤世比貴每念之輒泣下侍封公孝養備至讓宅幼弟尤周親故之急天啟改元賜祭葬贈

禮部尚書

盧洪春

字思仁東陽人萬曆丁丑進士授旌德令饒有政績嘗以才能兼拜寧國丈量事陞禮部儀祭司主事十四年皇三子生封母鄭氏為皇妃春抗疏爭之上不悅越數月孟冬當享廟傳旨遣官代祭春復具疏切諫上益大怒發午門外杖六十褫職為民時幾斃編修馮琦陸可教負救得甦卒賜光祿寺少卿遣使諭祭

許弘綱

號少微東陽人萬曆庚辰進士初任績溪令值丈量採公議刻華陽經界錄撫軍以

為能舉卓異擢給事中轉兵科都時寧夏有悖拜之變關白攻陷朝鮮上直陳兵事慎選邊材等疏平壤之役經畧宋應昌提督李如松既擊破倭復朝鮮而兵部尚書石星輕信市人沈惟敬言主和議許封貢弘綱與同官力爭之總督寧夏尚書魏學會被逮綱疏救甚力歷轉順天府尹內使王朝以煤稅激變言官合詞請免有旨撤回王朝其原管密座准照上林苑監事例徵稅進用而總理內使陳永壽復主之令民密三則徵收人情洶洶綱以職掌所屬一再疏不報至三四上卒罷煤稅未幾巡撫江西丁外艱歸服闋起左副都攝院事會南畿御史相許奏語侵綱遂連章乞休歸尋起總督兩廣處置撫職皆有成績拜南京兵部尚書屢疏乞歸年八十賜存問卒贈太子少保予祭葬所著有家禮纂要三垣疏草羣玉山房等書

趙賢意

字伯慎東陽人萬曆乙未進士初授邵武司理宿案山積意剖決如流平反不可勝

計因有樵川白石之謠時內使以採辦四出擾民前驅至邵意力拒之官皆相慶謂之鐵山先是妖党晁天王等勾結海寇為患意選壯士間行入賊中以計擒巨魁脅從者皆散四境肅然陞南曹車駕司草場夙弊釐剔無遺條上十二事悉中款要遂著為令轉比部營繕郎特論廣稅之害不報會諸興作一時並舉因上言積例宜破浮費宜節復及內使擾民諸事亦不報尋奉命典粵東試時安綿利保等處備兵缺士兵數亂朝議屬諸意學士雷思需為賦蜀道難意曰君誠愛我然未識致身之義耳既至誅勾連為難者餘悉定綿州為二川要衝嘗巡視要害察土俗撫流移以勞疾卒所著有性理明銓史論補禮要及醫學須知等集崇祀鄉賢

王嘉忠

號全吾東陽人萬曆丙子舉人署吳興教諭改平湖縣知縣有奸民以白蓮教惑人

置之法調繁澄海浚三川之流築石梁三民利賴焉俗例子上元中元日男婦跨彩橋禮佛奸民因

之博鏹錢諸惡少艷歌謔浪忠聞立毀之懲其首
 事者著為令以薦授評事所申救凡若干人出知
 興化至境即取軍民利病榜陳之巨豪彭某以資
 橫鄉邑奪人妻女又喜以奇病中人忠廉得其實
 立斃之肆尸于通衢尋備兵蒼梧凡例有不便于
 民者悉去之諸文網多疎畧而於所轄貪墨吏不
 少縱以拂上官意告歸

張應槐

字汝植浦江人孟暄孫也萬曆丙戌進士授饒州司李五年凡大辟戍徒從末減者

數百人秩滿遷樞部主事會銓司某起言官忤上
 意槐特疏救之尋補武選郎轉閩兵備執政葉公
 閩人也以大義相繩上疏十餘款其一以宰相天
 下樞衡當推誠布公不宜招權聚黨其二以儲貳
 天下大本太子髫年宐選左右前後之人格以日
 新又新之學又以弗補大僚弗典按差弗召對弗
 視朝語規皇上執政喉言者中之槐遂不待詔歸
 再疏兵事數千言皆先事中機宜僉服其論踰年

起楚屯鹽水利叅政築隄防濬水道水故從楚宮
 出宮竇塞城中遂苦潦槐首清之始諸薦紳繼及
 王宮王怒槐趣見開諭再三王始悟得竣其功三
 年晉粵憲長正巳率屬墨吏望風解綬後攝海道
 條防倭十餘策上之朝議重用而槐竟以疾卒所
 著有存養錄鳳山博議續浦陽人物志諸書行於
 世祀麗邑鄉賢楚中名宦

倪尚忠

字世卿浦江人萬曆戊戌進士授廣東順德令誠篤慈祥粵故多盜大辟以下恒薄

懲邑人以爲言忠曰使其能改何過督爲乃著宣
 化錄以勵民風遂丕變尤博學工古今文詞詩登
 大曆之選而精鑒知人先是順稱下邑科第寂寥
 忠日進士課藝文取資敏者拔之嗣即春秋二榜
 不絕躋顯仕者先後得二宗伯人比之文翁云萬
 曆中設採珠廠閹使橫甚所及者身家立盡忠下
 令邑中見有珠廠勾役杖而禁之時有傾害及孝
 廉某者執其甲手置之獄閹怒欲以疏劾衆懼禍

不測忠曰吾令一邑不能為一邑驅豺虎吾罪較
豎更甚力言制按兩院得奏罷採亦竟以是與邑
豪紳忤遷吉州府同知會母老疾致仕歸邑人追
思不已更為祠祀之所著有居雲草鳴籟草宣化
錄學製編數十萬言
年八十端坐而逝

婁一堂

字叔宇浦江人萬曆癸丑進士除部曹水
虞主驗廳事故事五庫備上供邊儲者就

廳審美材胥賈相蒙至一商動縻大府金十餘萬
堂榜其弊于衢商恐謀于胥獄假進海物數瓶啟
之金也斥去急速胥獄得其狀莫不股票出守端
州上書御史臺議汰浮賦十之二民少安遷本省
驛傳尋陞大叅治山東糧蕪郵轉漕所至有殊聲
丙寅總晉臬時魏璫遣中使鎮各邊使至堂不為
禮璫敗遷廣東右布政攝海道篆盜李之奇數寇
海為亂堂招其党芝龍令殺贖芝龍果縛之奇在
廷僉多其功以積勞發背卒年六十二著有
瑞槐軒集鄉約訓言女則若干卷行於世

朱大典

字延之號未孩金華人為諸生時落魄而
英氣逼人登萬曆丙辰進士授山東章丘

知縣陞兵科給事中歷福建叅議回籍崇禎四年
起山東叅政上命巡撫山東適寇亂據登圍萊累
月不解大典力持勦議集主客步騎兵數萬攻之
賊眾披靡晉少司馬八年流賊陷鳳陽焚陵寢上
特命總督漕運兼巡撫十一月賊逼鳳陽大典破
之於壽州十二月攻滁州大典同盧象昇合十道
兵馳援賊敗走九年賊犯陵寢大典授計總兵楊
御蕃迎擊賊宵遁渡河十年賊老回回等分十路
焚掠江北大典會諸路軍破走之後罷歸值國變
大典獨守婺城合門自焚死其孫錦衣珏亦死于
浦城珏少年能
文有經濟才

徐學聚

字敬輿蘭溪人萬曆癸未進士任浮梁知
縣密鎮無賴之徒多嘯聚為盜聚至解散

調吉水值水旱設法濟荒民賴以生築河堤三十
餘里人稱徐公堤羅禮科給事中疏請勤召對建

元良蚤諭教為丞又雪李督撫之冤裁黔國非分之請究江西宗室蝥毒之橫直聲動中外轉湖廣僉事陞江西督餉參議尋擢山東提學副使陞河南按察福建布政時奸民吳建糾白蓮教謀叛聚設計擒之晉閩撫有守備劉某謀不軌聚廉知捕之奸商引紅毛駕夾板三艘泊彭湖求互市倚高稅監為粵援聚抗疏陳入誣五患并劾高監擅利擾害起釁狀而以稅額歸有司海寇窺伺聚嚴為儆修數年安枕七疏乞歸閩人立祠尸祝焉天啟間贈副都御史予祭葬

鄭弘道

字克修蘭溪人性至孝七歲時親遘疾治途遇遺金而不取戊子登賢書甲戌成進士授徽州府司理廉明郡無冤民有士人投揭門墻贖以石覘發之則金也立名前生却而絕之揖郡篆餘羨數千金為造紫陽橋咸稱曰鄭公橋又揖休歛

二邑羨贖所積幾萬金悉以飭泮宮資貧士補缺逋置義塚調南雄二年而卒

王肇坤

字亦資蘭谿人性穎異好讀書辛未成進士其祖繼泉聞報之日即手書九字箴寄

之曰忠事君慈視民清律身坤奉為寶訓授刑部主事清理滯獄以平恕嚴明稱改授江西道御史上疏請太子出閣講學巡視兩關簡閱兵馬士卒蕭然時羽書告急所在震動或謂閱臣無守士責坤厲聲荅曰既為臣子敢分職守耶即日介馬而馳時兵以四調出無供干櫓者坤以忠義激勸士民咸感泣身中四矢兩刃而死事聞命有司收其遺骸時值暑顏色不改賜祭葬加贈大理寺卿封其祖父并蔭一子

周鳳岐

字宇和永康人萬曆己未進士初授中書轉戶部郎中魏忠賢差索靴料銀兩厲色

拒之放歸崇禎元年巡撫戶部交章薦起禮部郎中陞湖廣江防道轉四川兵備副使屬苗爭疆為立碑定界以解之陞澧州叅政流寇圍荊州當事檄鳳岐提兵應援賊將王老虎襲澧州鳳岐轉戰

恢復未幾逆寇張獻忠陷長沙轉攻澧州叅議陳
璜出戰全軍覆沒鳳岐糧盡援絕城陷被執賊帥
親解其縛諷之降鳳岐怒罵曰予愧不能為君父
報仇誓不與賊子同生張拳擊之賊遂斷其臂剖
其腹死

徐學顏

字石松永康人三中順天副榜父司城吳

魁其獄先後居京師賓至如歸殯旅觀者十三人
崇禎己卯拜楚府長史危襟正色王敬暉之王午
秋滿秩報最補兵備癸未夏武昌被陷公與賊格
鬪賊斷公左臂尚持刀罵益厲遂被支解閣門殉
難者二十餘人

章自炳

字美含事親孝父病劇割股以進登天啟

受考選擬授御史權要有求千金者炳不從遂改
兵部職方司主事疏陳嚴編造定軍額諸要務清

月糧萬餘石擢

建屯地叅議上屯地及清理鹽

弊疏商人德之晉副使當劉香老殘破後炳與民
休息威惠並行廖監激變人情洶洶炳為諭禍福
解散之地方以安尋晉叅政時屆多事尤以修練
備戒屬邑未幾粵徭發難監軍兩廣運奇制勝寇
遂蕩平因久滯瘴鄉成疾又值龍南妖教煽眾不
軌力疾深入妖叛就擒
病增劇嘔血數升而逝

金肇元

字司初金華人天啟壬戌進上初授徽州

司理多所平反時魏璫檄毀紫陽書院羅
織正人不附已者欲寘之重典責所司奏報元嘆
曰名義至重鬼神難欺吾死不為也遷水部又以
強項觸璫怒幾致危禍崇禎中擢樞曹陞叅議分
守湖東置信建兩郡學田轉副使分守嶺北倡築
南安水城數里為居民障又立粥廠以活流殍陞
福建布政司未幾以父艱歸所著有陽春館集
張國維 號玉筍東陽人天啟壬戌進士授番禺令
清理沙漲田數萬畝以業貧民擢刑垣敷

陳侃侃陸太常寺少卿奉命巡撫江南振綱刷紀尤善識拔寒素每念安慶孤懸江北踞雷都上游時請增兵戍守又相度繁昌太湖高淳蕪湖等處皆有興築各郡縣改折及虛糧白糧等項悉清其夙弊民困少甦崇禎八年築九里石塘與平望內外塘九年築松江捍海等塘十年築長洲至和等塘濬江陰運河十一年築鎮江漕渠皆報竣乃輯吳中水利全書晉工部右侍郎總督河道兼提調徐臨通津四鎮漕餉事務值天旱泉枯禱于泰山得大雨乃上下泉源挖浚蓄水以濟糧運又先後擒斬逆賊李青山王朋徐見隆張文宇等東境以安晉兵部尚書吳人立祠虎丘肖像祀之聞國變後投水死

姜應甲

字叔乙金華人崇禎戊辰進士授行人考選刑科給事中時冢宰缺員吏侍張捷以呂某對魏璫黨也舉朝不言甲獨發其奸上遂舉筆去呂名京師旱方齋戒祈禱一夕有旨決罪囚

甲封還詔書不允甲莫曰不得其言尚可留乎卽以親老乞歸養策蹇出都門癸未東陽許都友傾家貲募死士迎敵于孝順街寇遂退晚乃披緇自號頑石結茅於北山巔年七十有六而卒

傅巖

字野倩義烏人少孤貧及長好讀書林心作詩賦古文詞皆鐫理刻肌風瀾時妙天啟辛

酉恩貢甲子舉于南雍崇禎甲戌進士得徽州歙縣舉循良第一後以讒去官及至國變後死于金華子三齡文齡發齡熙皆有文名初巖之遇禍刃將及熙年十四以身翼蔽其父刃着于頤而死發趨救矢洞右腋移時復甦見父弟死遂以手扶其創創裂而卒齡文奉其母歸杭藜藿不充蓬頭垢面者且十年而卒

陳時芳

號春洲師事見山殫精默會盡得其傳博覽多聞而歸于實踐以修悟交融爲極體

羸弱至講論輒娓娓不倦著宗傳廣錄邵魯遺芳行世後有倪珩者潛心經史不事鉛華以聖賢理

學為已任偶一試制舉菀曰與得一第以慰吾親耳性至孝母病奔走十餘里禱于神聲淚交出年少補弟子員以攻苦致疾死

皇清朱之錫

字孟九號梅麓義烏人幼穎異丙戌成進士充館選已命督河之錫凡為修

守綱繆計者無不悉心擘畫以圖經久如夫役工程錢糧職守及諸弊端中間與革損益皆商確至當一一條上幾數十疏俱覆議報可於是河政煥然改觀之錫奔走無寧時每當各工並急則南北交馳寢食俱廢值甚暑介馬暴烈日中隆冬嚴寒觸冒霜雪首尾十年數省之民獲免昏墊乙巳冬督催空艘抵臨清及東旋形神顛頓入春復閱視大挑奔馳邳宿間積勞日甚因繕疏請告未拜發而卒是時經紀後事家無餘財壬寅歲禱山左中州淮南道建相望之錫設法倡賑全活甚眾其慈祥惠養未易悉數而立身清介惟藏書數千卷被服如儒生布衣蔬食泊如也今河上遠近爭傳

殿為河神
為建祠云

當一一條上幾數十疏俱覆議報可於是河政煥
 然改觀之錫奔走無寧時每當各工竣急則南北
 交馳寢食俱廢值甚暑介馬暴烈日申隆冬嚴寒
 獨冒霜雪首尾十年數省之民獲免昏墊乙巳冬
 督催空艘抵臨清及東旋形神頓入春復閱視
 大兆奔馳亦宿病積勞日甚因善疏請
 發而卒是時經紀後事家無餘財壬寅歲穀由左
 中財能自存建皇之錫設法倡賑全活甚眾其
 蠶蠶歸云本易悉數而立身清介惟藏書數千卷
 被蠶所麻生而衣蔬食自如也今河上遠近爭傳

